

Ni been ree xi Apóstoles Jesucrist

¹ Rugajpdiozan lüj dad Teófilo: Loj da gui'ch yalojn rnin graczi ni been Jesús ni balüü tēēman chi guzuloj xchiinman ² xt chi ziaman xanyabaa. Chi gadaman yaguiaj, gunabeeman bēn naj ree apóstoles, bēn guleman, ni rayal güün reeman, zi'c rēb xSprijt Dios lojman. ³ Chi mal guzagdiaj da'taman loj xguialgüjtaman, babanman loj ree bengüt. Loj tiuu dxej balüülojman zien volt loj bēn naj ree apóstoles, persi gogbee reeman nabanca-man. Dxej zii ree guneenēman laa reeman xcwent xguialrniabee Dios.

⁴ Chi ziz za'nēman laa reeman, guneenēman laa reeman ad yaza reeman Jerusalén, rēbaman:

—Gol gulējz gac cumplid ni na da Dadan zi'c ma rnin lojdi. ⁵ Walican baroobnijs Waj con nijs, per ma zidyob dxej gui't xSprijt Dios guibannē lējt, laan gac zi'c gualrirobnijs par lējt.

Zia Jesús xanyabaa

⁶ Lēn ree dxej zii chi badxaag lasa' reeman con Jesús, gunabdiidx reeman lojman rēb reeman:

—Dad, ¿yanan yayül gualrniabee loj ree bēn Israel ya?

⁷ Badxi' Jesúsán rēbaman:

—Ad lējtít rayal gagbee xhie dxejn o xhie horan gac zian. Tijbzi da Dadan ragbee laan din laaman ca' gualrniabee. ⁸ Per chi ma nabannēdi xSprijt Dios, tia'di gualrniabee. Dxel griidi chiguiedi

diidx loj ree b́en Jerusalén chu najn, nē gra ree guiedx riga' niz Judea nē niz Samaria, xt ree guiedx ren ni riga' ree zija' da't.

⁹ Gulox guneeman, ruguiaa reeman laaman dx-ejlczí wajsaman ziaman xanyabaa, abi' biguiajt tijb bēj bata'cwan laaman, dxel ad baguiaatri reeman laaman. ¹⁰ La'tgaj ruguiaa reeman ziaman xanyabaa, gulentie tio'p ree b́en najcw lajd naquich lod za' reeman, ¹¹ abi' rēb reeman loj ree apóstoles guin:

—B́en Galilea, ¿chexc zeel sta ruguiaadi xanyabaa? Jesús, b́en baguiaadi zia xanyabaa, laagajcaman yaguaaad stijb, zi'cgajc baguiaadi ziaman.

¹² Chi baza ree xi apóstoles Jesús ruguia' la Olivos, guza reeman zi'ct rza reeman dxej razi-iladx reeman, persi badxin reeman Jerusalén.

¹³ Chi badxin reeman, wē'p reeman lēnū ladya lod zojb reeman. Brii laj reeman Béd, Waj, Jacob, Andrejs, Filip, Tumajs, Tol, Matew, Jacob xi'n Alfeo, Simón (b́en guzunē ree b́en cananistas), nē Judas xi'n Jacob. ¹⁴ Gra reeman rüjn tijbzi xgab, radxaag lasa' reeman din cwedx guiniab reeman Dios, con ree bijch Jesús con Li xniaaman, con ree b́engunaa ren.

Gulej reeman b́en baya'n xluar Judas

¹⁵ Lēn ree dxej zii bado'p ree b́en rliladx Jesús, naj reeman cost tibgayuu gajl bejn, dxel guzuli Béd galay reeman, rēbaman loj reeman:

¹⁶ —Compniar raliduladx ree Jesucrist, ganin lojdi, gojc cumplid ni bacaa rey Davi loj xtiidx Dios por xSprijtaman xcwent Judas, xin balüü Jesús

loj ree b́en gunaaz laaman, ¹⁷ gojquix tijb dux compniaran, n̄e laax been lasa' dxiin raguieenan.

¹⁸ Per con milia ni gudix reeman laax por ni mal beenx, bio' guidxliuj lod gudidya'x, bazuj gui-jquix, goxya'x abi' brii gra xziix. ¹⁹ Chi gogbee gra ree b́en Jerusalén ni goc, gunee reeman guidxliuj zii Acédama, r̄en guiēban guidxliuj rejn. ²⁰ Din r̄eb loj libr la Salmos:

Yaya'n d̄ejch lidxix,
achutziri cwe l̄enan.

R̄eb t̄ēē lojn:

Yayu ben ren guia'x.

²¹ 'Zeel loj gra ree b́en za'n̄e dunuj ree guidib tiamp ni guzun̄e Jesús dunuj ree, ²² diizd chi baroobnijs Waj laaman xt chi ziaman xanyabaa. Loj gra reeman rayal grii tijbaman din ḡūnman dunuj ree yudar yaguie'ch ree loj ree bejn guial walican babanman loj ree benḡüt.

²³ Dxel gulej reeman tio'p reeman: tijb b́en la Xiēb (rniee reeman laaman Barsabás, rniee t̄ēē reeman laaman Justo), gulej t̄ēē reeman b́en la Matías. ²⁴ Dxel gurejdx gunab reeman Dios, r̄eb reeman:

—Dad, l̄uj n̄unbee luxdoo gra ree bejn. Bal̄üü chu loj grop reeman gulejl ²⁵ din gacaman apóstol luar Judas, din banijtix delant lojl por dol ni beenx abi' ziax luar ni rayalix.

²⁶ Dxel baguiaa reeman chu yayal suert guin, abi' bayal Matías laan. Loj hor zii gajc bayuman loj zachibtib ree apóstoles.

2

Biguiajt xSprijt Dios diizd xanyabaa

¹ Chi bidxin dxej gojl lanij la Pentecostés, gra ree b́en rliadx Jesucrist bado'p tijbzi luar. ² Dxejlczi gojc naquie' xanyabaa zi'c bidoxh xt bayu bi lēnū lod riga' reeman, ³ abi' gulentie zi'c bajl dobēz ree, biguiajt reen guijc tijb gaj reeman. ⁴ Zianz guyu xSprijt Dios luxdoo graczi reeman, dxel guzuloj canee reeman diidx ren ree zi'c cusnee Sprijt guin laa reeman.

⁵ Lēn ree dxej zii za' zien ree b́en Israel Jerusalén, baza reeman gra ladczi din cwedx guiniab reeman Dios. ⁶ Chi biguiejn reeman cayajc naquie', bado'p reeman persi biquiaa reeman. Dxel chi biguiejn reeman rniee gra ree b́en rliadx Jesús xtiidx tijb gaj reeman, ad badxejlt xgab nūjn reeman. ⁷ Dád badxa loj reeman xt ni'quid badxejlt xhie nūjn reeman, abi' gunabdiidx loj lasa' reeman rēb reeman:

—¿Nid b́en Galilea gra ree b́en canee guin ya?
⁸ ¿Chexc zeel raguiejn ree rniee reeman dux tiidx ree? ⁹ Du loj ree no'ch ree b́en zēed guiedx riga' ree niz Partia, Media, Elam, Mesopotamia, Judea, Capadocia, Ponto, Asia Menor, ¹⁰ b́en zēed tēē ree guiedx riga' ree niz Frigia, Panfilia, Egipto, nē ree guiedx nulen Libia ni riga' ree gajxh Cirene, nē ree b́en zēed Rom, yu' reeman gojl Israel per naban reeman Rom, yu' tēē reeman naj quijb ben Rom per rliadx reeman ni rliadx ree b́en Israel. ¹¹ Nē ree b́en zēed niz Creta nētēē ree b́en zēed guiedx riga' ree niz Arabia no'ch du loj ree. ¡Per dugraczi ree caycaagdiajg con dux tiidx ree niza'cdxoon rūjn Dios!

¹² Graczi reeman badxa da't loj xt ni'quid badxejlt xgab nūjn reeman, abi' guzuloj canabdiidx loj

lasa' reeman rëb reeman:

—¿Xhie rën guiëb gra ni guie?

¹³ Per garol reeman baze' laa reeman, rëb reeman:

—Rë' reeman.

Ni rëb Bëd loj ree bejn

¹⁴ Dxel guzuli Bëd con zachibtib ree apóstoles guin, guneeman rejs rëbaman:

—Lëjt bën Judea në graczi ree bën zojb Jerusalén, gol bacaagdiajg gol bignia' tëë ni ganin.

¹⁵ Ad rë't ree bën guin zi'c naladxidi, din qui gojlri raca gaa rsil. ¹⁶ Guie cayajc cumplid ni gunee bën brii laj Joel, bën badëë xtiidx Dios loj ree bejn, chi rëbaman:

¹⁷ Na Dios,

guidxin dxej gaxhal da Sprijtan luxdoo gra ree bejn,

abi' xi'ndi xinguaaw con biingunaa gudëed reex da diidxan,

zien ree ni gulüüloj loj ree xinguiag,

guiáad ree bengol zien ree ni guinie'xhaal reeman.

¹⁸ Dxej zii ree gaxhal da Sprijtan luxdoo ree bën rüjn da dxiinan,

xinguaaw ree në ree béngunaa,

abi' gudëed reeman da diidxan.

¹⁹ Gulün sen ree xanyabaa ni yadxa lojdi,

guiáad loj guidxliuj gulün sen ree

zi'c rejn në bajl nëtëë go'xh.

²⁰ Guicajy loj gubijdx, guiáad bëëw yayajcan zi'c rejn.

Chi ma gojc zian, dxel guidxin quijb dxej guin,

dxej za'cdxoon gui't Dios bën rniabee,

dxej guiguien guidib xbianiman.

²¹ Abi' graczi ree b́en cwedx guiniab laaman güünman laa reeman perdon.

²² Rëb tëë Bëd loj reeman:

—Yan, gol bacaagdiajg ni ganin lëjt b́en Israel: Lëjt ragbee guial Jesús b́en Nazaret najman b́en guxhaal Dios, been tëëman milagr ree në ree ni radxa loj ree bejn zi'c sen din gagbeedi guial Dios guxhaal laaman. ²³ Diizd gocli mal nünj Dios xgab guial zian güünnëdi Jesús, gunaazidi laaman bayüdi laaman loj ree benmal, din gugüjt reeman laaman loj crüjz. ²⁴ Per basban Dios laaman stijb, babëëman laaman loj guialgüjt, din ad gojct nutëë guialgüjt guin laaman. ²⁵ Chi gunee rey Davi xcwent Jesús, rëbaman:

Zianczi baguian dux Dad ree Dios za'nëman naj. Za'man da ladbeen, achetczi zajc guchejb naj.

²⁶ Zeel yu' luxdon nix, ruzat tëën Dios zagdx. majsi guiëtan ad rdxebtan,

²⁷ din ad zusa'ntil naj lën baa,

ad zatiëjbtıl xhin xcuerp xi'nl b́en naya nali.

²⁸ Balüül naj nejz runee guialnaban,

chu' tëë luxdon zagdx guial guibannël naj.

²⁹ Basnuu gunee Bëd, rëbaman:

—Ganin loj gradi compniar, diidxiczi dux b́engulal ree Davi güjtaman biguie'ch tëëman, abi' laa xbaaman sta raguiaa ree yan. ³⁰ Per gojcaman b́en badëë xtiidx Dios loj ree bejn, abi' gogbeeman been Dios promejs guial loj xdiaaman grii Cristo b́en nabee. ³¹ Rulüü ma cuguiaaman gra ni gac, rëbaman guial yaban Cristo loj ree bengüt,

ad zaya'ntaman lën baa ad zaxin tēēt xcuerpaman. ³² Yan ma basban Dios Jesús, dugran nayajc testiw guial walican babanman. ³³ Zia tēēman xanyabaa zisobaman xladbee Dios, persi badēē xSprijt Dios lojman zi'c ma rēbaman, yan ma guxhaal Jesús Sprijt guin loj guidxliuj, por laaman cayajc ni cuguiaadi caguiejn tēēdi. ³⁴ Ad Davitan zia xanyabaa, din laagajcaman rēb:

Rēb dux Dad ree Dios loj bēn rniabee naj:

“Gurej da ladbeen,

³⁵ xt gabecan xin rdxe'ch ree lūj guia'l.”

³⁶ 'Gradi bēn Israel gol gogbee guial Jesús bēn bacaadi loj crūjz, Dios bacaabee laaman din gacaman Dad, bēn nabee dunuj ree.

Bachajg zien ree bejn bēn rliladx ree Jesús

³⁷ Chi biguiejn ree bēn riga' yagaj ni rēb Bēd, dád guyu naya luxdoo reeman. Abi' gunabdiidx reeman lojman nē loj los demazri ree apóstoles guin, rēb reeman:

—Dad, gol guna, ¿xhie rayal yaguieenan?

³⁸ Dxel rēb Bēd loj reeman:

—Gol bayagbee xtolidi, gol badxi' tēē lojdi loj Dios, gol guobnijs por xguialrniabee Jesucrist din gac xtolidi perdon, zian chu' xSprijtaman luxdoodi. ³⁹ Din promejs guin naj par lējt nē par ree xi'ndi nē par gra ree bēn riga' zijt, par gra ree bēn cwe Dios par laaman.

⁴⁰ Con ree diidx guie nē mazri ree diidx ren guneenē Bēd laa reeman, rēbaman:

—¡Gol bariica loj ree bēn rūjn ni mal!

⁴¹ Zian gojc, graczi bēn bazoob diidx ni rēbaman guobnijs. Dxej zii gajc bachajg cost choon mil

bejn bén rlliladx ree Jesús. ⁴² Graczi reeman binal ni balüü ree xi apóstoles Jesús laa reeman, gubajnnë lasa' reeman zagdxe, gurejdx gunab reeman Dios abi' rado'p reeman persi raw reeman guiadx-til tijbzi zi'c gunabee Jesucrist güün reeman.

Ze gubajn ree bén bililadx Jesús yaløj

⁴³ Graczi ree bejn radxa da't loj milagr në los demazri ree ni been ree apóstoles guin. ⁴⁴ Graczi ree bén bililadx Jesucrist gubajnnë lasa' zagdxe, rgui's tëë ni rajp reeman loj lasa' reeman. ⁴⁵ Ruto' xguidxliuj reeman në gra ni rajp reeman, persi rgui's reeman milia guin loj lasa' reeman zi'ctzi naj ni riaadx tijb gaj reeman. ⁴⁶ Guixie guixie rado'p reeman lën yadooro' Jerusalén, dxel raguiaj reeman lidx xcompniar reeman rtaw reeman, dád nix yu' luxdoo reeman rën tëë lasa' reeman, ⁴⁷ ruza't reeman Dios zagdxe, guiáad gra bejn guyën laa reeman. Guixie guixie ragnë Dios din gacxhiey mazri bén rlliladx Jesucrist, persi gojc xtol reeman perdon.

3

Bayajc tijb bén ad rajct rza

¹ Tijb dxej zë ree Bëd con Waj lën yadooro' Jerusalén raca choon wadxe, hor zii naj hor ni rbejdx rniab reeman Dios. ² Ro' xport yadoo guin zojb tijb bén ad rajct rza diizd gojlaman. Zianczi rbe'c reeman laaman ro' port guin, ni la Port Za'cdxoon, din guiniabaman carda loj ree bén ru lën yadoo guin. ³ Chi baguiaaman Bëd con Waj ma chu' reeman lën yadoo guin, gunabaman carda loj

reeman. ⁴ Baguiaa reeman lojman, dxel rëb Bëd lojman:

—Baguiaa du lojn.

⁵ Chi biguiejnman rëb Bëd zian, dxel baguiaa-man loj reeman, naladxaman milia nudëed reeman lojman. ⁶ Per rëb Bëd:

—Ad ra'ptan plajt ni'qui or par gunen lojl, per ni zajc gūnan por lūj gūnanan: Por xguialrniabee Jesucrist bën Nazaret, guzuli, guza.

⁷ Dxel gunaazaman yaaman ladbee, bazuliman laaman. Loj hor zii gajc guyu ree guia'man gojl, ⁸ abi' gutiajsaman, guzuliman guzuloj cazaman. Dxel guyunëman laa reeman lën yadoo guin, cazaman, catiajsaman cuza't tēëman Dios zagdxë. ⁹ Graczi ree bën cuguaa laaman cazaman cuza't tēëman Dios zagdxë, ¹⁰ dád badxa loj reeman bidxeb tēë reeman guial gojc zian guial nūnbee reeman bën guin, ragbee tēë reeman laaman rbej ro' xport yadoo guin ni la Port Za'cdxoon, rniabaman carda.

Gunee Bëd loj ree bejn lod la xcurdur Salomón

¹¹ Ad riro'nladxt bën bayajc guin Bëd con Waj. Dád badxa loj ree bejn, abi' baxüün reeman wej reeman lod la xcurdur Salomón lod za' ree Bëd con Waj. ¹² Chi baguiaa Bëd zian, rëbaman loj reeman:

—Bën Israel, ¿chexc zeel radxa lojdi ni goc? Ad naladxidi por dunujn rza bën guie guial naca'n guialrniabee o guial nayajcan naya delant loj Dios ya. ¹³ XDios dux bēngulal ree Abraham, Isaac nē Jacob, laaman badëë guialrniabee loj Jesús, bën bayüdi loj guxtis. Abi' chi guyën Pilato nuslaaman laaman, ad cwëjbtidi. ¹⁴ Luar niniabidi nuslaa

Pilato b́en naya nali, b́en rŭjn zi'c rayal, gunabidi baslaaman tijb xin bagŭjt bejn. ¹⁵ Zian bagŭjtidi b́en runee guialnaban. Per basban Dios laaman stijb, abi' dunujn nayajc testiw guial babanman. ¹⁶ B́en guie, b́en ruguiaadi nŭnbee tēedi, guyu gojl guia'man por xguialrniabee Jesucrist, bayajc-man guial baliduladxan, zi'c ruguiaa graczi.

¹⁷ 'Ganin lējt compniar, ragbeen guial lējt con ree b́en rniabee lējt ni'quid gogbeetidi xhienin beendi chi bagŭjtidi Jesús. ¹⁸ Per zian been Dios persi gojc cumplid ni rēbaman loj ree b́en badēē xtiidxaman loj ree bejn diizd gocli guial sagdiaj Cristo. ¹⁹ Zeel gol bayagbee xtolidi gol badxi' tēē lojdi loj Dios din gŭnman xtolidi perdon. Dxel yayaalyuj luxdoodi, ²⁰ guixhiaal tēēman Jesús stijb, b́en naj Cristo diizd gocli par lējt, ²¹ majsi yan rayalri suman xanyabaa, xt ma bazuxnejz Dios gra, zi'c rēbaman loj ree b́en badēē xtiidxaman loj ree bejn diizd gocli, b́en gubajn ree naya delant lojman. ²² Abi' rēb Moisejs loj ree dux b́engulal ree: "Loj xdiaadi cwēē Dios tijb b́en gudēē xtiidxaman loj ree bejn zi'c naj, gol bazoob xtiidxaman graczi ni naman lojdi, ²³ din graczi ree b́en ad zuzoobt xtiidxaman nit reeman, ad zajc tēetri reeman cwent zi'c xbejn Dios."

²⁴ 'Gra ree b́en badēēd xtiidx Dios loj ree bejn, diizd Samuel con los demazri ree b́en badēē xtiidx Dios diizd gulal, mal bagojn reeman ni cayajc ree lēn ree dxej guie. ²⁵ Lējt naj xdiaa reeman, lojdi gac cumplid ni cwēb Dios loj ree dux b́engulal ree chi rēbaman loj Abraham: "Por xdiaal gŭnle'n gra ree b́enguidxliuj." ²⁶ Abi' chi basban Dios xi'nman

Jesucrist, yaløj lojdi guxhaalaman laaman din gūnle'man lējt din yabēecaman gradi loj ni mal rūjndi.

4

Bazuj reeman Bēd con Waj loj ree guxtis

¹ Sta canee ree Bēd con Waj loj ree bejn, chi bidxin ree xbiħioz ree bēn Israel nē suldad rniabee suldad rniaj ree ro' yadooro' Jerusalén, nētēē ree bēnsaducew. ² Dád ralen reeman guial culūū ree Bēd con Waj bejn ree, rēb reeman guial yaban ree bejn loj ree bengūt, din laan ma baguiaa reeman chi baban Jesucrist. ³ Zeel gunaaz reeman laa reeman, per guial ma gudxe, zeel badxe' reeman laa reeman ladxguiib la'tgaj rareguiaal. ⁴ Per dád zien ree bēn bacaagdiajg ni rēb ree Bēd con Waj bililadx xtiidx Dios, gojc reeman cost gaay mil xinguaaaw xcwentqui ree bēngunaa.

⁵ Chi bareguiaal, guxtis Jerusalén nē ree bengol nē ree mextr rulūū ley, bado'p reeman loj ciuda guin. ⁶ Nē Anás bidxin yagaj, bēn naj bixhioz mazri zobjloj rniabee graczi ree bixhioz, bidxin tēē bixhioz la Caifás nē Waj nē Lejandr, nētēē gra ree bēn naj lasa' ree bixhioz rniabee guin.

⁷ Gunabee reeman bica' reeman Bēd con Waj, abi' bazuj reeman laa reeman galay lod riga' reeman, dxel gunabdiidx reeman loj reeman, rēb reeman:

—¿Chu banee diidxbee o chu por rūjndi ni guin?

⁸ Per guial yu' xSprijt Dios luxdoo Bēd dád gognēman laaman, zeel rēbaman:

—Gol bacaagdiajg ni ganin lējt bengol nē lējt guxtis, ⁹ rniabdiidxidi dunujn xhienaag

baguieenan béngogxuu guin yudar, xhie tëë naag gojc zeel bayajcaman. ¹⁰ Yanan lojdi din gagbeedi gagbee tëë gra bèn Israel xhienaag bayajc bèn za' lojdi. Bayajcaman por xguialrniabee Jesucrist bèn Nazaret, bèn bacaadi loj crüzjz abi' basban Dios laaman stijb. ¹¹ Beennëdi laaman zi'c rüjn ree bèn rüjn yu chi rbëëgo'n reeman tijb guiaj, dxel qui ragbeeri reeman guial guiaj guin naj ni mazri lasajc par gacnë yu guin. ¹² Achut ben ren rüjn dux tol ree perdon, tijbzi Jesús, din achut mazri guxhaal Dios loj guidxliuj din güünman dunuj ree perdon.

¹³ Chi baguiaa ree guxtis guin ad rdxebt ree Bëd con Waj guial rniee reeman, abi' gogbee reeman ad bèn basiidt ree mazran achu tëët naj reeman, badxa loj reeman bayünbee tëë reeman laa reeman guial bèn binal ree Jesúsán. ¹⁴ Abi' yagaj gajc za' bèn bayajc guin, zeel ad bile'tri xhie niëjb reeman contr laa reeman. ¹⁵ Dxel gunabee ree guxtis guin barii ree Bëd con Waj din yaya'n laaz reeman din gü reeman diidx. ¹⁶ Rëb reeman:

—¿Xhienaag yaguieennë' ree xin guin ree? Graczi ree bèn Jerusalén ma ragbee milagr been reex. Abi' ad zajct yarexuu ree. ¹⁷ Per chitëë guire'ch xtiidx Jesús, yachejb reex din diizd yan achutziri loj guza't reex laax.

¹⁸ Dxel gurejdx reeman laa reeman gunabee reeman chitëë churi loj guza't reeman Jesús, ad gulüü tëëri reeman xtiidxaman. ¹⁹ Per badxi' Bëd con Waj laan, rëb reeman:

—Lëjt gajc gol been xgab: ¿Zagdxë naj yazooban xtiidxidi luar yazooban xtiidx Dios ya? ²⁰ Per

ad zajct yacwëez yaguie'chan gra ni baguiaan baguiejn tëën.

²¹ Dxel bachejb ree guxtis guin laa reeman stijb, dxelri baslaa reeman laa reeman zia reeman guial ad badxejlt xhienaag nudëed reeman laa reeman casti, din graczi ree bejn ruza't Dios zagdxe por ni goc. ²² Nadëd tiuu ijz yu' bën bayajc guin.

Rbejdx ree bën rliladx Jesús Dios

²³ Chi baslaa ree guxtis guin Bëd con Waj, baguij reeman lod riga' xcompniar reeman bën rliladx ree Jesucrist, abi' be reeman diidx ni rëb ree bixhioz rniabee ree bixhioz në ree bengol rniabee. ²⁴ Chi gulox bacaagdiajg reeman diidx ni be reeman, graczi reeman guzuloj cabejdx canab Dios, rëb reeman:

—Dad lüj rniabee gra, lüj naj bën been xanyabaa në guidxliuj nëtëe nijsdoo con gra ni yu' loj reen. ²⁵ Por xSprijt tëël gunee rey Davi diidx guie ree, chi rëbaman:

¿Chexc zeel ridxe'chnë ree bénguidxliuj Dios?

¿Chexc zeel rüjn reeman xgab ni ad rüjnt wen?

²⁶ Bado'p ree rey në gra ree guxtis

din su reeman contr dux Dad ree Dios në contr Cristo.

²⁷ 'Abi' zian ma gojc, Herodes con Poncio Pilato con ree bën Israel nëtëe ree bën ad najt bën Israel, badxajg lasa' reeman luguiedx guie persi guzuj reeman contr xi'nl Jesús, bën naya nali, bën ba-caabeel. ²⁸ Zian gojc, been reeman zi'c ma beenl xgab diizd gocli. ²⁹ Abi' yan Dad, baguiaa yan ruchejb reeman dunujn. Gognë dunujn nayajcan xbejnl din gac yatie'chan xtiidxil sin guialrdxeb, ³⁰ në con xguialrniabeel yasiajcan bënragxuu ree,

yaguieen tēen milagr ree por xguialrniabee xi'nI Jesús, bēn naya nali.

³¹ Chi gulox gurejdx gunab reeman Dios, guzuloj canij luar lod riga' reeman, dxel guyu xSprijt Dios luxdoo gra reeman, abi' guzuloj catie'ch reeman xtiidx Dios sin guialrdxeb.

Ragnē lasa' ree bēn rliladx Jesús

³² Graczi ree bēn rliladx Jesucrist bidxajg gubajn reeman, rūjn reeman tijbzi xgab, ni'qui tijb reeman ad rēbt guial xieenzi reeman naj ni rajp reeman, din najn par gra reeman. ³³ Gognē Dios apóstoles guin ree persi basnuu be reeman diidxli guial baban Dad Jesús loj ree bengüt. Dád beenle' Dios laa reeman. ³⁴ Ni'czi tijb reeman ad biaadxt xhienin, din graczi ree bēn rajp guidxliuj o bēn rajp yu ya ruto' reeman laan, abi' milia guin ³⁵ rayü reeman loj ree apóstoles guin, persi laa reeman rgui's laan loj gra reeman zi'ctzi naj ni riaadx tijb gaj reeman. ³⁶ Loj reeman no'ch tijb bēn brii laj Xiēb, najman xdiaa bēn brii laj Leví, zēēdaman yuj la Chipre ni riga' loj nijsdoo. Gunee ree apóstoles guin laaman Bernabé, rēn guiēban Bēn ragu' luxdoo ree bejn zagdxe. ³⁷ Gojpaman tijb guidxliuj, abi' bato'man laan persi badēēman milia guin loj ree apóstoles guin dīn qui's reeman laan.

5

Dol ni been ree Ananías con Safira

¹ Per guyu stijb bēn brii laj Ananías, xbéngunaaman brii laj Safira. Bato' tijb xguidxliuj reeman, ² per baya'nnē xbéngunaaman diidx persi

baya'nnëman ta'n milia guin. Sta'nan badëëman loj ree apóstoles guin, rëbaman laan naj gran. ³ Abi' rëb Bëd lojman:

—Ananías, ¿chexc zeel cwëjbil gunabee xindxab lüj? ¿Chexc zeel guyënl nusquieel loj xSprijt Dios, din naya'nnël ta'n milia ni bato' xguidxliujl? ⁴ ¿Wen nid xguidxliujl gojcan ya? Abi' chi bato'lan, ¿nid xmilialan ya? ¿Chexc zeel balablaxdil beenl zian? Loj Diosan nuyënl nusquieel, ad lojt bejnan.

⁵ Chi biguejn Ananías ni rëbaman, biajbaman abi' güjtaman. Graczi ree bën gogbee ni guzacaman dád bidxeb reeman. ⁶ Dxel bibig bëlzi ree xinguiag, batüüb reex laaman lajd persi biquie'ch reex laaman.

⁷ Chi gudëd cost choon hor, dxel bidxin xbéngunaa Ananías, ad ragbeetaman ni goc. ⁸ Dxel gunabdiidx Bëd lojman rëbaman:

—Guna, ¿bato' xguidxliujdi zi'c na lacheelil ya?

Abi' rëbaman:

—An, zianqui bato'nän.

⁹ Dxel rëb Bëd lojman:

—¿Chexc zeel baya'ndi diidx persi nuyëndi nusquieedi xSprijt Dios? Laa ree xin biquie'ch lacheelil ziaad ni, yan nëgajc lüj chiquie'ch reex.

¹⁰ Loj hor zii gajc biajb Safira lod za' Bëd, abi' güjtaman. Chi bayu ree xin guin baguiaa reex ma güjtaman, dxel bales reex laaman biquie'ch reex laaman cwë' lacheelaman. ¹¹ Graczi ree bën rliladx Jesucrist në gra ree bën gogbee ni goc, dád bidxeb reeman.

Zien ree milagr been ree apóstoles

¹² Zien ree milagr narooob been ree apóstoles guin loj ree bejn. Graczi ree bën rliladx Jesucrist

radxajg lasa' ro' curdur lod rniee reeman xcurdur Salomón. ¹³ Zagdxe ruza't ree b́en luguiedx guin laa reeman, per ad rayaxt reeman guchajg reeman laa reeman. ¹⁴ Abi' guixie guixie caya-jcxhiey ree b́en riladx Dad Jesús, zi'c xinguaaw zi'c béngunaa. ¹⁵ Xt rbëe reeman b́enragxuu ree lunejz, rguijxh reeman laa reeman loj ree loon në loj ree da, din chi téd Béd, majsi xbalazaman téd guijc reeman. ¹⁶ Në ree b́en zojb guiedx riga' ree gajxh Jerusalén, zien reeman bidxin Jerusalén, bidxinnë reeman b́enragxuu ree në ree b́en yu' xindxab luxdoo, abi' graczi reeman bayajc.

Gunaaz ree guxtis Béd con Waj

¹⁷ Bixhioz mazri zojbloj rniabee graczi ree bixhioz në ree bénsaducew za'në laaman, guyu guialnadédloj luxdoo reeman, ¹⁸ abi' gunabee reeman biniaaz ree apóstoles guin persi badxe' reeman laa reeman ladxguiib. ¹⁹ Per guxhin zii tijb xi anjl Dios guxhal ro' ree xport ladxguiib guin, abi' babëëman laa reeman, rëbaman:

²⁰ —Gol chej lën yadooro', gol biguiedx loj ree bejn xhie naag gap reeman guialnaban tiblayaa con Dios.

²¹ Chi biguiejn reeman ni rëb anjl guin, bareguiaal rsildoo wej reeman lën yadoo guin, guzuloj culüü reeman bejn ree xtiidx Dios.

Guiáad bixhioz zojbloj guin con ree b́en za'në laaman, bato'p reeman guxtis con gra ree bengol Israel. Abi' gunabee reeman suldad ree din chica' reex apóstoles guin ree lën ladxguiib guin. ²² Per chi bidxin reex ro' ladxguiib guin, achutri ree

apóstoles guin ree yu'. Dxel bicojn reex guxtis guin ree, ²³ rëb reex:

—Chi badxinan, baguiaan nayaaw ro' ladxguiib guin zagdxé, laa ree suldad rajp ro' ladxguiib guin za', per chi baxhalan, achutczi yu' lënan.

²⁴ Dxel bixhioz zojbloj guin con suldad rniabee ree suldad rniaj ro' yadoo guin, con ree bixhioz rniabee ree bixhioz, chi biguiejn reeman zian, guzuloj rëb loj lasa' reeman, ¿ban xt guin chigdi-blagaa ree ni guie?

²⁵ Loj hor zii gajc bidxin tijb xin rëb loj reeman:

—Laa ree bën badxe'di ladxguiib yu' lën yadoo culüü reeman bejn ree.

²⁶ Dxel wej suldad rniabee guin con ree xsuldadix bica' reex apóstoles guin ree, per ad been-naat reex laa reeman guial rdxeb reex gucaaguiaj ree bejn laa reex. ²⁷ Chi badxinnë reex laa reeman, bayü reex laa reeman loj guxtis. Dxel rëb bixhioz zojbloj guin loj reeman:

²⁸ —¿Nid ranan ya guial ad zajctri gulüüdi bejn ree xtiidx Jesús? Abi' yan graczi loj ree bën Jerusalén ma gutie'chidi xtiidxix, nëtëë yan rëndi gudxiibidi du guijcan guial dunujn bagüjt laax.

²⁹ Abi' badxi' Bëdan në gra ree apóstoles guin, rëb reeman:

—Rayal yazooban xtiidx Dios luar yazooban xtiidx ree bénguidxliuj. ³⁰ XDios dux béngulal ree basban Jesús, bën bacaadi loj crüzj. ³¹ Abi' nünj Dios laaman bën zojbloj, nabe'caman laaman xladbeeman, laaman naj bën rniabee rabëë tëëman bejn ree loj xtol reeman, abi' zian guxhalaman nejz par ree bën Israel din cwëeladx xtol reeman yadxi' tëë loj reeman loj Dios din güünman laa reeman

perdon. ³² Dunujn në xSprijt Dios bén rudëëman loj ree bén ruzoob xtiidxaman, rayagbeen guial gra ree ni guin naj diidxli.

³³ Chi biguiejn ree guxtis guin ni rëb reeman, dád balen reeman abi' guyën reeman nugüjt reeman laa reeman. ³⁴ Per loj ree guxtis guin no'ch tijb bénfarisew laman Gamaliel, najman mextr rulüü ley abi' graczi ree bejn rajp laaman respejt. Guzuliman abi' gunabeeman barii ree apóstoles guin xchu tibrajt. ³⁵ Dxel rëbaman loj ree guxtis guin:

—Bén Israel, gol been xgab xhienin güünnëdi bén guin ree. ³⁶ Gol basaaladx, guyu tijb xin brii laj Teudas, rëbix yu' chu najx abi' cost tajp gayuu ree bejn binal laax. Per chi bagüjt ree bejn laax, bire'ch gra ree bén binal laax, yagaj gulox gra ni beenx. ³⁷ Abi' tée lën ree dxej gunabee gobiarn biab ree bejn, guyu tijb xin brii laj Judas, gojquix xin Galilea, ziangajc dád zien ree bejn binal laax. Per chi bagüjt ree bejn laax, gra ree bén binal laax bire'ch. ³⁸ Zeel rnin lojdi, ad bal chu'ridi con ree bén guin, gol baslaa reeman. Din bal bénguidxliuj rniabee ni rüjn reeman, zadxin dxej loxan. ³⁹ Per bal por Dios cayüjn reeman ni guin ree, ad zajct gutëedi loj ni cayüjn reeman. Gol gojp cudad ad niad chi gaqbeedi contr Diosan za'di.

⁴⁰ Beencwent ree guxtis guin xtiidx Gamaliel, dxel gurejdx reeman apóstoles guin ree, gudijn reeman laa reeman abi' rëb reeman loj reeman ad guitie'chri reeman xtiidx Jesús, dxel baslaa reeman laa reeman zia reeman. ⁴¹ Per laa reeman dád nix yu' luxdoo reeman barii reeman lod za'

ree guxtis guin guial baslaa Dios guzagdiaj reeman por Jesús. ⁴² Abi' ad rucwëézt rulüü reeman rniee tëë reeman xtiidx Jesús, gra dxejczy rulüü reeman lën yadooro' Jerusalén nëtëë lidx lidx ree bejn.

6

Bibee gajdx ree bén güün yudar

¹ Lën ree dxej zii chi canuu cayajcxhiey ree bén rliladx Jesús, guzuloj cabe'c ree bén rniee diidx grieg xguialquia ree bén rniee diidx hebreo, rëb reeman guial gra dxejczy chi rië's ni raw ree béngunaa bizëjb, ta'ndoon rtia' ree bén rniee diidx grieg guial loj ree bén rniee diidx hebreo.

² Dxel guidxibtio'p ree apóstoles guin bato'p reeman graczi ree bén rliladx Jesucrist, abi' rëb reeman:

—Ad zagdxet naj guial yacwëéz yalüün xtiidx Dios par yadi'san ni gaw ree bejn. ³ Zeel yanan lëjt compniar raliduladx ree Jesucrist, gol gudiil entr lojdi gajdx ree bén ragbeedi naban zi'c rayal, bén yu' xSprijt Dios luxdoo, bén yu' tëë ree xquiar-guiejn, din yazuj reeman güün reeman dxiin guin.

⁴ Guiáad dunujn yasnuu yarejdx yanaaban Dios, yalüü tëën xtiidxaman.

⁵ Graczi reeman cwëjb ni rëb reeman, abi' gulej reeman bén la Esteban, laaman rliladx Jesucrist guidib luxdooan, rniabee tëë xSprijt Dios luxdooan guidiblagaa. Gulej tëë reeman Felip, Prócoro, Nicanor, Timón, Parmenas në Nicolás bén zëéd Antioquía, nëman bililadx ni rliladx ree bén Israel chi gadaman chililadx Jesucrist. ⁶ Dxel binë reeman laa reeman loj ree apóstoles guin,

persi gurejdx gunab reeman Dios por laa reeman badxiib tée yaa reeman guijc reeman.

⁷ Canuu care'ch xtiidx Dios, abi' Jerusalén caya-jcxhiey ree bén rililadx Jesucrist, në zien ree bix-hioz Israel bililadx laaman.

Biniaaz Esteban

⁸ Dád gognë Dios Esteban badëë téeëman guialr-niabee persi rüjnman zien loj milagr delante loj ree bejn. ⁹ Abi' bëlzi ree bén yadoo ni la Libertados në ree bén Cirene con ree bén Alejandría con ree bén niz Cilicia nëtëë ree bén zëed niz Asia, guzuloj cadildiidxnë reeman Esteban, ¹⁰ per ad gojct nadxi' reeman xtiidxaman guial cayagnë xSprijt Dios laaman. ¹¹ Dxel gudijx reeman bëlzi ree bejn din guiëb reeman, bacaagdiajg reeman rniee Esteban contr Dios në contr Moisejs. ¹² Zian been reeman persi bidxe'ch ree bén luguiedx guin, në ree bengol në ree mextr rulüü ley. Dxel gunaaz reeman Esteban, binë reeman laaman loj guxtis. ¹³ Gudiil tée reeman bén basquiee ree persi rëb reeman loj ree guxtis guin:

—Ad rucwëëzt rnieeguijdx xin guie xley Moisejs në xyadoo Dios. ¹⁴ Dunujn ma bacaagdiajg rëbix guial Jesús xin Nazaret guse'nx dux yadooro' ree, guchaa téeëx costumbr basa'n Moisejs du loj ree.

¹⁵ Abi' guxtis guin ree në gra ree bén riga' yagaj, chi baguiaa reeman loj Esteban, baguiaa reeman najn zi'c tijb loj anjl.

7

Ni rëb Esteban loj ree guxtis

¹ Dxel bixhioz mazri zojbloj rniabee graczi ree bixhioz, gunabdiidxaman loj Esteban, rëbaman:

—¿Walín ya rëbil zian?

² Badxi' Esteban laan, rëbaman:

—Dad guxtis, në lëjt compniar, gol bacaagdi-ajg ni ganin. Dios bén yu' xanyabaa balüüloj loj dux béngulal ree Abraham, chi gureman niz Mesopotamia chi gadaman chisob guiedx Harán.

³ Abi' rëb Dios lojman: “Basa'n ladxil në gra ree lasa'l, wej loj yuj ni gulün lüj.” ⁴ Dxel brii Abraham ladx ree bén Caldea bisobaman Harán. Chi güt xDadaman, dxel bidnë Dios Abraham loj guidxliuj

guie lod nadxu' ree yan. ⁵ Per chi bi't Abraham guie, achetczi guidxliuj badëed Dios lojman, ni'czi tibda'nan ad badëëtaman. Per beenman promejs loj Abraham guial gudëëman guidxliuj guie loj-

man, dxel chi guiëtaman tia' ree xdiaaman laan, majsi chi rëb Dios zian, ad wayut xi'n Abraham.

⁶ Rëb tëë Dios lojman guial xdiaaman chisob zi'c ree benzit nacion ren, lod gugüjn da't reeman laa reeman dxiin gusagzi tëë reeman laa reeman loj tajp gayuu ijz. ⁷ Per rëb tëë Dios lojman: “Gudëdan

gra ree bén gusagzi laa reeman casti, gac xchej yarii reeman yagaj abi' guie güün reeman sirv lon zi'c rayal.” ⁸ Chi guneenë Dios Abraham, baya'n reeman diidx guial rayal chu' gra ree xinguaaw sen. Zeel chi gol Isaac xi'n Abraham, gojc xhujn dxej, dxel badxe'man laax sen. Ziangajc beennë Isaac xi'nman Jacob, ziangajc beennë Jacob guidx-

iptio'p ree xi'nman, bén goc ree dux béngulal ree.

⁹ Bén goc ree dux béngulal ree gudëdloj reeman Xiëb bén naj bijch reeman, abi' bato' reeman laa-

man loj ree bén zë Egipto, per ad guro'nladxt

Dios laaman, ¹⁰ gognëman laaman loj ni guzagdiajman badëë tëëman xquiargueijnman, gognë tëëman laaman persi biajb rey guin laaman zagdxe, abi' beenman laaman gobernador Egipto, bazuj tëëman laaman din nabeeman gra ni rajp rey guin.

¹¹ 'Chi guyu gubijn guidibczi Egipto në niz Canaán, dxel guzagdiaj da't ree dux béngulal ree guial achet ni gaw reeman. ¹² Per chi gogbee Jacob guial yu' trigo Egipto, guxhaal ree xi'nman bën naj dux béngulal ree, dxel wej reeman Egipto. ¹³ Chi barojp volt wej reeman, rëb Xiëb guial laaman naj bijch reeman, dxel gogbee rey Egipto xhie diaa zëëdaman. ¹⁴ Dxel rëb Xiëb loj ree bijchaman din chigxii reeman xDadaman në gra ree lasa'man din chisob reeman Egipto. Gojc reeman gayojnchiin bejn. ¹⁵ Zianan zeel bisob Jacob Egipto, ni gütaman ni gajc güt ree xi'nman, dux béngulal ree. ¹⁶ Gojc xchej dxel bignë reeman xdxijt ree dux béngulal ree guiedx Siquem, persi biguie'ch reen lën baa guzii Abraham loj ree xi'n Hamor.

¹⁷ 'Chi ma zidyob tiamp gac ni rëb Dios loj Abraham, zien ree bën Israel ma gojcxhiey Egipto. ¹⁸ Abi' guzuloj gunabee rey ren Egipto, bën ad beenbeet Xiëb. ¹⁹ Rey zii basagzi bën du ladx ree, gunabeeman chigsëëb reeman xindo niguiaaw golnejz ree din guiët reex. ²⁰ Abi' tiamp zii gojl Moisejs, tijb xindo bayuladx Dios. Gunaj ree xdadix laax choon bëëw. ²¹ Chi bidxin dxej bigsa'n reeman laax lod bigsëëb reeman laax, xi'n gajc rey guin baca' laax, persi baslaaman laax zi'c xi'nman. ²² Basiid Moisejs gra ni rajc ree bën

Egipto, abi' lasajc ni guneex ni been tēëx.

²³ 'Chi guyu Moisejs tiuu ijz, bidyajb guijcaman bignaj lasa' bén Israelaman. ²⁴ Abi' chi baguiaaman caguin tijb bén Egipto tijb bén Israel, balajman laaman, bagüjtaman bén Egipto guin. ²⁵ Naladx Moisejs niagbee ree bén Israel guial por laaman yabëë Dios laa reeman loj ree bén Egipto, per ad gogbeet reeman. ²⁶ Chi bareguiaal, bidxaagloj Moisejs tio'p ree bén Israel caga'p reeman, abi' guyënman nabe'cdxeman laa reeman, rëbaman: “¿Chexc zeel rdilidi? Awa bén Israel naj gropidi.” ²⁷ Abi' bén caguin bén zatijb guin bacadxaaman Moisejs, rëbaman: “¿Chu bazuj lüj din nabeel dunujn, din na tēël ni rayal yaguieenan? ²⁸ ¿Wen rën l ya gugüjtil naj zi'c bagüjtil bén Egipto ni nieey?” ²⁹ Chi biguiejn Moisejs ni rëb bén guin, baxüünman wejman niz Madián. Ni gureman zi'c benzit, abi' cwa'man béngunaa, zianz guyu tio'p ree xi'ngaanman.

³⁰ 'Chi gudëd tiuu ijz, dxel balüüloj tijb xi anjl Dios loj Moisejs loj xbajl tijb yag ni cayazbajl lod naj yujbidx, gajxh guia' la Sinaí. ³¹ Dád badxa loj Moisejs guial baguiaaman bajl guin. Abi' chi bibigaman din guguiaaman laan mazri zagdxë, biguiejnman cha' Dios rëbaman lojman: ³² “Naj naj xDios xbéngulal reel, Abraham, Isaac në Jacob.” Dxel guzuloj canij Moisejs guial bidxebaman, ad bayaxtaman nuguiaaman bajl guin. ³³ Dxel rëb Dios lojman: “Gulëë xgurëchil, din nagle' lod za'l. ³⁴ Naj cuguia xhienaag cazagdiaj ree da bejnan Egipto, rigujenjan roon reeman zeel biguia'tan din yabën laa reeman. Yan, guda din gaxhalan lüj

Egipto.”

³⁵ 'Abi' majsi ad guyënt ree bén Israel nuzoob reeman xtiidx Moisejs yaloj, rëb reeman lojman: “¿Chu bazuj lüj din nabeel dunujn na tēel ni yaguieenan?” Per por anjl balüüloj loj bajl guin, badëed Dios guialrniabee lojman, abi' guxhaalaman laaman din güünman laa reeman yudar yarii reeman Egipto, zi'c rëb anjl balüüloj lojman loj yag caye'c. ³⁶ Moisejs guin naj bén babëe dux béngulal ree Egipto, been tēeman milagr ree niz Egipto, nē niz ro' nijsdoo ni la Nijs Xnia, nē loj yujbidx lod guzu reeman tiu ijz. ³⁷ Laagajc tēeman rëb loj ree bén Israel: “Loj gajquidi cwe Dios tijb bén gudëed xtiidxaman loj ree bejn zi'c guleman naj. Gol bazoob xtiidxaman.” ³⁸ Dxel chi guzunë Moisejs dux béngulal ree niz loj yujbidx, laaman naj bén guneenë xi anjl Dios ruguia' la Sinaí, persi badëeman xtiidx Dios loj reeman, abi' diidx guin ree naj ni basa'n reeman duloj ree yan.

³⁹ 'Per dux béngulal ree ad bazoobt reeman xtiidx Moisejs. Ad guyënt reeman niniabeeman laa reeman, tib guyuguijczy reeman nayejc reeman Egipto. ⁴⁰ Dxel rëb reeman loj Aarón: “Been dios ree, din ned reeman du loj ree, din ad rayagbeet ree gonczy Moisejs bén babëe dunuj ree Egipto.” ⁴¹ Dxel been reeman tijb go'ndobëz din gaquib xdios reeman. Bagüjt reeman be ree persi badëed reeman laa reeb zi'c gon loj ni been reeman, been reeman lanij guial babaanë reeman ni been gajc reeman. ⁴² Dxel guro'nladx Dios laa reeman, baslaaman guyën reeman gubijdx con bëew con bajl yu' ree xanyabaa. Din zian ca loj xtiidx Dios

ni bacaa ree b́en badēed xtiidxaman loj ree bejn, lod rēb:

B́en Israel, loj tiuu ijz ni guzudi loj yujbidx, ¿wen bagüjtidi be ree ya din guneedi laa reeb lon zi'c gon?

⁴³ Per mazri guyēndi xdxandi Moloc b́iaa tēēdi lidxan,

nē xbajl dxan Refán, dxan been gajquidi din guzuxibidi loj reen.

Zeel gaxhalan lējt mazri zijt guial Babilonia.

⁴⁴ 'Abi' chi guzu ree dux b́engulal ree loj yujbidx, gojp reeman tijb yu been laa reeman sirv zi'c yadoo, lod guyuchaaw ree guiaj ni ca xley Dios. Been reeman yadoo guin zi'c gunabee Dios Moisejs, chi rēbaman lojman guial güünman laan zi'c ma baguiaaman. ⁴⁵ Chi güt Moisejs, baya'nnē ree dux b́engulal ree yadoo guin. Chi baya'n Josué xluar Moisejs, dxel bidnē reeman yadoo guin chi gudil reeman guijc guidxliuj con ree b́en ren, abi' gognē Dios laa reeman persi been reeman gan baya'nnē reeman guidxliuj guin ree. Zian guzunē reeman yadoo guin xt bidxin dxej guzuloj gunabee rey Davi. ⁴⁶ Guyēn Dios rey Davi, abi' laaman guyēnman nūjnman tijb yadoo par Dios, b́en naj dux Dios ree nayajc ree b́en Israel. ⁴⁷ Per rey Salomón naj b́en been laan, ⁴⁸ majsi Dios b́en yu' xanyabaa ad rbejtaman lēn yadoo ni rüjn ree bejn, zi'c rēb b́en badēed xtiidx Dios loj ree bejn diizd gocli, chi rēbaman:

⁴⁹⁻⁵⁰ Xanyabaa naj lod zooban par ganabeen,

guiáad loj guidxliuj naj lod ruzu guia'n.

¿Xhienaag gac yu güündi par naj?

¿O xhienaag naj lod yaziiladxan?

¿Id naj ben graczi ree ni guie ya?, rëb Dios.

⁵¹ Per lëjt —rëb Esteban —dád nadidi, ad rëntidi guzoobidi xtiidx Dios, ad rën tëetidi chignia'di, zianczi za'di contr xSprijt Dios, zi'cgajc been ree xbéngulalidi. ⁵² ¿Chu bën badëed xtiidx Dios loj ree bejn ad beennaat ree xbéngulalidi? Xt bagüjt reeman bën badëed ree xtiidx Dios bën rëb ree guial gui't tijb bën naya nali. Abi' yan ma bi'taman, bayüdi laaman loj ree bën rniabee, gunabee tëedi güjtaman. ⁵³ Majsí cwa'di xley Dios loj ree xi anjla-man, per ad rüjntidi zi'c rëb loj ley guin.

Bagüjt reeman Esteban

⁵⁴ Chi biguiejn reeman ni rëb Esteban, xt raw lay reeman tant balen reeman laaman. ⁵⁵ Per guial yu' xSprijt Dios luxdoo Esteban, chi gules lojman xanyabaa, dxel baguiaaman xbiani Dios baguiaa tëëman Jesús za'man xladbee Dios. ⁵⁶ Dxel rëb Esteban:

—¡Gol baguiaa! Ruguian naxal xanyabaa, ruguia tëën Bén guxhaal Dios za'man xladbee Dios.

⁵⁷ Per chi biguiejn reeman zian, bata'cw guidi-ajg reeman, dxel gurixdiaj reeman zignaaaz reeman Esteban, ⁵⁸ babëë reeman laaman loj ciuda guin, bicüjt reeman laaman con guiaj, guiáad xab reeman basa'nsii reeman loj xinguiag la Saulo persi canajxan. ⁵⁹ La'tgaj cucaaguaiaj reeman Esteban, rëbaman:

—Dad Jesús, baca' da sprijtan.

⁶⁰ Dxel bazuxibaman guridxa'man rejs, rëbaman:

—Dad Jesús, ad güüncwentil dol cayüjn ree bën guin yan.

Naabczi gulox rëbaman zian, laa güt gajcaman.

8

Guzunal Saulo bén rlliladx ree Jesucrist

¹ Baya'n Saulo conform guial bagüjt reeman Esteban. Abi' dxej zii gajc guzuloj rzunal reeman bén Jerusalén ree bén rlliladx ree Jesucrist, dxel bire'ch reeman guidib niz Judea në niz Samaria, bén najzi ree apóstoles baya'n. ² Guyu bëlzi ree xinza'c, laa reex biquie'ch Esteban, abi' dád biin reex guijcaman. ³ Guiáad Saulo rzunalaman bén rlliladx ree Jesucrist, ruman yu yu din cwëë naguiejnman laa reeman, zi'c xinguiiaaw zi'c béngunaa, persi rgu'man laa reeman ladxguiib.

Bacaagdiajg ree bén Samaria xtiidx Dios

⁴ Per bén brii ree Jerusalén, lod zëtzi reeman rtie'ch reeman xtiidx Dios. ⁵ Zi'c been Felip, wejman guiedx Samaria, guzuloj caneeman xtiidx Jesucrist loj ree bejn. ⁶ Dád zien ree bejn rdo'p, graczi reeman rucaagdiajg chaaw ni rëb Felip, ruguiaa tëë reeman milagr ree ni rüjnman. ⁷ Zien ree bén nëjt tib lajt xcuerp bayüjn Felip, në ree bén ad rzat zagdx, bayüjn tëëman bén yu' ree xindxab luxdoo abi' rbixdiaj reex rarii reex. ⁸ Zianan zeel babaa da't ree bén luguiedx zii.

⁹ Per luguiedx zii guyu tijb bén brii laj Simón, dizd gocli rüjnman guialbidxaa persi rusquieeman bén Samaria ree, rüjnman bén lasajc. ¹⁰ Graczi reeman rucaagdiajg chaaw ni rëbaman, diizd mazri ree xinguiag xt mazri ree bengol, abi' rëb reeman:

—Naroob naj xguialrniabee Dios ni rajp bén guie.

¹¹ Bidxga' reeman laaman guial ma gojc xchej cusquieeman laa reeman con guialbidxaa ni rüjnman. ¹² Per chi bililadx reeman ni rëb Felip xcwent xguialrniabee Dios në xcwent Jesucrist, zi'c ree xinguaaaw zi'c ree béngunaa gurobnijs reeman. ¹³ Xt në Simón bililadx gurobnijs tääman, abi' ad riro'nladxtaman Felip radxa tää lojman graloj ree milagr ruguaaman rüjn Felip.

¹⁴ Chi gogbee ree apóstoles riga' Jerusalén guial ma bililadx ree bën Samaria xtiidx Dios, dxel guxhaal reeman Béd con Waj ni. ¹⁵ Chi bidxin reeman, gurejdx gunab reeman Dios por ree bën Samaria bën ma rililadx ree xtiidx Dios din chu' xSprijt Dios luxdoo reeman, ¹⁶ din ni'qui tijb reeman ad wayut Sprijt guin luxdoo, gurobnijsi reeman por Dad Jesús. ¹⁷ Dxel guxhoob yaa ree Béd con Waj guijc reeman, abi' guyu xSprijt Dios luxdoo reeman.

¹⁸ Chi baguiaa Simón cayu xSprijt Dios luxdoo ree bën guin guial caxhoob yaa ree apóstoles guin guijc reeman, dxel guyënman nudëëman milia loj reeman, ¹⁹ rëbaman:

—Në lon gol banee guialrniabee guin din chi gaxhob yan chutëëz guijc bënan, në luxdooman chu' xSprijt Dios.

²⁰ Dxel badxi' Béd xtiidxaman rëbaman:

—Nítil con guidib xmilial, din rüjnl xgab guial zajc siil guialrniabee razaladx Dios. ²¹ Ad rayalt ad zajc tää güünl zi'c raguieenan, din ni'quid zinartil xnejz Dios. ²² Bayüjn xgab por ni mal beenl, gurejdx gunab tää Dios, rupent güünman lüj perdon por ree xixgabmalil, ²³ din ragbeen ganax guialralen yu' luxdool, abi' dol guin naj ni rniabee lüj.

²⁴ Dxel badxi' Simón xtiidxaman, rëbaman:

—Gol gurejdx gunab Dios por naj, chitëë gaza'can ni'qui tijb ni ma nadi.

²⁵ Chi gulox gunee ree apóstoles guin xtiidx Dios loj ree bén guin, dxel badxin reeman Jerusalén, abi' graczi ree guiedx riga' niz Samaria lod gudëd reeman gutie'ch reeman xtiidxza'c Jesucrist.

Felip con bén Etiopía

²⁶ Chi ma gudëd gojc zian, gunee tijb xi anjl Dios Felip rëbaman:

—Wej niz sur nejz ni zë Jerusalén xt lod la Gaza, niz lod naj ganax yujbidx.

²⁷ Dxel brii Felip zëman. Runejz guin banaazaman tijb bén Etiopía, najman bén zojbloj guial laaman rgu'chaaw xmilia Candace, bén naj reina Etiopía. Wejman Jerusalén bignajchi'man Dios, ²⁸ abi' ma bayunejzaman zia ladxaman, zojb lën xcarrejt zagdxeman, roolaman loj gui'ch ni bacaa Isaías, bén badëëd xtiidx Dios loj ree bejn. ²⁹ Dxel rëb xSprijt Dios loj Felip:

—Bibig gajxh cwë' carrejt guin.

³⁰ Chi bibigaman, biguiejnman cayool bén guin loj gui'ch bacaa Isaías. Dxel gunabdiidxaman lojman rëbaman:

—Dad, ¿rignia'l ni cayoolil ya?

³¹ Badxi' bén guinan rëbaman:

—¿Xoza chignia'nan? Awa achut gusignia' naj.

Dxel rëbaman loj Felip din chë'paman loj carrejt guin, cweman cwë'man.

³² Loj xtiidx Dios lod cayool bén guin rëban:

Zi'c rinë reeman tijb xiil,
binë reeman laaman lod gugüjt reeman laaman.
Abi' achet rëbaman,

zi'c tijb xiil ma za' loj ree b́en gugaj guidxladib.

³³ Chi beenné reeman laaman zi'ctzi ŕen reeman, achut been guialguxtis por laaman.

Yan achut guza't xdiaaman,

din ma bisüd reeman laaman loj guidxliuj.

³⁴ Rēb b́en guin loj Felip:

—Guna sii, ¿chu xcwent rníee b́en bacaa diidx guie ree? ¿Xcwent gajcaman ya o xcwent ben renan?

³⁵ Dxel guzuloj Felip cusignia'man laaman xti-idx Dios ni cayoolaman, zian beman xtiidxza'c Jesucrist lojman. ³⁶ Abi' chi gudéd reeman lod yu' nijs, dxel rēb b́en guin loj Felip:

—Guie yu' nijs. ¿Nid zajc garobnijsan guie ya?

³⁷ Zeel rēb Felip lojman:

—Bal rliladxil guidib luxdool, zajcan.

Badxi' b́en guinan rēbaman:

—Rliladxan guial Jesucrist naj Xi'n Dios.

³⁸ Dxel gunabeeman guzudxe xcarrejtaman. Abi' baguiajt grop reeman, dxel guyu reeman lojnijs guin persi baroobnijs Felip laaman. ³⁹ Chi barii reeman lojnijs guin, loj hor zii gajc gunidloj Felip biné xSprijt Dios laaman, abi' ad baguiaatri b́en guin laaman, per dád rabaaman zinal xnejzaman. ⁴⁰ Chi gogbee Felip, ma za'man xt guiedx Azoto, dxel zéman guiedx guiedx zigtie'chaman xtiidxza'c Jesucrist xt bidxinman Cesarea.

9

*Bililadx Saulo Dad Jesucrist
(Hch. 22:6-16; 26:12-18)*

¹ Guiáad Saulo ad rucwëézt rdxe'chaman b́en rliiladx ree Jesucrist, rēbaman gugūjtaman laa reeman. Zeel wejman bigneenēman bixhioz mazri zobjloj rniabee graczi ree bixhioz, ² din gac tijb gui'ch din gac cheman lēn ree yadoo Damasco chigdiilaman b́en rliiladx ree Jesucrist, zi'c ree xinguaaw zi'c ree b́engunaa, din chignēman laa reeman ladxguiib Jerusalén. ³ Per chi ma cadxinman gajxh guiedx Damasco, dxejlczi brii tijb gui xanyabaa balaan bacha' lod zēman. ⁴ Abi' bireeyujman, chi naga'man luyuj guin biguiejnman cha' b́en rēb:

—Saulo, Saulo, ¿chexc zeel rzunalil naj?

⁵ Abi' gunabdiidxaman rēbaman:

—¿Chu lūj, Dad?

Badxi'man laan rēbaman:

—Naj naj Jesús b́en rzunalil. Per ganin lūj, lūj gajc rguuil xguialnaal zi'c rūjn tijb go'n rudxegua' loj yag ni rulaagnē reeman laab.

⁶ Rnij Saulo guial tant bidxebaman, abi' rēbaman:

—Dad, ¿xhie rēnl gūnan?

Dxel rēb Dad Jesucrist lojman:

—Bixche, wej guiedx Damasco, ni na reeman ni rayal gūnl.

⁷ Abi' ree b́en nē Saulo dád bidxeb reeman guial biguiejn reeman cha' bejn, per achutczi baguiaa reeman. ⁸ Chi bixcheman luyuj guin, baxhal lojman, ad rajctri ruguiaaman. Dxel gunaaaz reeman yaaman bignē reeman laaman Damasco. ⁹ Ni guzuman choon dxej, ad rajct ruguiaaman, achetczi rawaman ache tēētczi rē'man.

¹⁰ Damasco gure tijb b́en rliadx Dad Jesucrist, b́rii lajman Ananías. Balüüloj Jesucrist lojman, rëbaman:

—¡Ananías!

Badxi'man laan rëbaman:

—Laa naj guie Dad.

¹¹ Dxel rëb Jesucrist lojman:

—Bisu, wej call ni la nali. Chi guidxinl lidx Judas, gunabdiidx por tijb xin zëed Tarso, lax Saulo. Din laax cabejdx canab naj, ¹²abi' zi'c rulüü cane'xhchaalix, baguiaax guyu tijb b́en la Ananías guxhoob yaaman guijquix persi baguiaax stijb.

¹³ Chi biguien Ananías zian, dxel rëbaman:

—Dad, zien da't ree bejn ruza't xin zii, në ree ni mal rüjnnëx b́en rliadx ree lüj Jerusalén. ¹⁴Yan zëedix guie con xguialrniabee ree bixhioz rniabee ree bixhioz, din guiniaazix gra ree b́en rliadx lüj.

¹⁵ Dxel rëb Jesucrist lojman:

—Wej, din naj gule laax din chiguiex da diidxan loj ree b́en ad najt b́en Israel, në loj ree rey, con nëgajc loj ree b́en Israel. ¹⁶Guiën lojx guial sagdiaj da'tix guial najx da bejnan.

¹⁷ Dxel zë Ananías lënü lod za' Saulo. Chi guyu-man, guxhoob yaaman guijcaman, rëbaman:

—Bijch Saulo, Dad Jesús b́en balüüloj lojl runejz lod zëedil, laaman guxhaal naj din yaguaaal, chu' tëë xSprijt Dios luxdool.

¹⁸ Loj hor gajc zi'c rulüü yu' xhie biquied guiaalojman abi' baguiaaman stijb. Dxel guzuliman gurobnijnsaman, ¹⁹gudaw tëëman persi bayu-man gojl. Dxel guzujman Damasco tio'p choon dxej con ree b́en rliadx Jesucrist.

Gunee Saulo xtiidx Dios Damasco

²⁰ Dxel guzuloj gunee Saulo xtiidx Dios lèn ree yadoo, rëbaman guial Jesucrist naj Xi'n Dios.

²¹ Graczi ree bën biguien ni rëbaman badxa loj reeman abi' rëb reeman:

—¿Nid bën guien rzunal bën rliladx ree Jesucrist Jerusalén ya? ¿Nid laagajcaman zëed guie ya, din guiniaazaman bën rliladx ree Jesucrist chignë tëëman laa reeman loj ree bixhioz rniabee ree bixhioz?

²² Per Saulo guixie guixie mazri cariiman guial-rdxeb rnieeman xtiidx Dios, rulüüman guial Jesús naj Cristo, din yabëëman bejn ree loj dol. Xt ragdxa ree bën Israel zojb ree Damasco chi rucaagdiajg reeman ni rëbaman.

Baxüün Saulo guiedx Damasco

²³ Ad xchejt gojc, baya'n ree bën Israel diidx din nugüjt reeman Saulo, ²⁴ per laa gogbee gajcaman ni rën reeman güün reeman. Dxej guiaal rbëz reeman laaman ro' ree port ni rarii ro' ciuda guin din nugüjt reeman laaman. ²⁵ Per ree bën rliladx Jesucrist, guxhin badxe' reeman laaman lèn dxüm naroo, abi' gulet reeman laaman niz xijch ze' nusiaaw ciuda guin, zian baxüünman Damasco.

Badxin Saulo Jerusalén

²⁶ Chi badxin Saulo Jerusalén, guyënman nuchajgaman bën rliladx ree Jesucrist, per graczi reeman bidxeb laaman guial ad rliladxt reeman nëman ma rliladx Jesucrist. ²⁷ Dxel binë Bernabé laaman loj ree apóstoles guin, bagojnman guial baguiaa Saulo dux Dad ree Jesucrist, guneenë tëëman laaman chi zëman Damasco, bagojn tëëman

guial Damasco gunee Saulo xtiidx Jesucrist sin guialrdxeb. ²⁸ Zian baya'n Saulo Jerusalén abi' nayuman laa reeman. ²⁹ Ad rdxebtaman ruza'taman Dad Jesús, abi' xt gudijldiidxnēman bēn Israel rniee ree diidx grieg, per guyēn reeman nugūjt reeman laaman. ³⁰ Chi gogbee ree bēn rliladx Jesucrist zian, binē reeman laaman guiedx Cesarea. Yagaj baxhaal reeman laaman guiedx Tarso.

³¹ Dxel babedxe luxdoo ree bēn rliladx Jesucrist, bēn zojb ree niz Judea nē niz Galilea nētēē niz Samaria, chigagaj beenbee reeman mazri xhien-aag naj xnejz Dios, bazoob tēē reeman xtiidxaman, abi' cayagnē xSprijt Dios cayajcxhiey reeman.

Bayajc Eneas

³² Chi biza Bēd bitixlojman bēn rliladx ree Jesucrist, dxel wej gajcaman bitixlojman bēn rliladx ree Jesucrist guiedx Lida. ³³ Ni bidxaaglojman tijb xinguaaaw la Eneas. Ma gojc xhujn ijz naga'x, ragxuux, ad rajct rzax. ³⁴ Abi' rēb Bēd lojx:

—Eneas, ma bayūjn Jesucrist lūj. Bixche, bales ni go'til loj.

Loj hor zii gajc bixchex. ³⁵ Chi baguiaa gra ree bēn zojb guiedx Lida nē ree bēn zojb niz Sarón guial ma bayajc Eneas, dxel nē reeman bililadx Jesucrist.

Baban Dorcas

³⁶ Loj tiamp zii guyu tijb bēngunaa rliladx Jesucrist luguiedx Jope, laman Tabita, diidx grieg laman Dorcas. Laaman been ni za'c ree, been tēēman yudar bēnprob ree. ³⁷ Lēn ree dxej zii

gogxuu Dorcas abi' güjtaman. Chi gulox bagajz reeman laaman, dxel bitixh reeman laaman lēnü ladya. ³⁸Abi' gajxh guiedx Jope raya'n guiedx Lida lod za' Bēd. Chi gogbee ree bēn rlliladx Jesucrist guial za'man ni, guxhaal reeman tio'p ree xinguaaw bisajc reex Bēd liaadx, rēb reex:

—Been wen yo' ree Jope yan gajczi.

³⁹Laa zinē gajcaman laa reex. Chi bidxinman, binē reeman laaman lēnü lod naga' xcuerp Dorcas. Ni riga' zien ree bēngunaa bizējb roon reeman, abi' bibig reeman loj Bēd culüü reeman gra lajd ni been Dorcas chi sta nabanman. ⁴⁰Dxel gunabee Bēd barii gra reeman, abi' bazuxibaman gurejdx gunabaman Dios. Dxel baguiaaman bengüt guin, rēbaman:

—¡Tabita, bixche!

Laa guxhal gajc lojman. Chi baguiaaman Bēd, gureliman, ⁴¹dxel gunaaz Bēd yaaman persi guzuliman. Abi' gurejdxaman bēn rlliladx ree Jesucrist con ree bēn bizējb guin, persi baguiaa reeman guial ma baban Dorcas. ⁴²Guidibczi guiedx Jope gogbee reeman ni goc, abi' zien da't reeman bililadx Jesucrist por zian. ⁴³Guiáad Bēd baya'nman mazri dxej luguiedx guin, lidx Simón bēn rüjnchaaw guid.

10

Wej Bēd lidx Cornel

¹Luguiedx Cesarea gurej tijb bēn brii laj Cornel. Laaman goc suldad gunabee tibcwaa ree suldad brii laj Italiano. ²Gojcaman benza'c, laaman nē gra ree bēn zojb lidxaman guyēn reeman Dios, abi' dád beenman yudar bēn Israel ree, bēn naj

ree b́enprob, nē zianczi rbejdx rniabaman Dios. ³Tijb dxej cost raca choon wadxe, guzajcaman zi'c rulüü cane'xhchaalaman. Zagdxeczi baguiaaman guyu tijb xi anjl Dios lēnū lod za'man, abi' rēb anjl guin lojman:

—¡Cornel!

⁴Baguiaaman loj anjl guin, abi' dád bidxebaman, rēbaman:

—¿Xhienin, Dad?

Abi' rēb anjl guin:

—Ma biguejn Dios xtiidxil ma baguiaa tēēman xhienaag rüjnl yudar b́enprob ree. ⁵Guxhaal ree b́en che luguiedx Jope din chica' reeman Simón, b́en la gajc Béd. ⁶Zojbaman lidx tijb b́en la gajc Simón, b́en rüjnchaaw guid, b́en zojb gajxh ro' nijsdoo. Béd guin na ni rayal güünl.

⁷Chi zia anjl gunee Cornel, gurejdxaman tio'p ree xmojsaman, zatijb suldad rajpaman confians rililadx tēēman Dios. ⁸Gulox beman diidx loj reeman ni guzacaman, dxel guxhaalaman laa reeman Jope.

⁹Chi bareguiaal, la'tgaj cadxin reeman gajxh Jope, cost garol dxej wē'p Béd guiyc yu lod zojbaman din cwedx guiniabaman Dios. ¹⁰Dád gulaanman, guyēnman niajwaman, per la'tgaj cayüjn reeman ni gawaman guzajcaman zi'c rulüü cane'xhchaalaman. ¹¹Baguiaaman bixal xanyabaa abi' caguiajt zi'c tijb lajd narooob xt lod za'man, naxii guidap xquinan. ¹²Loj lajd guin yu' gra loj ree be yu' tajp guia', nē ree bēēl, nētēē ree be rzuj. ¹³Dxel biguejnman cha' b́en rēb:

—Béd, bisu, bagüjt be gawil.

¹⁴Per badxi' Béd laan rēbaman:

—Yajqui, Dad. Ad wayawtczan nidxuudx ni ad rayalt gaw bejn.

¹⁵ Abi' rëb cha' bën guin zatijb:

—Ni ma basia Dios ad rnieelan nidxuudx.

¹⁶ Choon volt gojc zian, dxel bayë'p lajd guin xanyabaa stijb. ¹⁷ La'tgaj cayüjn Bëd xgab xhie rën guiëb ni baguiaaman, loj hor zii gajc bidxin ree bën guxhaal Cornel rulidx Simón, guial ma gunabdiidx reeman banguin naj lidxaman. ¹⁸ Chi bidxin reeman, gunabdiidx reeman bal ni zojb Simón bën la gajc Bëd.

¹⁹ Guiáad Bëd sta cayüjnman xgab ni baguiaaman, chi rëb xSprijt Dios lojman:

—Laa choon ree xinguaaw raguiil lüj. ²⁰ Bisu, biguiajt binë reex, ad chu' luxdool tio'p, din naj guxhal laa reex.

²¹ Dxel baguiajt Bëd lod za' ree bën guxhaal Cornel, abi' rëbaman loj reeman:

—Naj naj bën raguiilidi, ¿chexquiza zeel raguiilidi naj?

²² Dxel badxi' reeman laan rëb reeman:

—Guxhaal bën la Cornel dunujn, bën rniabee tibcwaa ree suldad, najman benza'c, rdxebaman Dios, abi' graczi ree bën Israel rën laaman. Tijb xi anjl Dios rëb lojman, guial rayal guixhiaalaman dunujn yudca'n lüj din yo' ree lidxaman, din gucaagdiajgaman ni rayal guiëbil.

²³ Dxel badxe' Bëd laa reeman lënü, ni gudëd reeman guiaal. Chi bareguiaal, binëman laa reeman. Në bëlzi ree bën zojb Jope bën rililadx ree Jesucrist binë laaman.

²⁴ Chi bareguiaal bidxin reeman Cesarea lod zojb Cornel. Abi' bato'p Cornel gra ree lasa'man

në ree xmiwaman, din cwëz reeman guidxin reeman. ²⁵ Chi bidxin Bëd lidx Cornel, laa brii gajc Cornel bigchaaglojman laaman, dxel bazuxibaman loj Bëd persi gojpaman laaman respejt. ²⁶ Per bazuli Bëd laaman, rëbaman:

—Guzuli, din lasa' bejn gajcan lüj.

²⁷ La'tgaj cadxin reeman ruyu guin cayü reeman diidx. Abi' chi guyu reeman, baguiaa Bëd zien da't ree bejn riga' ni. ²⁸ Dxel rëb Bëd loj reeman:

—Ma qui ragbeedi xhienaag naj xley ree bën Israel, guial ad zajct go'ch reeman loj ree bën ad najt bën Israel o chu' reeman lidx reeman. Per ma balüü Dios naj guial achutczu rayal ganen bendxuudx, bën nabixhladx. ²⁹ Zeel chi bidca' reeman naj, laa bial gajcan achet guijc badxiban. Yan rënan gagbeen, ¿chexquiza zeel gurejdxidi naj?

³⁰ Badxi' Cornelan rëbaman:

—Ma gojc tajp dxej cost hor guie gajc, chi zoob lidxan, raca choon wadx, cabedx canaaban Dios, loj hor zii balüüloj tijb bejn lon najcwaman lajd nayni. ³¹ Abi' naman lon: “Cornel, ma biguiejn Dios xtiidxil, yu'guijc tëëman xhienaag rüjnl yudar bënprob ree. ³² Zeel guxhaal ree xin che luguiedx la Jope din chica' reex Simón, bën la gajc Bëd. Zojbaman lidx tijb bën la gajc Simón, bën rüjnchaaw guid, bën zojb gajxh ro'nijsdoo. Bëd guin na ni rayal güünl.” ³³ Zianan zeel laa guxhal gajcan xin bidgadiil ree lüj. Zagdxee beenl bi'til. Abi' yan dugraczan nadxu' delant loj Dios yu' xanyabaa, din yacaagdiajgan gra ni gunabee Dios lüj nal du lojn.

Ni gunee Bëd lidx Cornel

³⁴ Dxel guzuloj canee Béd, rëbaman:

—Ma ragbeen yan guial tiblojzi ruguiaa Dios bejn. ³⁵ Din Dios, chutëez bénguidxliuj ridxga' laaman rüjn tëëman zi'c rayal, nëgajc Dios ridxga' laaman. ³⁶ Dios ma gunee bën Israel ree, ma bagojnman guial por Jesucrist rabadxe luxdoo bejn, bën naj Dad par gra ree bénguidxliuj. ³⁷ Lëjt ragbee xhienaag baza't reeman Jesús diizd niz Galilea xt guidib niz Judea, chi gulox bagojn Waj bejn ree xcwent guialrirobnijs. ³⁸ Ragbee tëëdi guial ma badëë Dios xSprijtaman con xguialrniabeeman loj Jesús bën Nazaret, abi' bizaman biguieenman ni zagdxë, bayünman gra ree bën cazagdiaj por xindxab. Gojc beenman zian guial za'në Dios laaman. ³⁹ Abi' dunujn baguiaa gra ni been Jesús guidib niz Judea, në niz Jerusalén. Dxelri bagüjt reeman laaman, bacaa reeman laaman loj crüjz. ⁴⁰ Per Dios basban laaman ni bayon dxej, abi' cwëjb Dios bidgalüülojman du lojn. ⁴¹ Ad balüülojtaman loj gra ree bejn, tijbzi du lojn nayajcan bën gule Dios diizd yaloj din yaguaan graczi ni beenman. Abi' dunujn badaawnë' laaman badü'në' tëën laaman chi babanman stijb. ⁴² Dxelri guxhaal Jesús dunujn din yatie'chan xtiidxaman loj ree bejn, guial Dios ma gulej laaman din güünman gualguxtis chi guidxin dxej yadëëd gra ree bejn cwent loj Dios, zi'c ree bën naban zi'c ree bën ma güjt. ⁴³ Nëtëë diizd gocli graczi ree bën badëëd xtiidx Dios loj ree bejn, gunee reeman xcwent Jesús, rëb reeman guial graczi ree bën chililadx laaman, gac xtol reeman perdon.

Guyu xSprijt Dios luxdoo ree bën ad najt bën

Israel

⁴⁴ Sta canee Béd, chi guyu xSprijt Dios luxdoo gra ree bén cucaagdiajg ni cayëbaman. ⁴⁵ Dxel bén Israel rliladx ree Jesucrist, bén binë ree Béd, dád badxa loj reeman guial në ree bén ad najt ree bén Israel guyu xSprijt Dios luxdoo, ⁴⁶ guial rigueijn reeman ma rníee ree bén guin graloj ree diidx, abi' ruza't reeman Dios zagdx. ⁴⁷ Dxel rëb Béd loj reeman:

—¿Chu zajc gudxoon tiobnijs ree bén guie, bal ma yu' xSprijt Dios luxdoo reeman zi'cgajc dunuj ree?

⁴⁸ Abi' gunabeeman tiobnijs reeman por Jesucrist. Dxelri guzajc reeman liaadx loj Béd din sunëman laa reeman za tio'p choon dxej mazri.

11*Guyu xSprijt Dios luxdoo ree bén ad najt bén Israel*

¹ Bén naj ree xi apóstoles Jesús con ree bén Judea, bén rliladx ree laaman, gogbee reeman guial në ree bén ad najt bén Israel bililadx xtiidx Dios. ² Abi' chi badxin Béd Jerusalén, bén Israel ma rliladx ree Jesucrist, bén sta zinal ree ley, gudilë reeman Béd.

³ Rëb reeman lojman:

—¿Chexc zeel bichu'l lidx ree bén ad najt bén Israel abi' gudawnël laa reeman?

⁴ Dxel guzuloj cayü Béd diidx diizd guia'xchej xhienaag gojc zeel wejman lidx ree bén guin abi' rëbaman loj reeman:

⁵ —Chi za'n luguiedx Jope, la'tgaj cabedx canaanban Dios, guza'can zi'c rulüü cane'xhchalan. Baguian zi'c tijb lajd narooob naxii guidap xquinan

caguijtan diizd xanyabaa xt lod za'n. ⁶ Chi baguian zagdxe xhie yu' loj lajd guin, baguian bedoxh ree në ree be yu' tajp guia' në ree bëel con ree be rzuj. ⁷ Dxel biguiejnan cha' bejn, naman: “Bëd, guzuli, bagüjt be gawil.” ⁸ Per badxi'nan rën: “Yajqui, Dad, din ad goctczi wayawan nidxuudx, ni ad rayalt gaw bejn.” ⁹ Abi' guneeman diizd xanyabaa stijb, naman: “Ni ma basia Dios, ad rnieelan nidxuudx.” ¹⁰ Choon volt gojc zian, dxel bayë'p gra ni guin xanyabaa. ¹¹ Loj hor zii gajc bi't choon ree xinguaaw lod guren, zëed reex diizd Cesarea, cayguuil reex naj. ¹² Abi' na xSprijt Dios lon guial chinë'n laa reex, ad chu' luxdon tio'p. Në guixo'p ree bën guie bën naj dux compniar ree binë'n. Abi' dugraczan badxu' lidx bën guin. ¹³ Dxel beman diidx du lojn xhienaag balüüloj tijb xi anjl Dios lojman lidxaman, rëb anjl guin lojman: “Guxhaal ree bën che luguiedx Jope din chica' reeman Simón, bën la gajc Bëd, ¹⁴ laaman na xhienaag gac ree xtolil perdon, con gra ree bën zojb lidxil.” ¹⁵ Chi guzuloj canenë'n laa reeman, guyu xSprijt Dios luxdoo reeman zi'cgajc guyuman du luxdoo ree yaloj. ¹⁶ Dxel basaaladxan xtiidx Dad Jesucrist chi naman: “Walican baroobnijs Waj con nijs, per lëjt chu' xSprijt Dios luxdoodi.” ¹⁷ Abi' yan bal ma guxhaal Dios xSprijtaman par laa reeman zi'cgajc guxhaalaman laaman du loj ree chi baliladx ree Dad Jesucrist, ¿chu najn din gudxonan ni rüjn Dios?

¹⁸ Chi biguiejn ree bën guin ni rëb Bëd, dxel achetri rëb reeman lojman abi' baza't reeman Dios zagdxe, rëb reeman:

—¡Ma rayagbee ree yan guial në ree bën ad najt

bén Israel ma balüü Dios guial rayal yayüjn xgab por xtol reeman yadxi' tée loj reeman lojman din gap reeman guialnaban tiblayaa delant lojman!

Bililadx ree bén Antioquía Jesucrist

¹⁹ Chi mal bagüjt ree bejn Esteban, dxel guzuloj rzunal reeman bén rililadx ree Jesucrist persi bire'ch gra ree bén rililadx guin niz Fenicia, niz Chipre në Antioquía. Abi' gutie'ch reeman xtiidxza'c Jesucrist, per ganaxzi loj ree bén Israel. ²⁰ Per loj reeman no'ch bëlzi ree bén Chipre në ree bén Cirene. Laa reeman we luguiedx Antioquía abi' gutie'ch reeman xtiidx Dad Jesucrist loj ree bén ad najt bén Israel. ²¹ Gognë Dios laa reeman, dád zien ree bejn bililadx ni rëb reeman abi' bililadx reeman Jesucrist.

²² Chi gogbee ree bén Jerusalén rililadx Jesucrist ni goc, guxhaal reeman Bernabé xt guiedx Antioquía. ²³ Chi bidxinman ni, dád babaaman chi baguiaaman xhienaag cayagnë Dios bén guin ree. Dxel guneenëman gra reeman din con guidib luxdoo reeman gusnuu chinal reeman xtiidx Jesucrist. ²⁴ Benza'c gojc Bernabé, dád gognë xSprijt Dios laaman abi' bililadxaman Jesucrist con guidib luxdooman. Zeel dád zien ree bejn bililadx Jesucrist.

²⁵ Dxelri wej Bernabé guiedx Tarso bigdiilaman Saulo. ²⁶ Chi badxejlaman laaman, dxel binëman laaman xt Antioquía. Ni guzunë reeman bén rililadx ree Jesucrist tibijz, dád zien ree bejn balüü reeman. Abi' luguiedx Antioquía naj lod gulëelaj reeman bén rililadx ree Jesucrist, cristian.

²⁷ Lën ree dxej zii bëlzi ree bën badëë xtiidx Dios loj ree bejn, guza Jerusalén wej reeman Antioquía. ²⁸ Tijb reeman la Agabo, laaman guzuli loj ree bejn abi' por xSprijt Dios bagojnman guial chu' gubijn guidibczi guidxliuj. Laan gojc loj tiamp gunabee rey Claudio. ²⁹ Abi' ree bën rliladx Jesucrist luguiedx Antioquía, baya'n reeman diidx din guido'p reeman zi'ctzi ni galguzuj gudëed tijb gaj reeman, din gagnë lasa' reeman, bën rliladx ree Jesucrist, bën zojb ree niz Judea. ³⁰ Abi' zian been reeman. Dxel guxhaalnë reeman laan Saulo con Bernabé din gudëed reeman laan loj ree bën rniabee ree bën rliladx Jesucrist niz Judea.

12

Guyu Bëd ladxguiib

¹ Lën ree dxej zii guzuloj rey Herodes cusagzi-man bëlzi ree bën rliladx Jesucrist. ² Abi' gunabee-man bagüjt reeman Jacob bijch Waj, con espad. ³ Chi baguiaaman bayuladx ree bën Israel ni beenman, dxel gunabeeman gunaaz reeman Bëd. Ni ne goc lën ree dxej lanij pascw chi raw reeman guiadxtil ad yu't levadur. ⁴ Chi gunaaz reeman Bëd, badxe' reeman laaman ladxguiib abi' gunabee rey Herodes tajp cwaa ree suldad din guinia reeman ro' ladxguiib guin, tib cwaa gaj reeman naj tajp suldad. Din beenman xgab nuzujman Bëd loj ree bën guiedx guin chi nidëd pascw. ⁵ Zian guyu Bëd ladxguiib, gojp da't reeman laaman. Per gra ree bën rliladx Jesucrist ad rucwëëzt rbejdx rniab reeman Dios por laaman.

Babëë Dios Bëd ladxguiib

⁶ Guxhin zii gajc chi yareguiaal cwëë Herodes Béd loj ree b́en guiedx guin, naga'yëjs Béd galay tio'p ree suldad, naxiiman con tio'p ree caden, guiáad los demazri ree suldad guin cayajp ro' ladxguiib guin. ⁷ Dxejczy bidxin tijb xi anjl Dios abi' basni tijb gui j lēn ladxguiib guin, dxel baqui' anjl guin cwē'lēn Béd persi bacwēēnman laaman, rēbaman lojman:

—¡Cari bixche!

Loj hor zii gajc biajb ree caden naxii yaa Béd, ⁸abi' rēb anjl guin lojman:

—Guxhiidxi'ch lēnl balēē tēē xgurēchil.

Chi ma been Béd zian dxel rēb anjl guin:

—¡Gojt xcajpil, tanal naj!

⁹ Laa barii gajc Béd nalaman anjl guin, per ad ragbeetaman bal diidxli naj ni cayūjn anjl guin, gunaladxaman cane'xhchaalzaman. ¹⁰ Abi' gudēd reeman loj tibcwaa ree suldad guin, dxel gudēd reeman loj stibcwaa reeman. Chi bidxin reeman ro' portguiib ni rarii runejz guin, dxel xtijbzan bixal abi' barii reeman. Abi' chi bidxin reeman tijb xquin, yagaj basa'n anjl guin Béd. ¹¹ Dxel gogbee Béd guial ni diidxliqui naj ni cazajcaman, abi' rēbaman:

—Yanri ma ragbeen guial guxhaal xi anjl Dios persi babēēman naj loj Herodes, con loj gra ni nūjnnē ree b́en Israel naj.

¹² Chi bayagbee Béd ni guzacaman, dxel baguiajman lidx Li, xniaa Waj, b́en la gajc Marcw, lod riga' zien ree bejn cabejdx canab reeman Dios.

¹³ Chi gulajw Béd ro' port, dxel brii tijb biin la Rode ziquiaam chunin. ¹⁴ Per chi bayünbeem cha' Béd, dád babaam, dxel luar nixhialim ro' port

guin, baxüünm bicojnm guial za' Béd ro' port guin.

¹⁵ Abi' rëb reeman lojm:

—¡Rajc guiiquil!

Per za'dxi'chczim guial waliqui ni rëbim. Dxel rëb reeman lojm:

—Ad laataman, wed xi anjlaman.

¹⁶ Per Béd cabajwzi cabajwaman ro' port guin. Dxel chi guxhal reeman dád bidxeb reeman baguiaa reeman laaman. ¹⁷ Abi' been Béd sen loj reeman din yacwëéz ro' reeman, dxel beman diidx xhienaag babëë Dios laaman ladxguiib. Abi' rëbaman loj reeman:

—Gol be ni guie loj Jacob në loj gra ree bën rliiladx Jesucrist.

Dxelri briiman yagaj zëman lood ren.

¹⁸ Chi bareguiaal, ad radxejlt xhie güün ree suldad guin guial ad ragbeet reeman xhienaag barii Béd ladxguiib guin. ¹⁹ Dxel gunabee Herodes chigdiil reeman Béd, per ad badxejlt reeman laaman. Abi' chi gulox gunabdiidx Herodes loj ree suldad guin xhienaag gojc, gunabeeman gugüjt reeman laa reeman. Dxel brii Herodes Judea abi' bisobaman luguiedx Cesarea.

Güjt rey Herodes

²⁰ Balen Herodes bën Tiro në ree bën Sidón, per baya'n ree bën guin diidx din chigdeenë reeman laaman. Chi been reeman gan guneenë reeman bën brii laj Blasto zagdxe, tijb bën naj xbejn rey Herodes, dxel gunee Blasto por laa reeman loj rey guin din lox til reeman, din guidibczi lod rniabee rey guin zëed ni raw reeman. ²¹ Bazuj Herodes xhie dxej guinieenëman laa reeman abi' dxej zii

gojt xab zagdxeman, gurej loj xyagxhilaman lod rniabeeman, zianz guzuloj guneenëman laa reeman. ²² Dxel guzuloj gurixdiaj ree bén guin, rëb reeman:

—¡Ad bejntan canee, tijb diosan!

²³ Loj hor zii gajc badëe tijb xi anjl Dios tijb guialguijdx loj Herodes. Gudaw bizog laaman abi' güjtaman guial bayuladxaman baza't ree bejn laaman zagdxe luar nuza't reeman Dios zagdxe.

²⁴ Per xtiidx Dios care'chzi care'chan gra ladci abi' gra ladci cayajcxhiey ree bén rliladx laaman.

²⁵ Chi ma badëed ree Bernabé con Saulo ni guxhaal ree bén Antioquía, dxel baza reeman Jerusalén, binë reeman Waj, bén la gajc Marcw.

13

Guzuloj Bernabé con Saulo bigtie'ch reeman xtiidx Dios

¹ Loj ree bén rliladx Jesucrist, bén zojb ree Antioquía, no'ch ree bén rudëed xtiidx Dios loj ree bejn në ree bén rulüü xtiidxaman. La reeman Bernabé, Simón bén rniee reeman Benya's, Lucio bén Cirene, Saulo con Manaén bén guni'snë Herodes tijbzi, bén gunabee Galilea. ² Tijb dxej chi naba'n reeman, la'tgaj cabejdx canab reeman cuza't tëë reeman Dios zagdxe, rëb xSprijt Dios loj reeman:

—Gol bacaabee Bernabé në Saulo din güün reeman dxiin rënan güün reeman.

³ Chi gulox guba'n reeman gurejdx tëë reeman Dios, dxel guxhoob yaa reeman guiyc Bernabé con Saulo din gagnë Dios laa reeman abi' bazaaidixnë reeman laa reeman.

Bernabé con Saulo wej reeman Chipre

⁴ XSprijt Dios naj bén guxhaal Bernabé con Saulo, zé reeman Seleucia, ni guyu reeman loj barcw, zé reeman yuj la Chipre, ni riga' loj nijsdoo. ⁵ Chi bidxin reeman niz Chipre, dxel luguiedx Salamina guzuloj gutie'ch reeman xtiidx Dios lén ree xyadoo ree bén Israel. Nē Waj binē reeman din güünman laa reeman yudar. ⁶ Chi biza reeman guidib niz Chipre, dxel bidxin reeman Pafos. Ni bidxaagloj reeman tijb bén Israel laman Barjesús, rajcaman guialbidxaa, rusquieeman bejn ree, rēbaman guial laaman naj bén rudēēd xtiidx Dios loj ree bejn. ⁷ Barjesús guin rnieenēman Sergio Paulo zagdxe, bén naj gobernador Chipre, rignia' da'taman. Gurejdx gobernador guin Bernabé con Saulo guial rēnman gucaagdiajgaman xtiidx Dios. ⁸ Per bēnbidxaa guin (con diidx grieg laman Elimas) guyēnman nudxoonman guial nililadx Sergio Paulo xtiidx Dios. ⁹ Abi' Saulo, bén la gajc Pab, rniabee xSprijt Dios luxdooman guidiblagaa, baguiaadxijchaman loj bēnbidxaa guin, ¹⁰ rēbaman:

—¡Xi'n xindxab lūj, ganax rusquieel, ganax niguijdx rüjnl, ad rēntczil ni zagdxe! ¿Xt goc gudēēl mod chinal ree bejn xnejz nali Dios? ¹¹ Yan gudēēd Dios lūj casti: ad zanit lojl abi' xchej ad zuguaatil xbacha' gubijdx.

Loj hor zii gajc gurexcajy Elimas abi' ad gojctri nuguaaman, dxel raguiilaman chu guiniaaz yaaman guial ad rajctri ruguaaman. ¹² Chi baguiaa gobernador guin zian, dxel bililadxaman abi' dád badxa lojman ni balüü reeman xcwent Dad Jesús.

Bidxin Pab con Bernabé niz Pisidia

¹³ Chi ma gudëd gojc zian, guyu Pab con ree xcompniaraman loj barcw luguiedx Pafos abi' zë reeman luguiedx Perge ni riga' niz Panflia. Ni basa'n Waj laa reeman bayejcaman Jerusalén.

¹⁴ Dxel barii reeman guiedx Perge, zë reeman luguiedx Antioquía ni riga' niz Pisidia. Abi' dxej raziiladx ree bën Israel, guyu reeman lën xyadoo ree bën Israel zianz gurej reeman. ¹⁵ Dxel chi gulox biil bën biil tib lajt loj libr bacaa Moisejs në loj libr bacaa ree bën badëë xtiidx Dios loj ree bejn, gunee ree bën rniabee lën yadoo guin, rëb reeman loj Pab con Bernabé:

—Bal xhie guiëbidi loj ree bën riga' guie din gudëëdi consejw loj reeman, zajc guiëbidan yan.

¹⁶ Dxel guzuli Pab, beenman sen loj reeman din yacwëöz ro' reeman, dxel rëbaman:

—Bën Israel, në gra ree bën rdxeb Dios, gol bacaagdiajg: ¹⁷ Dux Dios ree, nayajc ree bën Israel, gulejman dux bëngulal ree abi' laaman been persi gojcxhiey reeman, chi sta zojb reeman zi'c benzit niz Egipto. Dxel con xguialrniabeeman babëëman laa reeman Egipto. ¹⁸ Abi' baslejnguijcaman laa reeman loj tiuu ijz ni guzu reeman niz lod naj ganax yujbidx, ¹⁹ banijt tëëman gajdx ree nacion ni gure Canaán persi badëëman guidxliuj guin ree loj dux bëngulal ree. ²⁰ Zian gojc loj tajp gayuu garol ijz, dxelri bacaabee Dios juejs ree persi gunabee reeman laa reeman. Abi' Samuel bën badëëd xtiidx Dios loj ree bejn gojc xjuejs bigra reeman. ²¹ Dxel gunab reeman din chu' tijb rey nabee laa reeman, abi' bazuj Dios rey Saúl xi'n Cis, bën zëed loj xdiaa Benjamín persi gunabeeman laa reeman tiuu ijz. ²² Chi bisüd Dios rey Saúl, dxel bazujman

rey Davi. Abi' rëbaman: “Ma baguian guial Davi xi'n Isai, nabanx zi'c rënan, güün tëex cumplid da diidxan guial güünx gra zi'c rënan.” ²³ Abi' yan zi'c gajczi rëb Dios, loj gajc xdiaa rey Davi, brii Jesús bën guxhaalaman dín yabëëman bën Israel ree loj dol. ²⁴ Chi gad Jesús gui't, Waj bën baroobnijs bejn ree, bagojnman gra ree bën Israel guial rayal yayüjn reeman xgab por xtol reeman tiobnijs tëe reeman. ²⁵ Chi ma zidyob yadiblagaa xguialnaban Waj, dxel rëbaman: “Ad najtan bën naladxidi, qui gui'traman, laaman mazri lasajc guial lon, ni'quid rayalt gaxhiecan xgurëchaman.”

²⁶ Yan, dugra ree nayajc ree xdiaa Abraham në gra los demazri ree bën rdxeb Dios, par dunuj ree naj xtiidxaman ni rugojn reeman dunuj ree, xhienaag rabëë Jesucrist dunuj ree loj dol. ²⁷ Per ree bën Jerusalén con ree xguxtis reeman ad bayagbeet reeman Jesús. Ad gogbee tëet reeman xhie rën guiëb xtiidx Dios ni bacaa ree bën badëed ree xtiidxaman loj ree bejn, ni rool reeman lën yadoo dxej raziiladx ree bejn, dxel laagajc reeman bagüjt Jesús, zian gojc cumplid ni ca loj xtiidx Dios. ²⁸ Abi' majsi acheteci xtol Jesús guyu, per ni'czi zian rëb gajc reeman loj Pilato guial nabeeman guiëtaman. ²⁹ Chi gulox been reeman gra zi'c ca loj xtiidx Dios xcwent Jesús, balet reeman laaman loj crüjz abi' baquie'ch reeman laaman. ³⁰ Per Dios basban laaman, ³¹ dxel loj zien dxej balüülojman loj ree bën binë laaman chi briiman niz Galilea zëman Jerusalén, abi' yan laa reeman naj bën rníee por laaman loj ree bejn.

³² Zeel caygojnman lëjt diidxza'c guin ree, guial

promejs been Dios loj ree dux béngulal ree, ³³ ma beenman laan cumplid con dunuj ree guial zio'p ree loj xdiaa reeman. Beenman cumplid xtiidxaman chi basbanman Jesús zi'c ca loj Salmo barojp, lod rëb: “Lüj naj da xi'nan abi' diidz yan ma rajpil guialrniabee zi'cgajc naj.” ³⁴ Dios rëb guial yasbanman Jesús abi' ad zaxint xcuerpaman zi'c gajczi ca loj xtiidx Dios lod rëb: “Naj günle' lëjt zi'c benan promejs loj Davi.” ³⁵ Abi' rëb tää stib lajt loj xtiidxaman: “Ad zatiëjbttil xhin xcuerp xi'nl, bën naya nali.” ³⁶ Yan diidxliczi diidx guin ree ad rnieet reen xcwent Davi, din chi gulox gunabeeman bejn ree xtiampaman zi'c rëb Dios nabeeman, dxel güjtaman, biguie'chaman abi' guxin xcuerpaman. ³⁷ Per xcuerp Jesús bën basban Dios, ad guxintan. ³⁸ Zeel caygojnan lëjt compniar din gagbeedi guial por laaman ma yu' perdon par dux tol ree. ³⁹ Graczi bën rililadx Jesucrist ma gojc perdon gra xtol reeman ni ad gojct niajc perdon por ley badëë Dios loj Moisejs. ⁴⁰ Zeel gol gojp cudad chitëë saquidi zi'c bacaa ree bën badëë xtiidx Dios loj ree bejn, lod rëb:

⁴¹ Gol bacaagdiajg, lëjt bën ruze' ree da diidxan, gol badxalojdi gol gunidloj tää.

Din loj ree dxej nabandi gün reen ni xt ni'quid zaliladxtidi,

majsi chu na laa reen lojdi.

⁴² Chi barii Pab con Bernabé lën xyadoo ree bën Israel guin, gunab reeman favor loj Pab, din chi guidxin stijb dxej raziiladx ree bejn chiguieman mazri diidx loj reeman xcwent ni beman dxej zii.

⁴³ Chi barii ree bën guin lën yado guin, zien da't

reeman binal Pab con Bernabé, zi'c ree bén Israel zi'c ree bén ad najt bén Israel, bén rën ree Dios zi'cgajc ree bén Israel. Abi' rëb Pab con Bernabé loj reeman din sudxi'ch reeman loj nejz zagdxe guredx Dios laa reeman guial rënman laa reeman.

⁴⁴ Chi bidxin dxej ni raziiladx ree bejn, gra bén luguiedx guin bado'p din gucaagdiajg reeman xtiidx Dios. ⁴⁵ Per chi baguiaa ree bén Israel zien da't ree bejn riga' yagaj, dxel guyu guialnadëdloj luxdoo reeman abi' guzuloj caneeguijdx reeman canee tëë reeman diidxguijdx loj Pab. ⁴⁶ Dxel sin guialrdxeb badxi' Paban con Bernabé loj reeman, rëb reeman:

—Yaløj lëjt rayal yagojnan xtiidxza'c Dios, lëjt najdi bén Israel, per yan ad rëntidi gucaagdiajguidi laan, dxel lëjt gajc culüü guial ad zajct yayalidi guialnaban tiblayaa con Dios. Yan ma yugtie'chan diidxza'c guin ree loj ree bén ad najt bén Israel.

⁴⁷ Din zian gunabee dux Dad ree Dios dunujn, chi rëbaman tib lajt loj xtiidxaman:

Nuzun lüj zi'c guij par gra ree nacion,
din chel guidibchicniaa loj guidxliuj chicojnl
xhienaag gac ree bejn perdon.

⁴⁸ Chi biguiejn ree bén ad najt bén Israel zian, dxel babaa reeman, guzuloj rëb reeman guial zagdxe naj xtiidx Dios, abi' graczi bén ma naj yayal guialnaban tiblayaa con Dios, bililadx reeman xtiidxaman. ⁴⁹ Zianan zeel bire'ch xtiidxza'c Dios guidib niz ni. ⁵⁰ Per ree bén Israel batiaalguiiw reeman béngunaa rej ree laydoo zianczi naj tëë reeman bén zøjbloj luguiedx zii, në ree xinguaaw naj gajc xin zøjbloj, din sunal reeman Pab con Bernabé xt yabëë reeman laa reeman ni. ⁵¹ Dxel

Pab con Bernabé gudxijp guxyuj guia' reeman zi'c tijb sen guial ad bazoobt ree bèn guin diidx, dxel zè reeman Iconio. ⁵² Per ree bèn bililadx Jesús niz ni, ma rniabee xSprijt Dios luxdoo reeman guidiblagaa abi' dád rabaa reeman.

14

Bidxin Pab con Bernabé Iconio

¹ Luguiedx Iconio, Pab con Bernabé guyu reeman lèn xyadoo ree bèn Israel. Abi' zi'c balüü reeman xtiidxza'c Jesucrist, zien da't reeman bililadx, zi'c ree bèn Israel zi'c ree bèn ad najt bèn Israel. ² Per ree bèn Israel ad bililadxt bati-aalguiiw reeman bèn ad najt ree bèn Israel persi guzuloj been reeman xgab mal por ree bèn rliladx Jesucrist. ³ Per ni'czi zian, xchej da't guzuj ree apóstoles guin ni, abi' sin guialrdxeb gunee reeman xtiidx Dios guial rliladx reeman Jesucrist, laaman badëéd guialrniabee loj reeman persi been reeman zien da't ree milagr nē mazri ree ni ren, persi balüü Jesucrist guial diidxli naj ni rēb reeman xcwent Dios. ⁴ Per ree bèn luguiedx zii gojc reeman tio'p lala', garol reeman guzunē ree bèn Israel zagarol reeman guzunē apóstoles guin ree. ⁵ Dxel zi'c ree bèn Israel zi'c ree bèn ad najt bèn Israel, baya'n reeman diidx con ree guxtis din tilē reeman Pab con Bernabé gucaaguiaj tēē reeman laa reeman. ⁶ Abi' chi gogbee Pab con Bernabé zian, laa zia gajc reeman Listra con Derbe, guiedx riga' ree niz Licaonia, nē gra ree guiedx riga' niz ni, ⁷ gunee reeman xtiidxza'c Jesucrist.

Bacaaguiaj reeman Pab Listra

⁸ Luguiedx Listra guyu tijb xinguaaaw ad rajt rza, ad guzatzix guial naxin guia'x diizd chi golix abi' zobjix ⁹ cucaagdiajguix ni rëb Pab. Chi baguiaa Pab laax, gogbeeman guial rliladxix par yayajquix. ¹⁰ Abi' guneeman rejs, rëbaman:

—jBisu, guzuli zagdxe!

Loj hor zii gajc gutiajs xin guin, guzulix abi' guzuloj cazax. ¹¹ Chi baguiaa ree bejn ni been Pab, guzuloj canee reeman rejs diidx Licaonia, rëb reeman:

—Dios naj ree zi'c bejn ma biguiajt lod nadxu' ree.

¹² Abi' rëb reeman guial Bernabé naj dios Júpiter, guiáad Pab naj dios Mercurio guial laaman naj bën rniee loj reeman. ¹³ Abi' ro' guiedx guin niz lod ru bejn naj xyadoo Júpiter, dxel bixhioz yu' lën yadoo guin binëman go'n ree con ree guiaa, abi' laaman con ree bën guin guyën reeman nugüjt reeman go'n guin ree din niën reeman apóstoles guin ree zi'c xdios reeman. ¹⁴ Per chi gogbee Pab con Bernabé zian, gudixya' xab reeman, guzëëb reeman lad ree bën guin, rbixdiaj reeman rëb reeman:

¹⁵ —Gol bacaagdiajg, ¿chexquiza zeel rüjndi zian, awa bejn gajc dunujn zi'cgajc lëjt? Awa par zian-clan zio'pan din yanan lojdi din yasa'ndi ni rüjndi, din achetczi lasajc reen. Mejrli gol binal xnejz Dios naban, bën been xanyabaa në guidxliuj nëtëë nijsdoo con gra ni yu' loj reen. ¹⁶ Tiamp gulal Dios baslaa been ree bejn ni guyëntzi reeman. ¹⁷ Per ni'czi zian, zianczi balüüman chu najman por ree ni zagdxe ni rüjnman. Din laaman naj bën razaladx guia con guialnaza'c abi' razaladxaman ni radaaw

ree din chu' du luxdoo ree zagdx. ¹⁸ Chi rëb Pab con Bernabé zian, con ree diidx guin penz been reeman gan badxoon reeman guial nugüjt ree bën guin go'n guin ree din niën reeman laa reeman zi'c xdios reeman.

¹⁹ Per bëlzi ree bën Israel zojb Antioquía në Iconio, chi bidxin reeman luguiedx Listra been reeman gan batiaalguiiw reeman bën luguiedx guin ree. Dxel bacaaguaiaj reeman Pab abi' gunaladx reeman ma güjtaman abi' guxoobyuj reeman laaman, babëë reeman laaman luguiedx guin. ²⁰ Per chi bido'p ree bën rliladx Jesucrist gadëd lod naga'man, dxel bixchewan, bayuman luguiedx guin stijb. Chi bareguiaal briinëman Bernabé zë reeman luguiedx Derbe.

²¹ Chi gulox gutie'ch reeman xtiidxza'c Jesucrist luguiedx Derbe lod been reeman gan bililadx zien ree bejn laan, dxel bayejc reeman luguiedx Listra në Iconio nëtëë Antioquía. ²² Luguiedx zii ree badxe' reeman luxdoo ree bën rliladx Jesucrist. Rëb reeman loj reeman din sudxi'ch reeman loj ni rliladx reeman laaman, din dád sagdiaj reeman din yayu reeman lod rniabee Dios. ²³ Abi' tëë loj tijb gaj ree guiedx guin bacaabee reeman bengol nabee ree loj ree bën rliladx Jesucrist. Zianz chi gulox guba'n reeman gurejdx tëë reeman Dios, dxel basa'n reeman laa reeman con Dad Jesús bën ma bililadx reeman.

Badxin ree Pab con Bernabé Antioquía ni riga' niz Siria

²⁴ Chi baza ree Pab con Bernabé niz Pisidia, bidxin reeman niz Panfilia. ²⁵ Abi' gunee reeman xtiidx Dios luguiedx Perge, dxel zë reeman guiedx

Atalia. ²⁶ Ni guyu reeman loj barcw zë reeman Antioquía, luguiedx lod basa'n ree los demazri ree bën rliladx Jesucrist laa reeman con Dios din gagnëman Pab con Bernabé din guitie'ch reeman xtiidxaman. Abi' dxiin guin naj ni ma baloox reeman. ²⁷ Dxel chi bidxin reeman Antioquía, bato'p reeman bën rliladx ree Jesucrist, persi be reeman diidx loj reeman gra ni been Dios con laa reeman, xhie tëë naag guxhalaman nejj din chililadx ree bën ad najt bën Israel Jesucrist. ²⁸ Ni guzu Pab con Bernabé xchej, guzunë reeman bën Antioquía rliladx ree Jesucrist.

15

Guyu gabilt Jerusalén

¹ Lën ree dxej zii bidxin bëlzi ree bën Judea luguiedx Antioquía. Abi' guzuloj rëb reeman loj ree bën rliladx Jesucrist, guial bal id zu reeman sen zi'c gunabee Moisejs, ad zajct güün Dios xtol reeman perdon. ² Dxel Pab con Bernabé dád zro' gudijldiidx reeman con ree bën guin. Dxel bacaabee ree bën rliladx Jesús Pab në Bernabé, në ree ben ren din che reeman Jerusalén chigneenë reeman apóstoles guin ree, con ree bengol rniabee loj ree bën rliladx Jesucrist din guguaa reeman xhienaag güün reeman xcwent sen guin.

³ Abi' badxe'nejz ree bën Antioquía rliladx ree Jesucrist laa reeman persi zë reeman. Chi zë reeman gudëd reeman niz Fenicia në niz Samaria abi' bagojn reeman bën rliladx ree Jesucrist, bën zobj ree niz ni guial ma rliladx ree bën ad najt ree bën Israel xtiidx Dios. Abi' graczi bën ma rliladx

Jesucrist niz ni, dád babaa reeman chi biguiejn reeman zian.

⁴ Chi bidxin Pab con Bernabé Jerusalén, dxel baca' ree b́en rliadx Jesucrist laa reeman, con ree apóstoles, con ree bengol rniabee loj ree b́en rliadx Jesucrist. Abi' be ree Pab diidx con Bernabé gra ni been Dios con laa reeman. ⁵ Per yu' ree b́enfarisew ma rliadx Jesucrist, guzuli reeman abi' rēb reeman:

—B́en ad najt ree b́en Israel abi' ma rliadx reeman Jesucrist, rüjn naguiejn chu' reeman sen ru ree b́en Israel, gagbee tēē reeman guial rayal chinal reeman xley Moisejs.

⁶ Dxel bado'p ree xi apóstoles Jesús con ree bengol rniabee loj ree b́en rliadx Jesucrist din guidoon xhienaag güün reeman. ⁷ Guial tant canee reeman por zian, dxel guzuli Béd, rēbaman loj reeman:

—Gradi compniar raliduladx ree Jesucrist, lējt ragbee guial diizd gocli gulej Dios naj lojdi din chignen xtiidxza'c Jesucrist loj ree b́en ad najt b́en Israel din chililadx reeman laaman. ⁸ Abi' Dios b́en nünbee luxdoo graczi ree bejn, balüüman guial naj reeman xbejnman guial ma badēēd xSprij-taman loj reeman zi'cgajc baneeman du loj ree. ⁹ Zi'c ruguiaa Dios dunuj ree ziangajc ruguiaaman laa reeman, din zi'c basiaman du luxdoo ree ziangajc basiaman luxdoo reeman guial ma rliadx reeman Jesucrist. ¹⁰ Yan, ¿chexc zeel ad ridxga'tidi ni ma been Dios abi'za rniabeedi chinal ree b́en rliadx Jesucrist ley ni ni'qui dunuj ree ni'qui dux b́engulal ree ad gojct naguieen ree zi'c rniabee ley guin? ¹¹ Dunuj ree rayagbee guial por ni zagdxe ni

been Dad Jesucrist, been Dios dux tol ree perdon zi'cgajc laa reeman.

¹² Dxel bacwëez ro' gra reeman abi' bacaagdiajg reeman ni cayü ree Bernabé con Pab, xcwent gra ree xmilagr Dios ni been reeman loj ree bén ad najt bén Israel. ¹³ Chi gulox gunee reeman, dxel nëgajc Jacob rëb:

—Gradi compniar raliduladx ree Jesucrist, gol bacaagdiajg: ¹⁴ Simón Bëd be diidx duloj ree xhienaag guzuloj gulej Dios bén ad najt ree bén Israel din gac reeman xbejnman. ¹⁵ Gra ni ma gojc naj zi'c ni bacaa ree bén badëe xtiidx Dios loj ree bejn loj xtiidxaman lod rëb:

¹⁶ Chi ma gojc zian,
yayünxhiey ree da bejnman mazri zi'c goc chi naban Davi,
gacxhiey reeman por ree bén sta naban,
zi'c guban ree bejn xtiamp Davi
abi' por laa reeman yayajcxhiey ree da bejnman.

¹⁷ Din yaguiil ree los demazri ree bejn guial guiën reeman naj,
gra ree bén nacion ren, yaguiil guial guiën reeman naj,
bén ma gule reen din gac reeman da bejnman,
bén guiguiejn ree guza't ree bejn naj.

¹⁸ Zian na Dios, bén cugojn bejn ree gra ree nine diizd tiamp gulal.

¹⁹ 'Zeel naladxan ad rayalt chu güün naguiejn bén ad najt ree bén Israel par chinal reeman ley, laa reeman guial ma basa'n xcostumbr reeman par chinal reeman xnejz Dios. ²⁰ Yan con yaxhaal ree tijb gui'ch loj reeman guial ad rayalt gaw reeman ni ragle' loj ni naj xdios reeman, ad rayal tëët

sunë reeman ben ren bën ad najt lacheel reeman, ad rayalt gaw reeman bëel rberejn ni'qui rejn. ²¹ Zian yaguie'ch ree loj reeman, din diizd tiamp gulal tijb gaj guiedx yu' bën rulüü laa reeman xhie rën guiëb xley Moisejs ni rool reeman lën ree yadoo dxej raziiladx ree bejn.

²² Dxel apóstoles guin ree con ree bengol rniabee loj ree bën rliladx Jesucrist, con los demazri ree bën rliladx Jesucrist, rëb reeman gucaabee reeman bën guixhiaalnë reeman Pab con Bernabé din che reeman Antioquía. Abi' bacaabee reeman Judas, bën la gajc Barsabás, në Silas, laa reeman rajp guialrniabee loj ree bën rliladx Jesucrist.

²³ Abi' guxhaalnë reeman laa reeman tijb gui'ch ni rëb:

“Dunujn nayajcan xi apóstoles Jesús, con ree bengol rniabee loj ree bën rliladx laaman, në los demazri ree bën rliladx laaman. Ragajpdiozan lëjt bën ad najt ree bën Israel, per nayajc ree compniar raliduladx ree Jesucrist, lëjt zojbidi Antioquía, në los demazri ree bën zojb ree niz Siria nëtëë niz Cilicia. ²⁴ Ma bayagbeen guial yu' ree bën duladxan brii sin dux tiidxbeen, abi' cagu'nawëëg reeman lëjt con xtiidx reeman persi ad radxejlt xhie güündi guial na reeman lojdi rayal chu'di sen ni ru ree bën Israel güün tēedi zi'c rniabee xley Moisejs, per ad dunujtan baxhaal laa reeman.

²⁵ Zeel bado'pan abi' raguie'chan guial zagdxe naj yacaabee bëlzi dux compniaran din guidganaj reeman lëjt, guidnë tēë reeman tio'p dux compniaran, Bernabé con Pab, bën rayën da'tan. ²⁶ Zien ree ni guiidx cuhaagloj reeman guial cayüjn reeman sirv loj Dad Jesucrist. ²⁷ Dxel cayxhaalnë'n

laa reeman Judas con Silas, laa reeman na lojdi gra con quijb xtiidx reeman. ²⁸ Abi' zi'c naj xgab bazaladx xSprijt Dios du lojn, dxel achetri naguiejn rüjn yanabeen lëjt ni güüнди, ni rayalzi cu'guijquidi naj guial, ²⁹ ad gawidi xbëel ree be ni rbe'c ree bejn loj ni naj xdios reeman, ad gaw tëedi bëel rberejn, ni'qui rejn, ad sunëdi ben ren bën ad najt lacheelidi. Bal gapidi cudad ad züjntidi gra ree nine, zagdxequi güüнди. Gagnë Dios lëjt.”

³⁰ Zian gojcan, gui'ch guin naj ni guxhaalnë reeman guidap ree bën guin par luguiedx Antioquía. Ni bato'p reeman bën rliladx ree Jesucrist abi' bayü reeman gui'ch guin loj reeman. ³¹ Chi biil reeman laan, dád nix guyu luxdoo reeman por ree diidx zagdx ni zëed lojn. ³² Abi' Judas con Silas guial nëgajc reeman rajp quiarguiejn par gudëed reeman xtiidx Dios, dxel zien naj ni guneenë reeman bën rliladx ree Jesucrist, bagu' reeman luxdoo reeman con xtiidx reeman. ³³ Chi ma gudëd zien dxej za' ree Judas con Silas ni, bazaadiidxnë ree bën rliladx Jesucrist laa reeman din yaguiaj reeman lod za' ree bën guxhaal laa reeman, rëb reeman loj reeman: “Chignë Dios lëjt zagdx.” ³⁴ Per Silas beenman xgab baya'nman ni mazri. ³⁵ Abi' Pab con Bernabé baya'n reeman Antioquía mazri, laa reeman con ree ben ren basnuu balüü reeman gutie'ch tëe reeman xtiidxza'c Jesucrist loj ree bejn ni.

Ni barojp volt brii Pab biglüüman xtiidx Dios guiedx ren ree

³⁶ Chi gudëd tio'p choon dxej, dxel rëb Pab loj Bernabé:

—Yo' stijb yugnaj dux compniar ree b́en rliładx ree Jesucrist, graczi ree luguiedx lod ma bugtie'ch xtiidx Dios, din yuquiaa xhienaag za' reeman.

³⁷ Bernabé guyèn ninè reeman Waj, b́en la gajc Marcw. ³⁸ Per Pab ad cwějbt ninè reeman laaman, din chi we reeman niz Panfilia guro'nładxaman laa reeman, ad binëtraman laa reeman. ³⁹ Abi' ni'qui tijbaman ni'qui zatijbaman ad baya'nt conform, zianz gula' lasa' reeman. Dxel binè Bernabé Marcw, guyu reeman loj barcw zè reeman yuj la Chipre ni riga' loj nijsdoo, ⁴⁰ dxel gulej Pab Silas din chinëman laaman abi' rëb los demazri ree b́en rliładx Jesucrist loj reeman guial chinè Dios laa reeman zagdx. ⁴¹ Zianz gudëd reeman niz Siria nē niz Cilicia, ragu' reeman luxdoo ree b́en rliładx Jesucrist niz ni.

16

Bine ree Pab con Silas Timoteo

¹ Chi bidxin Pab con Silas guiedx Derbe nē guiedx Listra abi' Listra bidxaagloj reeman tijb b́en rliładx Jesucrist, laman Timoteo, xniaaman naj b́en Israel, nëman rliładx Jesucrist guiáad xdadaman naj b́en grieg. ² Graczi ree b́en rliładx Jesucrist, b́en zojb ree guiedx Listra nē Iconio ruza't laaman zagdx. ³ Dxel rëb Pab chinëman Timoteo, per yaloj badxe'man laaman sen ni ru ree b́en Israel, chitëë xhie guiëb ree b́en Israel riga' niz ni, din gra reeman ragbee guial naj xDadaman b́en grieg. ⁴ Graczi ree guiedx ni gudëd reeman bagojn reeman b́en rliładx ree Jesucrist ni rayal güün reeman zi'c ma rëb ree apóstoles, con ree bengol rniabee loj ree b́en rliładx laaman

Jerusalén. ⁵ Zianan zeel guzudxi'ch ree bén niz ni loj guialrliladx reeman Jesucrist, abi' guixie guixie gojcxhiey mazri ree bén rliladx laaman.

Balüüloj tijb bén Macedonia loj Pab

⁶ Chi ma gojc zian ad baslaat xSprijt Jesús nignee reeman xtiidx Dios niz Asia. Dxel gudëdzinejz reeman niz Frigia në niz Galacia ⁷ abi' bidxin reeman niz Misia. Ni been reeman xgab nej reeman niz Bitinia, per ad cwëjb gajct xSprijt Dios nej reeman niz ni. ⁸ Dxelri gudëdzinejz reeman niz Misia, bidxin reeman guiedx Troas. ⁹ Yagaj, gux-hinzii guzajc Pab zi'c rulüü cane'xhchaalaman. Baguiaaman tijb xinguaaaw zëed niz Macedonia, za'lix rzajquix liaadx loj Pab, rëbix:

—Guda niz Macedonia, taguieen dunujn yudar.

¹⁰ Guloxzi baguiaa Pab zian, laa baguieen gajcan porvinid din yo'n niz Macedonia guial bayagbeen Diosan naj bén cabejdx dunujn niz ni par yatie'chan xtiidxza'c Jesucrist.

Bidxin ree Pab con Silas Filipos

¹¹ Badxu'n loj barcw luguiedx Troas abi' bio'n naliduu Samotracia. Chi bareguiaal badxinan guiedx Neápolis. ¹² Yagaj badxoon bio'n Filipos, guiedx mazri zobjloj niz Macedonia, per Rom rniabee guiedx zii, ni badxu'n bëlzi ree dxej. ¹³ Abi' tijb dxej raziiladx ree bejn, bariin luguiedx guin bio'n tijb ruguiiwro', lod rayagbeen rado'p ree bén Israel par cwedx reeman Dios. Abi' badxu'n baneen xtiidxza'c Jesucrist loj ree béngunaa bado'p yagaj. ¹⁴ Tijb ree béngunaa guin la Lidia, najman bén Tiatira, ruto'man lajd zagdx ni culor murad. Diidxli rdxebaman Dios abi' cucaagdiajgaman.

Dios guxhal xquiarguejnman din gucaagdiajgaman zagdxre gra ni rëb Pab. ¹⁵ Abi' gurobnijsaman con gra xfamilaman. Dxel gunabaman favor du lojn, naman:

—Bal walidi rliladxidi guial ma rliladxan Jesucrist, gol baya'n lidxan.

Dxel beenman naguiejn baya'n nan lidxaman.

¹⁶ Dxel tib volt, chi zio'n lod rej ree bejn par cwedx guiniab reeman Dios, badxaaglojn tijb biingunaa, yu' xindxab luxdoom, abi' por xguialrniabee xindxab guin rnieeya'm guiáad ree bën guzii laam dád zro' milia rüjn reeman gan por dxiin guin. ¹⁷ Dxel bidnalim Pab con dunujn, rbidxa'm rëbim:

—Bën guie ree rüjn xchiin Dios yu' xanyabaa, laa reeman gugojn léjt xhienaag gaquidi perdon.

¹⁸ Zien dxej da't beenm zian, xt chi balenya' Pab, dxel bayejcaman rëbaman loj xindxab yu' luxdoom:

—Por xguialrniabee Jesucrist, rniabeen lüj din yariil luxdoo biin guie.

Loj hor zii gajc barii xindxab guin luxdoom.

¹⁹ Per chi gogbee ree bën guzii laam guial ad zjectri güünm gan milia par laa reeman, dxel gunaaz reeman Pab con Silas, binë reeman laa reeman roylay loj guxtis. ²⁰ Chi bayü reeman laa reeman loj ree guxtis guin, rëb reeman:

—Xin Israel guie ree rbëë reex wadijl du ladx ree, ²¹ abi' rulüü reex costumbr ree ni ad zatiëëbt ree yaguieen ree ad zajc tëët yaguieen ree, din ben Rom dunuj ree.

²² Dxel wajs gra ree bën guin contr laa reeman, abi' gunabee ree guxtis guin gulëë xab

Pab con Silas din quin reeman laa reeman con var. ²³ Chi gulox gudijn da't reeman laa reeman, dxel bilu' reeman laa reeman ladxguiib abi' gunabee reeman bén rajp ro' ladxguiib guin din gapdxi'chaman laa reeman. ²⁴ Chi biguiejn bén rajp ro' ladxguiib guin zian, dxel bilu'man laa reeman xt lén quart bigra yu' lén ladxguiib guin, guxhiiman guia' reeman loj tabl naal con caden.

²⁵ Per garol guiaal, la'tgaj cabejdx canab Pab con Silas Dios, cayool tée reeman cant par laaman, dxel cucaagdiajg los demazri ree bén yu' ladxguiib guin. ²⁶ Dxel tijbzi golp guzuloj xudoxh, niz ni niz guie rurlia xcimiant ladxguiib guin. Loj hor zii gajc bixal gra ree xportan abi' baxiec ree caden naxii gra ree bén yu' lénan. ²⁷ Chi baban bén rajp ro' ladxguiib guin abi' baguiaaman zojbyal gra ree xportan, gulée xi espadaman din nugjyt laagajcaman guial gunaladxaman gra ree bén yu' ladxguiib guin ma baxüün. ²⁸ Dxel gurixdiaj Pab, rëbaman lojman:

—Ad güünnaa lüj gajc, laa dugran nadxu' guie.

²⁹ Laa gunab gajc bén guin tijb guij, dxel ruxüünman guyuman, rnijman guial rdxebaman, bigzuxibaman loj Pab në loj Silas. ³⁰ Dxel babëëman laa reeman, gunabdiidxaman loj reeman, rëbaman:

—Dad, gol guna, ¿xhie rayal günan din güün Dios naj perdon?

³¹ Badxi' reeman laan, rëb reeman:

—Bililadx Dad Jesucrist, zian gaquil perdon con xfamilil.

³² Abi' be reeman xtiidx Dios lojman con loj gra ree bén zojb lidxaman. ³³ Zianz guxhin

zii gajc gudiibaman lod nadxeelguijdx reeman, dxel gurobnijsaman con gra xfamilaman. ³⁴ Abi' bignëman laa reeman lidxaman, dxel badëëman ni gudaw reeman. Guiáad laaman dád nix yu' luxdooan con gra xfamilaman Guial ma rliladx reeman Dios.

³⁵ Chi bareguiaal, guxhaal ree guxtis guin suldad ree persi biguiedx reeman loj bën rajp ro' ladxguiib guin guial guslaaman Pab con Silas.

³⁶ Abi' rëb bën rajp ro' ladxguiib guin loj Pab:

—Ma na ree guxtis guial guslaan lëjt. Yan ma zajc yaguiajdi ad chu'di xgab.

³⁷ Per rëb Pab loj ree suldad guin:

—Nayajcan quijb ben Rom abi' gudijn reeman dunujn delant loj ree bën guiedx, ni'quid ba-neet reeman mod nadëëdan cwent loj reeman con badxe' reeman dunujn ladxguiib. Abi' yan, ¿guslaa reeman dunujn ralan ya? ¡Ad zajctan zian! Gui't quijb laa reeman guidgalëë reeman dunujn.

³⁸ Abi' bicojn ree suldad guin guxtis guin ree zian, dxel dád bidxeb reeman chi biguiejn reeman guial ben Rom naj Pab con Silas. ³⁹ Dxel wej reeman bignab reeman perdon loj Pab con Silas babëë tëë reeman laa reeman, rëb reeman loj reeman din yaza reeman luguiedx guin. ⁴⁰ Chi barii reeman ladxguiib, wej reeman lidx Lidia. Zianz chi gulox guneenë reeman los demazri ree bën rliladx ree Jesucrist din chu' luxdoo reeman sudxi'ch reeman loj ni rliladx reeman, dxel baza reeman.

17

Bidxin ree Pab con Silas Tesalónica

¹ Chi zë Pab con Silas, gudëd reeman niz Anfípolis në niz Apolonia zianz bidxin reeman luguiedx Tesalónica lod yu' tijb xyadoo ree bën Israel. ² Abi' zi'c goc xcostumbr Pab, wejman lën yadoo guin, choon dxej raziiladx ree bejn. Wejman bigneenëman laa reeman xtiidx Dios. ³ Bagojnman balüü tēëman laa reeman loj xtiidx Dios lod rëb guial naj sagdiaj Cristo, abi' chi ma güjtaman yabanman stijb. Rëbaman loj reeman:

—Jesús ruzat gajcan lojdi, laagajcaman naj Cristo din yabëëman dunuj ree loj dol.

⁴ Yu' ree bën Israel guin bililadx abi' bachajg reeman Pab con Silas. Në zien ree bën grieg rën Dios bililadx, nētēë zien ree béngunaa zojbloj bililadx Jesús. ⁵ Per ree bën Israel ad bililadxt Jesucrist, gudëdloj reeman abi' bato'p reeman benmal ziza ree lunejz persi gulëë reeman wadijl luguiedx guin, abi' guyu reeman lidx Jasón, raguiil reeman Pab con Silas din cwëë reeman laa reeman guzuj reeman laa reeman loj ree bën guiedx guin. ⁶ Per guial ad badxejlt reeman laa reeman yagaj, dxel guxoobyuj reeman Jasón në ree ben ren bën rililadx Jesucrist, binë reeman laa reeman loj guxtis, rbixdiaj reeman, rëb reeman:

—Tio'p ree xin cabëë wadijl guidib guidxliuj, ma bi't reex guie, ⁷ abi' lidx Jasón zojb reex. Laa reex con gra ree bën nuchajg laa reex, ad cayüjnt reex zi'c rniabee xley rey César, din rëb reex guial yu' zatijb rey la Jesús.

⁸ Chi biguiejn ree guxtis guin zian con ree bejn, gra loj xgab been reeman. ⁹ Per Jasón con los demazri ree bën guyu ladxguiib guin gudijx ree-

man loj ree guxtis guin, dxel baslaa reeman laa reeman.

Bidxin Pab con Silas Berea

¹⁰ Guxhinzii gajc, guxhaal ree b́en rlliladx Jesucrist Pab con Silas luguiedx Berea. Chi bidxin reeman ni, wej reeman ĺen xyadoo ree b́en Israel. ¹¹ Mazri benza'c naj ree b́en Israel guin guial loj ree b́en Israel zobj Tesalónica. Con gan bacaagdi-ajg reeman ni ŕeb Pab. Abi' guixie guixie rusiid reeman xtiidx Dios, din gagbee reeman waliqui ni ŕeb Pab ya. ¹² Zeel dád zien reeman bililadx Jesucrist, ńet́ée zien b́en grieg bililadx laaman zi'c ree xinguaaw zi'c ree b́engunaa zobjloj niz ni. ¹³ Chi gogbee ree b́en Israel zobj Tesalónica guial catie'ch Pab xtiidx Dios luguiedx Berea, dxel wej reeman ni bigtiaalguiiw reeman bejn ree din guidxe'ch reeman Pab. ¹⁴ Per ree b́en rlliladx Jesucrist ad goglaat reeman, laa guxhaal gajc reeman Pab niz ro' nijsdoo. Guíaad Silas con Timoteo baya'n reeman mazri Berea. ¹⁵ Abi' ree b́en biglu'nejz Pab, xt Atenas biné reeman laaman. Chi baza reeman ni, bigné reeman xruson Pab din diob che Silas con Timoteo chinal reeman laaman.

Bidxin Pab Atenas

¹⁶ La'tgaj cabéz Pab guidxin Silas con Timoteo luguiedx Atenas, guyunayaman guial baguaaman zien da't ni rajp ree bejn niz ni zi'c dios. ¹⁷ Zeel wejman ĺen xyadoo ree b́en Israel bigneenéman laa reeman ńe los demazri ree b́en ŕen Dios zi'c ree b́en Israel, guixie guixie rnieenéman chut́éez b́en rdxaglojman niz galay guiedx guin. ¹⁸ Guneené t́éeman garol ree b́en

zinal ni balüü bën brii laj epicureo, nē za garol ree bën estoicos. Abi' yu' reeman rēb:

—¿Xhienin rníee xin guin zeel rníee da'tix?

Yu' tēē reeman rēb:

—Rulüü xtiidx dios ren ree bën ad naguieenbeet ree catie'chix.

Rēb reeman zian guial caneenē Pab laa reeman xtiidxza'c Jesucrist nē xcwent guial babanman stijb. ¹⁹ Dxel binē reeman Pab tijb luar la Areópago, lod rado'p reeman. Abi' gunabdiidx reeman lojman, rēb reeman:

—¿Zajc nal ya xhie ree nicüb guin zidgalüül niz guie? ²⁰ Din rül diidx du lojn ni ad rayagbeetan, zeel rayēnan yayagbeen xhie rēn guiēban.

²¹ Graczi ree bën Atenas, con los demazri ree benzit zojb ni, zianczi za' reeman zian. Ruladx reeman tēd reeman dxej, gucaagdiajg reeman o gü reeman ni naj ree nicüb.

²² Dxel guzuli Pab galay reeman lod la Areópago, rēbaman:

—Bën Atenas, por graczi ni ma baguian, ma gogbeen guial dád zien ree xdiosidi. ²³ Abi' chi zizaan ziquian luar lod rbejdxidi xdiosidi, badxejlan tijb luar lod ca ree diidx ni rēb: “Par Dios ad naguieenbeet ree.” Yan, Dios rbejdxidi sin guial ad nünbeetidi laaman, xtiidxaman naj ni zidguien lojdi.

²⁴ 'Dios guin been guidxliuj con graczi ni yu' lojn, laaman rniabee xanyabaa nē loj guidxliuj. Ad za'taman lēn yadoo ni rüjn ree bejn. ²⁵ Ad riaadx tēētaman chu güün xhienin par laaman, din laaman naj bën razaladx bi nabajnnē' ree, laaman

razaladx guialnaban duloj ree në ree ni rayaadx ree.

²⁶ 'Por tijb bejn been Dios din chu' zienloj bejn loj guidxliuj din cwe reeman guidib loj guidxliuj. Abi' ma naj xhie tiamp guiban reeman ban tëë cwe reeman. ²⁷ Din yaguuil reeman Dios majsi zi'c chi rgan bejn chi raguuilaman xhienin, zian güün reeman din yadxejlaman. Majsi diidxiczi ad zijtt za'man par gra bejn. ²⁸ Din por Dios nabajn ree, por laaman raniib ree radxoo tëë ree, por laaman nadxu' ree loj guidxliuj. Zi'c rëb tëë ree xbénrignia'di, chi rëb reeman: "Dunuj ree nayajc xi'n Dios." ²⁹ Zeelbal nayajc ree xi'n Dios, ad rayalt yaguieen ree xgab guial Dios najnë or, o plajt, o guiaj ya zi'c naj ni rüjn ree bejn zi'c naj xixgab reeman. ³⁰ Tiamp gulal cwëjb Dios been ree bejn zi'c naladx reeman guial achetctzi ragbee reeman, per yan gra ladczi canabeeman gra ree bejn din yayüjn reeman xgab por xtol reeman. ³¹ Din Dios ma gulej tijb dxej ni yadëed ree bejn cwent lojman, dxej ni güün xguialguxtisaman. Ma gulej tëëman Jesucrist din güünman guialguxtis guin, abi' din guiguien guial gulejman laaman par zian, basbanman laaman chi gütaman.

³² Chi biguiejn reeman rëb Pab guial baban Jesucrist loj ree bengüt, yu' reeman baze' laaman, yu' tëë reeman rëb:

—¡Zatijb dxej yasnuu yacaagdiajgan ni canal!

³³ Dxel baza Pab lod za' reeman. ³⁴ Per yu' reeman bachajg laaman, abi' bililadx reeman xtiidx Dios. Loj reeman no'ch tijb bën zojbloj lën Areópago laman Dionisio, në stijb béngunaa la Dámaris në ree ben ren.

18

Bidxin Pab Corinto

¹ Dxel brii Pab Atenas zëman Corinto. ² Yagaj bidxaaglojman tijb bën Ponto laman Aquila, zëédaman diaa Israel. Aquila con xbéngunaaman Priscila qui bazari reeman niz Italia guial gunabee rey Claudio yarii gra ree bën Israel Rom. Dxel wej Pab bitixlojman laa reeman. ³ Abi' guial lasa'gajc dxiin ni rüjnman rüjn reeman, rüjnchaaw reeman guid ni rajc ree carp, dxel baya'nnëman laa reeman persi been reeman dxiin guin. ⁴ Abi' beegaj dxej raziiladx ree bën Israel, rej Pab rigneeman xtiidx Dios lën xyadoo ree bën Israel, zi'c ree bën naj ree bën Israel zi'c ree bën ad najt bën Israel raguuilaman mod din chililadx reeman ni rëbaman.

⁵ Chi baza ree Silas con Timoteo niz Macedonia, bidxin reeman Corinto, dxel achetri ni ren been Pab, ganaxzi xtiidx Dios gunee man loj ree bejn, balüü tëëman bën Israel ree guial Jesús naj Cristo bën cabëz reeman. ⁶ Per guzuloj bidxe'ch reeman Pab abi' gunee reeman diidxguijdx contr laaman. Dxel gudxiip xabaman zi'c tijb sen guial ad ru-zoobt reeman diidx, abi' rëbaman loj reeman:

—Lëjt gajc rajp dol guial guizëëbidi delant loj Dios, ad najt ra'p dol. Diizd yan chiguien xtiidx Dios loj ree bën ad najt bën Israel.

⁷ Dxel bariiman lën yadoo guin wejman lidx bën la Justo, rën bën zii Dios, gajxh gajc yadoo guin naj lidxaman. ⁸ Abi' Crispo, tijb bën rniabee lën xyadoo ree bën Israel, bililadxaman Dad Jesucrist con gra xfamilaman. Në zien ree bën Corinto bililadx chi biguiejn reeman xtiidx Jesucrist abi'

gurobnijs reeman. ⁹ Tijb guxhin balüüloj Dios loj Pab, rëbaman lojman:

—Ad rdxebil, basnuu gunee da diidxan, ad gucwëëzil, ¹⁰ naj za'në' lüj, achutczi zajc güün lüj xhienin, din luguiedx guie zien da't bejn naj par naj.

¹¹ Zianan zeel baya'n Pab Corinto tibijz garol, balüüman bën guin ree xtiidx Dios.

¹² Per chi goc Galión gobernador Acaya, bën Israel ree bachajg lasa' reeman persi gunaaaz reeman Pab binë reeman laaman loj gobernador guin, ¹³ rëb reeman loj gobernador guin:

—Xin guie ziza cayüjnx gan bejn ree guial guiën reeman Dios zi'c tijb mod ni ad najt loj ley.

¹⁴ Ma niniee Pab, chi gunee Galión rëbaman loj ree bën Israel guin:

—Bal niajcan tijb falt o tijb guialquia narooob beenman zeel zidnëdi laaman, züncwentan lëjt.

¹⁵ Per najn por ree diidx në por laj ree bejn nëtëë por xleydi, zeel lëjt gajc gol gunaj xhienaag güündi, ad rëntan günan guialguxtis xcwent ree ni guin.

¹⁶ Abi' laa babëë gajcaman laa reeman roy-lay guin. ¹⁷ Dxel yagaj gajc gunaaaz gra reeman Sóstenes, bën rniabee lën xyadoo ree bën Israel abi' gudijn reeman laaman, per ni'quid beencwëntt gobernador guin laa reeman.

Badxin Pab Antioquía

¹⁸ Zienri ree dxej baya'n Pab Corinto. Dxel bazaadiidx nëman los demazri ree bën rliladx Jesucrist, abi' bazanëman Priscila con Aquila, guyu reeman loj barcw zë reeman niz Siria. Per chi gad reeman grii Cencrea bagaj guiyc Pab, por tijb

promejs ni beenman. ¹⁹ Chi bidxin reeman Éfeso, ni basa'n Pab Priscila con Aquila, abi' wejman lèn xyadoo ree bèn Israel zojb ree ni, bigneenëman bèn Israel rado'p ree lèn yadoo guin. ²⁰ Abi' guyën reeman niaglaa Pab ni mazri, per ad cwëjbtaman. ²¹ Rëbaman loj reeman:

—Ma yaya'n, bal gagnë Dios naj, guidganan lëjt stijb.

Dxel guyuman loj barcw bazaman Éfeso. ²² Chi bidxinman Cesarea, dxel wejman Jerusalén bica-jpdiozaman bèn rliladx ree Jesucrist, dxelri zëman Antioquía. ²³ Chi ma gojc xchej za'man Antioquía, dxel briiman zatijb. Wejman tijb gaj ree guiedx riga' niz Galacia në niz Frigia, ragu'man luxdoo gra ree bèn rliladx Jesucrist.

Gutie'ch Apolos xtiidx Dios Éfeso

²⁴ Tiamp zii bidxin tijb bèn Israel luguiedx Éfeso, laman Apolos, gojlaman Alejandría. Dád radxe-
jlaman diidx par guinieeman abi' dád rajcaman xtiidx Dios. ²⁵ Basiidaman xtiidx Dios, dxel con gan balüüman bejn ree, zagdxe tēë rüman xtiidx Jesús loj reeman, majsi ad ragbeetaman par xhieri mazri rirobnijs bejn, tijbzi xcwent xguial waroobnijs Waj ragbeeman. ²⁶ Abi' Apolos, sin guialrdxeb guzuloj caneeman xtiidx Dios loj ree bèn Israel lèn xyadoo reeman, zianz chi biguiejn Priscila con Aquila ni rëbaman, dxel bignë reeman laaman lidx reeman. Ni balüü reeman laaman persi basnuu basiidaman mazri xtiidx Dios. ²⁷ Chi been Apolos xgab cheman niz Acaya, gra ree bèn rliladx Jesucrist bèn za'në laaman, badxe' reeman luxdooman din cheman, abi' guxhaal reeman tijb

gui'ch loj ree bén rliadx Jesucrist bén zojb ree niz Acaya din yaca' reeman laaman zagdx chi guidxinman niz ni. Chi bidxinman niz Acaya dád beenman yudar bén ma rliadx ree Jesucrist guial gognë Dios laa reeman. ²⁸ Din delant loj gra ree bejn rëbaman guial ad laat zë ree bén Israel, abi' achutczi gojc nadxi' xtiidxaman guial graczi ni rëbaman naj diidxli, balüü tëëman loj xtiidx Dios gra luar lod rëb guial Jesús naj Cristo bén gulëjz reeman.

19

Bidxin Pab Éfeso

¹ La'tgaj za' Apolos Corinto, wej Pab guiedx riga' ree niz ruguia', abi' bidxinman Éfeso, yagaj bidx-aaglojman bëlzi ree bén rliadx Jesucrist. ² Abi' gunabdiidxaman loj reeman rëbaman:

—¿Guyu xSprijt Dios luxdoodi ya chi bililadxidi?

Badxi' reeman laan rëb reeman:

—Ni'quid waguiejntan guial yu' xSprijt Dios.

³ Dxel rëb Pab loj reeman:

—¿Xhieza naag gurobnijsidi?

Badxi' reeman laan rëb reeman:

—Barobnijsan zi'c balüü Waj bejn ree.

⁴ Dxel rëb Pab loj reeman:

—Walican baroobnijs Waj bejn, bén bayüjn ree xgab por xtol reeman. Per rëbaman guial rayal chililadx reeman bén zëed xijchaman abi' laaman naj Jesús, bén naj gajc Cristo.

⁵ Chi biguiejn reeman zian, dxel gurobnijs reeman por Dad Jesús. ⁶ Abi' chi guxhoob yaa Pab guijc reeman, dxel guyu xSprijt Dios luxdoo reeman, zianz guzuloj canee reeman diidx ren ree.

Dxel guzuloj cudëed reeman xtiidx Dios loj ree bejn. ⁷ Loj gra reeman naj cost chiptio'p xinguaaw.

⁸ Choon bëew wej Pab lën xyadoo ree bën Israel zojb ni. Sin guialrdxeb guneenëman laa reeman xtiidx Dios, guneenëman laa reeman abi' beenman naguejn din güünman gan chililadx reeman xhienaag naj xguialrniabee Dios. ⁹ Per garol reeman gojc nad ad guyënt reeman nililadx reeman, al guzuloj gunee reeman diidxguijdx por xtiidx Jesucrist delant loj ree bejn. Dxel bariica Pab loj reeman con ree bën ma rliladx Jesucrist, binëman laa reeman lën tijb xzcuel bën la Tiranno. Ni balüüman laa reeman guixie guixie, ¹⁰ loj tio'p iiz beenman zian. Abi' graczi ree bën zojb niz Asia, zi'c ree bën Israel zi'c ree bën ad najt bën Israel, bacaagdiajg reeman xtiidx Dad Jesucrist. ¹¹ Abi' por xguialrniabee Dios been Pab milagr narooob ree, ¹² xt ree xbay Pab në ree lajd rtia lojman zi'c lantar rignë reeman loj ree bënragxuu, abi' rayajc reeman guialguijdx ni rajc reeman, rarii tëë ree xindxab yu' luxdoo reeman.

¹³ Per guyu bëlzi ree bën Israel ziza rabëë reeman xindxab luxdoo ree bejn, abi' guyën reeman nüjnnë reeman dxiin laj Dad Jesucrist dxel rëb reeman loj ree xindxab guin:

—¡Por Jesús bën ruza't Pab, rniabeen lëjt, gol barii!

¹⁴ Zian naj ni been gajdx ree xi'ngaan tijb bën Israel la Esceva, bën goc tijb bixhioz rniabee ree bixhioz. ¹⁵ Per tib volt tijb ree xindxab guin badxi' xtiidx reeman rëbaman:

—Nünbeen Jesús ragbee tëen chunin naj Pab, per lëjt ni'quid nünbeetan lëjt.

¹⁶ Abi' bën yu' xindxab guin luxdoo guzuloj caguinman laa reeman, con gojl ni yu'man beenman laa reeman gan. Dád gudijnman laa reeman abi' baxüün reeman barii reeman lënü guin, ziladzi reeman nadxeelguijdx tëë reeman. ¹⁷ Graczi ree bën zojb Éfeso, zi'c ree bën Israel zi'c ree bën ad najt bën Israel, gogbee reeman gojc zian, dxel dád bidxeb reeman abi' baza't reeman Dad Jesús zagdx.

¹⁸ Në zien ree bën riladx Jesucrist bidxin abi' delant loj gra ree bejn baneero' reeman gra ni mal ma been reeman. ¹⁹ Nëtëë zien ree bën been guialbidxaa bidxinnë xlibr reeman abi' baze'c reeman laa reen delant loj gra ree bejn. Chi babëë reeman cwent plac lasajc ree libr guin dxel cost tü'pchii mil milia plajt lasajc reen. ²⁰ Abi' zian bire'ch xtiidx Jesucrist biguien tëë xguialrniabeeman.

²¹ Chi ma gudëd gojc zian, been Pab xgab cheman niz Macedonia në niz Acaya xt yadxinman Jerusalén. Rëb tëëman guial chi ma wejman Jerusalén dxelri cheman në Rom. ²² Abi' guxhaalaman tio'p bën rüjn laaman yudar, Timoteo con Erasto, persi wej reeman niz Macedonia la'tgaj baya'nman mazri niz Asia.

Gojc nadxeb Éfeso

²³ Lën ree dxej zii been ree bën Éfeso nadxeb por xtiidx Jesús. ²⁴ Din Demetrio, bën rüjn ree ni plajt, rüjnman figur plajt ni naj ree form xyadoo dios la Diana, ragbeeman guial dád rüjnman gan con ree bën rüjnnëman dxiin. ²⁵ Dxel bato'paman

laa reeman con ree ben ren b́en rŭjn gajc ree lasa' dxiin guin, abi' rēbaman loj reeman:

—Gol bacaagdiajg, lējt ragbee guial loj dxiin guie raguieen ree gan milia ro'. ²⁶ Per yan lējt ruguiaa rigueijn tēēdi, Pab ziza cayēbix guial dios ni rŭjn ree bejn ad diost reen. Abi' zian cayujnx gan caliladx zien ree bejn laax, ad tijbtizi luguedx guie, nē guidib niz Asia. ²⁷ Dxel nadxeb yasēēb dux chiin ree, abi' ad tijbtizi dux chiin ree, nē xyadoo dios Diana ad zayagbeetri ree bejn laan zi'c nŭnbee reeman laan yan abi' achutri guidxga' xguialrniabee dios Diana, b́en rēn ree bejn guidib niz Asia nē guidib loj guidxliuj.

²⁸ Chi bigueijn reeman zian, bidxe'ch reeman abi' gurixdiaj reeman rēb reeman:

—jB́en zojbloj naj Diana, xdios ree b́en Ēfeso!

²⁹ Abi' gurixdiaj ree b́en guiedx guin wajs reeman, gunaaz reeman tio'p ree b́en Macedonia, Gayo nē Aristarco, b́en rzanē ree Pab. Dxel guxoobyuj reeman laa reeman, binē reeman laa reeman lod rajc xgabilt ree b́en guiedx. ³⁰ Guyēn Pab niuman yagaj din ninieenēman bejn ree, per ad cwējbt ree xcompniaraman, b́en ma rliladx ree Jesucrist. ³¹ Nētēē loj ree guxtis Asia guin no'ch b́elzi ree xmiw Pab, laa reeman guxhaal ruson lojman guial mejorli ad chu'man ni. ³² Zianz gurixdiaj ree b́en guin rēb reeman ni rent ni ren, been reeman nadxeb abi' zien reeman ni'quid ragbeet par xhie bado'p reeman yagaj. ³³ Dxel galay ben zien guin babēē ree b́en Israel tijb xcompniar reeman b́en la Lejandr din guinieenēman b́en guin ree. Dxel beenman sen loj ree b́en guin din yacwēēz ro'

reeman din guinieeman por ree bén Israel delant loj ree bén guiedx guin. ³⁴ Per chi gogbee reeman guial najman bén Israel, tiblazujzi gurixdiaj reeman cost tio'p hor, rëb reeman:

—¡Bén zojbloj naj Diana, xdios ree bén Éfeso!

³⁵ Dxel chi been squiarban luguedx guin gan bacwëöz ro' reeman, dxel rëbaman:

—Bén Éfeso, gra bénguidxliuj ragbee guial luguedx guie zianczi rnij ree bejn xyadoo dios Diana abi' rën tää ree bejn dios Diana biajb xanyabaa. ³⁶ Lëjt ragbee guial laan naj ni diidxli, zeel ad rayalt güündi zian, ad gontzi güündi xhienin sin xgab. ³⁷ Din bén bidnëdi achet ni mal been reeman yadoo guin, ad wanee tää reeman diidxguijdx dux dios ree. ³⁸ Bal Demetrio con ree xcompniaraman bén rüjnnëman dxiin rajp reeman wadijl con ree ben ren, laa roylay naj, laa ree guxtis yu', ni che reeman chitawquia reeman. ³⁹ Per bal xhieri mazri rëndi, chi gac xgabilt bén guiedx dxel gacan reglad. ⁴⁰ Yan, por ni ma gojc, nadxeb na gobiarn guial dunuj ree caylu' ree bejn diidx din güün reeman wadijl guin, ¿abi' xhieza yaguie'ch ree loj reeman bal guiniabdiidx reeman duloj ree xcwent ree ni cayajc?

⁴¹ Chi gulox rëbaman zian, dxel bare'ch reeman.

20

Wej Pab Macedonia në Grecia

¹ Chi babedxe ree bén Éfeso, gurejdx Pab bén rililadx ree Jesucrist persi bagu'man luxdoo reeman. Dxelri bazaadiidxnëman laa reeman abi' zëman niz Macedonia. ² Bitixlojman bén rililadx

ree Jesucrist guidib niz ni, dád bagu'man luxdoo reeman con xtiidxaman, dxelri bidxinman Grecia ³ lod guzuman choon bëëw. Ma niuman loj barcw din niejman Siria, chi gogbeeman guial nuyën ree bën Israel nüjn reeman laaman xhienin. Dxel mejorli beenman xgab bayejcaman niz Macedo-nia. ⁴ Binëman Sópater, bën Berea, xi'ngaan Pirro, në Aristarco con Segundo, bën Tesalónica ree, nëtëë Gayo, bën Derbe, con Timoteo, në Tíquico con Trófimo, bën niz Asia ree. ⁵ Gra reeman guned abi' gulëjz reeman Pab con naj Lujc guiedx Troas. ⁶ Guiáad dunujn chi gudëd lanij ni raw ree bën Israel guiadxtil ni ad yu't levadur, dxel badxu'n loj barcw badxoon Filipos, abi' ni goc gaay dxej badxinan guiedx Troas lod za' reeman. Ni badxu'n gajdx dxej.

Basban Pab Eutico

⁷ Chi bidxin chidumingw, badxajg du lasa'n din yadaawan guiadxtil tijbzi, abi' guial mal been Pab xgab guial yareguiaal griiman, chi bidxin garol guiaal sta caneenëman bejn ree, ⁸ guiáad lënü la-dya lod rado'pan dád zien ree guij re'c. ⁹ Tijb xinguiag zobj ro' ventan lax Eutico. Guial xchej da't guneenë Pab laa reeman, dxel xt garej gunaaz bacaal xin guin, abi' gudidya'x diizd yu bayon guin xt luyuj, ma güjtix chi bales reeman laax. ¹⁰ Dxel biguiajt Pab lod naga'x, bazuxibaman abi' gudiidxaman laax, dxel rëbaman loj reeman:

—Ad rdxebidi, nabanquix.

¹¹ Dxel bayë'p Pab zatijb, gula'man guiadxtil abi' gudaw reeman, dxel basnuu guneenëman laa

reeman xt bareguiaal. Chi bareguiaal bayune-
jzaman ziaman. ¹² Abi' xin gudidya' ro' ventan
guin, nabanx zigné reeman laax, dxel dád nix yu'
luxdoo reeman.

Wej Pab Mileto

¹³ Dxel dunujn badxu'n loj barcw baneedan
bio'n par luguiedx Asón, lod baya'nan diidx yaca'n
Pab, din beenman xgab nej guia'man ni. ¹⁴ Chi
badxajg du lasa'n con laaman luguiedx Asón, dxel
badxu'ně'n laaman loj barcw bio'n lod la Mitilene.
¹⁵ Ni badxoon, chi bareguiaal badüüdan niz lod la
Quío. Chi bareguiaal stijb badxinan lod la Samos.
Dxel chi bareguiaal stijb badxinan Mileto, per
chi gad yagaj guidxin badxu'dxen lod la Trogilio.
¹⁶ Been Pab xgab ad zejtaman Éfeso, ad guyëntaman
niaglaaman niz Asia guial nuyënman diob nadxin-
man Jerusalén, din xixgabaman naj guial bal zajc
yadxinman lanij Pentecostés.

Bazaadiidxně Pab bejn ree Mileto

¹⁷ Chi nadxu'n Mileto, gunabee Pab bi't ree bën
rniabee loj ree bën rliladx Jesucrist, bën zojb ree
Éfeso. ¹⁸ Chi bidxin reeman dxel rëbaman loj ree-
man:

—Diizd dxej yaloy ni bialan niz Asia xt yan, lëjt
ragbee xhienaag cayünan. ¹⁹ Loj guidib tiamp
ni za'ně'n lëjt cayünan sirv Jesucrist con pasens,
majsi xt ronan abi' gra loj guialzi ma gudëedan por
ni rën ree bën Israel güünně reeman naj. ²⁰ Per
majsi zian ad bacwëët rnin lojdi ni naj ni zagdxe
par lëjt, tant delant loj ree bejn ně lidxidi balün
lëjt. ²¹ Abi' zi'c ree bën Israel ně ree bën ad najt
bën Israel, ma rën loj reeman din yayüjn reeman

xgab por xtol reeman yadxi' tée loj reeman loj Dios chililadx tée reeman Dad Jesucrist. ²² Yan ma yaya'n Jerusalén lod caxhaal xSprijt Dios naj, ad ragbeetan xhie cabéz naj ni. ²³ Tijbzi ni ragbeen naj guial guidib lod ran rugojn xSprijt Dios naj guial ladxguiib në zro' da't guialzi naj ni cabéz naj. ²⁴ Per par naj achet güünan por zian, majsi guiëtan per con nix yu' luxdon cayünan ni rayal günan xt lod gactizan, gün tée mandad ni banee Dad Jesús naj guial gatiechan xtiidxza'caman xhienaag rën Dios dunuj ree.

²⁵ 'Yan naj ragbee guial ni'qui tijbidi bën ma ben diidx loj xhienaag naj xguialrniabee Dios, ad zuguaatrudi naj. ²⁶ Zeel ganin lojdi yan guial ad achetri dol ra'pan bal id nabandi xnejz. ²⁷ Din ma bagojnan lëjt gra xhienaag naj xixgab Dios achetzi baquiechan. ²⁸ Yan, gol gojp lëjt gajc, gol gojp tée ree bën rliladx Jesucrist, bën ma banee xSprijt Dios lojdi din guiniadi laa reeman zi'c tijb bën rajp xiil ree, din Jesucrist con xrejnman ma gudixaman por xtol reeman. ²⁹ Naj ragbee guial chi yazaan gui't ree ben ren zi'c gajczi rtie'ch cuyojt xiil ree, zian naj xixgab reeman güünnë reeman bën rliladx ree Jesucrist. ³⁰ Loj gajquidi grii ree bën gulüü ganax ni rusquiee, din güün reeman gan güüncwent ree bën rliladx Jesucrist xtiidx reeman luar güüncwent reeman xtiidx Dios. ³¹ Zeel gol guzujsin, gol gojp cudad, gol basaaladx, loj choon ijz ad bacwëëzt gunenë'n lëjt xt ronan banen lëjt consejw.

³² 'Yan, compniar raliduladx ree Jesucrist, gusa'nan lëjt con Dios con xtiidxza'caman. Laan

rajp guialrniabee par gagnën lëjt, din gusnuu gagbeedi xhienaag rënman guibandi gunee tëëman lojdi ni ma rëbaman gudëédaman loj ree bën ma naj xbejnman. ³³ Achut xmilia achu tëët xab rzëëbladxan. ³⁴ Lëjt ragbee zagdxe guial con quijb yan benan dxiin persi gudawnë'n bën guzu ree con naj. ³⁵ Abi' balün lëjt guial zian rayal güün bejn dxiin din güünman yudar bën ryaadx ree xhienin. Gol basaaladx xtiidx Dad Jesús chi rëbaman: “Mazri nix yu' luxdoo bën razaladx guial loj bën rtia'.”

³⁶ Chi gulox rëb Pab zian, dxel bazuxibaman gurejdx gunabaman Dios con gra reeman. ³⁷ Gra reeman biin, gudiidx reeman Pab abi' gudaw reeman laaman xid. ³⁸ Dád guyunaya reeman por ni rëbaman loj reeman guial ad zuguaatri reeman laaman. Dxel biglu'nejz reeman laaman xt lod za' barcw.

21

Wej Pab Jerusalén

¹ Ni basa'nan laa reeman, abi' badxu'n loj barcw bio'n tibli niz Cos, yuj riga' loj nijsdoo. Chi bareguiaal badxinan niz Rodas nëgajcan riga' loj nijsdoo, abi' ni badxoon bio'n guiedx Pátara. ² Ni badxaaglojn tijb barcw ni ma che niz Fenicia zianz badxu'n lojn. ³ Chi zio'n dxel dux lad ruvejsan baguiaan lod la Chipre, basnuu bio'n niz Siria. Abi' guial naj lat barcw guin luguiedx Tiro dxel badxu'n luguiedx guin. ⁴ Ni badxaaglojn bën rliladx ree Jesucrist abi' badxu'në'n laa reeman gajdx dxej. Bën guin ree por xSprijt Dios rëb

reeman loj Pab guial ad bal cheman Jerusalén. ⁵ Per chi baza' gajdx dxej guin, dxel badxoon luguiedx guin, dxel gra reeman con xbéngunaa reeman con xi'n reeman, biglu'nejz reeman dunujn xt ro' nijsdoo. Ro' nijs guin badxu'xiban barejdx banaaban Dios. ⁶ Dxel bazaadiidxnë'n laa reeman abi' badxë'pan loj barcw guiáad laa reeman zia lidx reeman.

⁷ Chi badxoon luguiedx Tiro bio'n luguiedx Tolemaida, ni gulox dux viajn loj barcw, bio' tēen bugneenë'n bēn zojb ree ni, bēn rliladx ree Jesucrist abi' baya'nan con laa reeman tib dxej. ⁸ Chi bareguiaal, dunujn con Pab badxoon Tolemaida bio'n Cesarea lod bio'n lidx Felip, bēn rtie'ch xtiidx Jesucrist. Felip guin naj tijb ree bēn gajdx cwabee din qui's reeman ni rayal tia' ree bēnprob abi' baya'nan lidxaman. ⁹ Yu' tajp xi'ndxa'paman bi-inxtijb ree abi' laa reem rudēēd xtiidx Dios loj ree bejn. ¹⁰ Ma gojc zien dxej nadxu'n lidx Felip, chi bi't tijb bēn la Agabo nēgajcaman rudēēd xtiidx Dios loj ree bejn, zēēdaman niz Judea. ¹¹ Chi bi'taman cwa'man xcinch Pab guxhii guia' gajcaman con yaaman, abi' naman:

—XSprijt Dios na guial Jerusalén ze guixhii ree bēn Israel bēn naj xcinch ni guie, abi' yayü reeman laaman loj ree bēn ad najt bēn Israel.

¹² Chi baguiejnan zian, dunujn con ree bēn rliladx Jesucrist luguiedx guin baguieenan naguiejn loj Pab ad cheman Jerusalén. ¹³ Per badxi'man laan, naman:

—¿Chexc zeel roondi abi' rgu' nayadi naj? Par naj achet güünan majsi guixiin o majsi guiëtan Jerusalén por Dad Jesús.

14 Chi bayagbeen guial ad zaguieentan gan yadsoonan laaman chitëë cheman, achetri baguie'chan lojman, tijbzi ni raguie'chan lojman: —Gac zi'c rniabee Dios.

15 Chi gudëd ree dxej guin dxel baguieenan purvinid bio'n Jerusalén. 16 Bunë'n bëlzi ree bën Cesarea rliladx ree Jesucrist, laa reeman binë dunujn lod baya'nan lidx tijb bën Chipre, ma gojc xchej rliladxaman Jesucrist, laman Mnasón.

Bignaj Pab Jacob

17 Abi' ree bën Jerusalén rliladx Jesucrist dád nix guyu luxdoo reeman baca' reeman dunujn. 18 Chi bareguiaal bunë'n Pab bugnajn Jacob, ni riga' gra ree bën rniabee loj ree bën rliladx Jesucrist. 19 Chi gulox bagajpdiozan laa reeman, dxel bagojn Pab laa reeman tijb gaj ni beenman por xguialrniabee Dios delant loj ree bën ad najt bën Israel. 20 Chi biguiejn reeman zian, baza't reeman Dios zagdxë, zianz rëb reeman loj Pab:

—Lüj ragbee guial entr loj ree bën Israel zien da't reeman ma bililadx Jesucrist, abi' gra reeman rëb guial rüjn naguiejn güün bejn zi'c rniabee xley Moisejs. 21 Ma biguiejn tëë reeman guial lüj culüü bën Israel ree, bën ad zojbt ree loj nacion Israel guial ad züjncwentt reeman xley Moisejs, rëb tëël loj reeman guial ad rüjnt naguiejn chu' xi'n reeman sen ru ree bën Israel ad zinal tëët reeman dux costumbr ree. 22 Yan, ¿xhienaag gac? Laa reeman guchajgczi lasa' reeman chi gagbee reeman guial ma bi'til. 23 Zeel mejorli güünl ze: Yu' tajp ree xin no'ch du lojn xin rayal ree güün cumplid ni cwëb reex loj Dios. 24 Binë reex, gol been zi'c rëb loj ley

din gaquidi naya, gudijx tée por laa reex din gac ya guijc reex. Zian gagbee gra bejn guial rüjnquil zi'c rniabee ley, guial ad wali téeet ni biguiejn reeman xcwentil. ²⁵ Abi' por ree bèn ad najt bèn Israel, bèn ma bililadx ree Jesucrist, ma baxhaalan tijb gui'ch loj reeman zi'c baguieenan xgab guial ad rayalt chu' reeman xgab por xley Moisejs. Per ad rayalt gaw reeman ni rbej loj ni naj ree xdios reeman, ad gaw tée reeman rejn ni'qui bëel rberejn, ad sunè tée reeman ben ren bèn ad najt lacheel reeman.

Gunaaz ree bèn Israel Pab

²⁶ Dxel binè Pab guidap ree bèn guin, abi' chi bareguiaal been reeman zi'c rniabee ley par gac reeman naya. Dxel guyu reeman lèn yadooro' Jerusalén din gugojn reeman goc yayaaloj dxej güün reeman zi'c rniabee ley, dxej rayal chinè tijb gaj reeman tijb be guièt zi'c tijb gon par Dios.

²⁷ Chi ma yayaaloj gajdx dxej ni naj güün reeman zi'c rniabee ley, yu' ree bèn Israel zëed niz Asia, baguiaa reeman Pab lèn yadooro' Jerusalén abi' gurixdiaj reeman wajs reeman, gunaaz reeman laaman, ²⁸ rëb reeman:

—¡Bèn Israel, gol been yudar! Xin guie naj xin ziza gra lad caneeguidxix bèn Israel ree nè dux yadoo ree, rëb téeex loj ree bejn guial ad güün reeman zi'c rniabee dux ley ree. Abi' ad tijbtzi laan, nè ma badxe'x bèn ad najt ree bèn Israel lèn dux yadoo ree ni naj ni nada par dunuj ree ma beenx laan zi'c tijb luar ad rüjnt sirv.

²⁹ Rëb reeman zian guial baguiaa reeman Pab zizaman ni con tijb bèn Éfeso bèn la Trófimo, zeel

gunaladx reeman binë Pab laaman lën yadooro' Jerusalén.

³⁰ Dxel been reeman nadxeb guidib luguiedx guin, ruxüün ree bejn bidxin reeman. Abi' gunaaz reeman Pab, guxoobyuj reeman laaman babëë reeman laaman lën yadoo guin laa basiaaw gajc reeman port guin ree. ³¹ Za mer nugüjt reeman laaman, chi bidxin ruson guin loj suldad rniabee ree suldad guial gra ree bën Jerusalén cayüjn nadxeb. ³² Laa bato'p gajc suldad rniabee guin xsuldadix në za tio'p choon ree suldad rniabee, baxüün reex wej reex lod riga' ree bën guin. Chi baguiaa ree bën guin bidxin suldad rniabee guin con ree xsuldadix, dxel bacwëëz gudijn reeman Pab. ³³ Dxel gubig suldad rniabee guin, gunaazix Pab gunabeex guxhii reex laaman con tio'p caden. Abi' gunabdiidix chu laaman xhie tëë beenman. ³⁴ Per gurixdiaj reeman rëb reeman garent garen, guial rbixdiaj da't reeman achet gojc niagbeex, dxel gunabeex bignë reex Pab lod yu' ree suldad. ³⁵ Chi bidxin reex loj ree scliar lod yu' ree suldad guin, gulejn reex Pab guial dád nadoxh rüjn ree bën zien nal laa reex, ³⁶ abi' gra reeman rbixdiaj, rëb reeman:

—¡Gol bagüjtix!

Gunee Pab loj ree bejn

³⁷ Chi ma chu'në reex Pab lod yu' ree suldad guin, gunabdiidxaman loj suldad rniabee guin, rëbaman:

—¿Zajc ganenë'n lüj ya?

Badxi' suldad guinan rëbix:

—¿Rajc rnieel diidx grieg ya? ³⁸ ¿Nid lüj naj xin Egipto guzu contr gobiarn ya, abi' laa bigxüün gajquil niz loj yujbidx con tajp mil ree xbejn, bën bagüjt ree bejn?

³⁹ Dxel rëb Pab lojx:

—Bën Israel naj. Goolan luguiedx Tarso tijb ree guiedx zojbloj ni riga' niz Cilicia. Baneesii mod ganenë'n bën guie ree.

⁴⁰ Dxel cwëjb suldad guin, abi' guzuli Pab loj ree sclar guin beenman sen loj ree bën guin con yaaman din yacwëöz ro' reeman. Chi bacwëöz reeman, dxel guneenëman laa reeman diidx hebreo, rëbaman:

22

¹—Lëjt bengol në los demazridi, gol bacaagdiajg ni ganin por naj.

² Chi biguiejn reeman caneenëman laa reeman diidx hebreo, mazri bacwëöz reeman. Abi' basnuman rëbaman loj reeman:

³ —Bën Israel naj. Goolan luguiedx Tarso tijb guiedx riga' niz Cilicia, per Jerusalén guie guni'san. Abi' mextr Gamaliel balüü naj gra zi'c naj xley dux bën gulal ree. Guiáad naj guidib luxdon benan xgab güünan sirv Dios zi'cgajc lëjt yan. ⁴ Dxel guzunaalan bën rliladx ree Jesucrist, xt bagüjtan laa reeman abi' zi'c ree béngunaa zi'c ree xinguaaw gunaazan badxe'n ladxguuib. ⁵ Bixhioz mazri zojbloj rniabee graczi ree bixhioz në gra ree guxtis Israel ragbee guial najn ni wali. Din laa reeman banee tijb gui'ch par gulün loj du lasa' bën Israel ree, bën zojb ree luguiedx Damasco din chile' yaguilan bën rliladx ree Jesucrist luguiedx

guin, ganaaz tëen laa reeman guidnë'n laa reeman Jerusalén din tëd reeman casti.

*Be Pab diidx xhienaag bililadxaman Jesucrist
(Hch. 9:1-19; 26:12-18)*

⁶ 'Per chi za'n lunejz par Damasco, chi ma caxinan ni cost garol dxej, dxejczy brii tijb guij xanyabaa balaan bacha' guidibczy lod cazaan, ⁷ abi' breeyujn. Dxel biguiejnan cha' bën na: "Saulo, Saulo, ¿chexquiza zeel rzunalil naj?" ⁸ Abi' gunabdiidxan rën: "¿Chu lüj Dad?" badxi'man laan naman: "Naj naj Jesús, bën Nazaret, bën rzunalil." ⁹ Bën zinë' reen baguiaa reeman bacha' guin abi' bidxeb reeman, per ad bignia't reeman ni na cha' bën gunee naj. ¹⁰ Dxel gunabdiidxan rën: "¿Xhie rayal günan Dad?" Abi' na Dad Jesucrist lon: "Bixche, basnuu xnejzil wej Damasco. Ni na reeman gra ni rayal güünl." ¹¹ Abi' guial bascajy bacha' guin lon, dxel bën zinë' reen gunaaz reeman yan, binë reeman naj luguiedx Damasco.

¹² 'Ni zojb tijb bën la Ananías, rüjnman cumplid gra zi'c rniabee xley Moisejs. Abi' gra ree bën Israel zojb luguiedx Damasco nünbee laaman guial nabanman xnejz. ¹³ Ananías guin bidganaj naj, chi bi'taman naman lon: "Saulo, ma zajc yaguaal stijb." Loj hor guin gajc baguian stijb abi' baguian laaman. ¹⁴ Dxel naman lon: "XDios dux béngulal ree ma bacaabee lüj din gagbeel xhie rënman güünl, abi' guguaal Jesucrist guien tëël cha'man, bën rüjn zi'c rayal. ¹⁵ Din chigneel xtiidxaman loj gra ree bénguidxliuj, gü tëël diidx loj reeman ni baguiaal ni biguiejn tëël. ¹⁶ Yan, ad rbëzil mazri,

guzuli gurobnijis tëë gurejdx gaj Dad Jesucrist din chisüdaman xtolil.”

Be Pab diidx xhienaag wejman loj ree bén ad najt bén Israel

¹⁷ 'Chi baguialan Jerusalén, wan lèn yadooro' persi guredx gunaaban Dios, abi' guza'can zi'c rulüü cane'xhchalan. ¹⁸ Baguian Dad Jesús naman: “Baquiejn. Cari barii Jerusalén, din ad züjncwentt reeman ni guiëbil por naj.” ¹⁹ Abi' rën lojman: “Dad, laa reeman ragbee guial naj wa gra lèn ree yadoo gunaazan bén riladx ree lüj, badxe'n laa reeman ladxguiib gudin tëën laa reeman. ²⁰ Në chi bagüjt reeman Esteban, bén gunee xtiidxil, laagajc naj za' ni rën zagdxë naj guiëtaman abi' xt gunan xab ree bén bagüjt laaman.” ²¹ Per na Dad Jesús lon: “Wej, naj gaxhal lüj zijt loj ree bén ad najt bén Israel.”

Badxe' reeman Pab lod yu' ree suldad

²² Xt quintzi naga'loj bacaagdiajg reeman ni rëb Pab dxel guzuloj gurixdiaj reeman rëb reeman:

—¡Ad rayalt guiban xin guin! ¡Gol bagüjtix!

²³ Abi' guial cabixdiajz cabixdiaj reeman, ruzaal xab reeman niz ladia ruzaal tëë reeman yuj niz ladia. ²⁴ Dxel gunabee suldad rniabee guin cu' reeman Pab lod yu' ree suldad abi' gunabeex qui'n reex laaman din yaneero'man chexc zeel rbixdiaj ree bén guin zian contr laaman. ²⁵ Per chi guxhii reex Pab din quin reex laaman, rëbaman loj tijb ree suldad rniabee za' ni:

—¿Zajc quindi tijb bén Rom ya, chi gadidi gagbee xhie beenman?

²⁶ Chi biguiejn suldad rniabee guin zian, dxel bicojnx suldad rniabee ree suldad guin, rëbix lojx:
—Gojp cudad ni güünnël xin guin, din xin Roman.

²⁷ Dxel wej suldad rniabee guin lod za' Pab, abi' gunabdiidxix lojman rëbix:

—¿Walin ya xin Rom lüj?

Badxi' Paban rëbaman:

—Walican.

²⁸ Abi' rëb suldad rniabee guin lojman:

—Naj zro' milia gudixan par gacan xin Rom.

Abi' badxi' Paban rëbaman:

—Per naj diisd goolan najn bén Rom.

²⁹ Chi biguiejn ree suldad niguin Pab, guial Bén Rom najman, laa bisüd gajc reex. Xt në suldad rniabee guin bidxeb chi gogbeex guial ben Rom naj Pab guial gunabeex guxhii reex laaman.

Bazuj reeman Pab loj ree guxtis

³⁰ Chi bareguiaal, guyën suldad rniabee guin niagbeecheawix chexc zeel za' ree Bén Israel contr Pab. Abi' baxhiequix Pab, dxel gunabeex bado'p ree bixhioz rniabee ree bixhioz në ree guxtis. Abi' babëëx Pab bazujx laaman loj gra reeman.

23

¹ Baguiaa Pab loj ree guxtis guin, abi' rëbaman:

—Compniar Israel, loj guidib ni nabanán xt yan, achet naladxan delant loj Dios din naj ragbee xhienaag nabanán.

² Dxel Ananías, bixhioz mazri zojbloj rniabee graczi ree bixhioz, gunabeeman Bén za' ree gajxh cwë' Pab din ca'p reeman ro'man. ³ Per badxi' Paban rëbaman loj bixhioz guin:

—¿Ziangajc ca'p Dios ro'l, bén rusquiee! ¿Id zobjil yagaj ya par güünl guialguxtis zi'c rniabee ley? Abi' ¿chexquiza zeel rüjnl zi'c ad rniabeet ley, rniabeel ca'p reeman ro'n?

⁴ Abi' ree bén za' yagaj rëb reeman lojman:

—¿Zian rusaglojl xbixhioz zobjloj Dios ya?

⁵ Dxel rëb Pab:

—Gol been perdon, ad gogbeetan guial laaman naj bixhioz mazri zobjloj. Din loj xtiidx Dios rëb: “Ad gusaglojl bén rniabee ladxil.”

⁶ Chi gogbee Pab guial garol reeman naj bénsaducew za garol reeman naj bénfarisew, dxel guneeman rejs rëbaman:

—Naj naj bénfarisew, xi'n bénfarisew naj. Abi' guial rliladxan yaban ree bengüt zeel za' ree bejn contr naj.

⁷ Chi rëbaman zian, guzuloj cadildiidx ree bénfarisew con ree bénsaducew abi' gojc reeman tio'p lala'. ⁸ Din bénsaducew ree ad rliladxt reeman guial yaban ree bengüt, ad rliladx tëët reeman guial yu' ree anjl në ree sprijt, per ree bénfarisew rliladx reeman gra ree ni guin. ⁹ Abi' been reeman naquie' yagaj. Dxel guzuli bëlzi ree bénfarisew naj mextr rulüü ley, rëb reeman:

—Achet ni mal wayüjn bén guie. Wed tijb sprijt o tijb anjl gune laaman, gol gojp cudad ad niad contr Diosan nadxu' ree.

¹⁰ Chi baguiaa suldad rniabee guin mazri cadildiidx reeman, dxel bidxebix nuroox reeman Pab. Abi' gunabeex bi't ree suldad din yabëë reex laaman galay ree bén guin, chinë tëë reex laaman lod yu' ree suldad stijb.

¹¹ Chi gure guiaal stijb, balüüloj Jesucrist loj Pab, rëbaman lojman:

—Bagu' luxdool Pab, din zi'c guneel por naj luguiedx Jerusalén guie, ziangajc guinieel por naj luguiedx Rom.

Been reeman xgab gugüjt reeman Pab

¹² Chi bareguiaal, garol ree bën Israel baya'n reeman diidx din gugüjt reeman Pab, rëb tée reeman guial achet gaw reeman achet tëet guië' reeman xt gugüjt reeman laaman. ¹³ Nadëd tiuu naj ree bën rëb zian. ¹⁴ Abi' wej reeman bigneenë reeman bixhioz ree bën rniabee ree bixhioz në ree xbengol ree bën Israel, rëb reeman loj reeman:

—Dunujn ma raguie'ch guial achetdzi yadaawan xt chi ma bagüjtan Pab. ¹⁵ Yan lëjt con gra ree guxtis, gol gunab loj suldad rniabee guin din guidnëx laax lojdi guixie, con gol badxiib guijc guial rëndi gagbeechaawidi xhienaag naj xcwentix. Abi' dunujn ma yadxu'sinan din yagüjtan laax chi gadix gui't guie.

¹⁶ Per xi'ngaan bizan Pab biguiejnx guial cayëb reeman zian, dxel wejx lod yu' ree suldad bicojnx Pab. ¹⁷ Zianz gunee Pab tijb ree suldad rniabee guin, rëbaman lojx:

—Binësii xin guie loj suldad rniabee din gudëëx tijb ruson lojman.

¹⁸ Binë xin suldad guin laax loj suldad rniabee guin, rëbix lojx:

—Pab, xin yu' ladxguiib guredx naj abi' gunabix guidnë'n xin guie lojl din guneex tijb ruson lojl.

¹⁹ Abi' suldad rniabee guin gunaazix yaa xin guin, binëx laax tibladd, gunabdiidixix lojx rëbix:

—¿Xhie rēnl nal lon?

²⁰ Abi' rēb xin guin lojx:

—Bén Israel ree ma baya'n reeman diidx din guiniab reeman lojl guixie din chinēl Pab loj ree guxtis, con gudxiib reeman guijc guial rēn reeman gagbeechaaw reeman xhienaag naj xcwentaman.

²¹ Per ad bal chililadxil laa reeman, din nadēd tiuu naj ree bēn cwēz laaman guquie'chloj reeman lunejz, abi' ma rēb reeman guial achet gaw reeman ache tēet guiē' reeman xt gugūjt reeman laaman. Yan za'sin reeman cabēz reeman ni guiēbil.

²² Dxel rēb suldad guin loj xin guin:

—Baguiaj. Achu loj guiēbil ni ma nal lon.

Guxhaal reeman Pab loj gobernador Félix

²³ Dxel gunee suldad rniabee guin tio'p ree xsuldadix, abi' gunabeex laa reex din güün reex porvinid tio'p gayuu suldad che guia', nē za gayojnchii ree suldad cwib way, zatio'p gayuu ree suldad tia' lans din che reex Cesarea raca gaa guxhin. ²⁴ Abi' gunabee tēēx güün reex porvinid way cwib Pab, rēbix loj reex guial guinia reex Pab din guidxinman zagdxē loj gobernador Félix.

²⁵ Abi' guxhaalnēx laa reex tijb gui'ch ni rēb:

²⁶ “Naj Claudio Lisias, rugajpdiozan lūj gobernador Félix, lūj guial najl bēn zojbloj. ²⁷ Bén Israel ree gunaaz xin guie ma nugūjt reeman laax. Per chi gogbeen guial xin Roman, dxel wan con ree da suldadan buglēēn laax loj reeman. ²⁸ Abi' guial rēnan gagbeen xhie rūjnx zeel rdxe'ch reeman laax, dxel bazun laax loj ree guxtis Israel.

²⁹ Dxel gogbeen guial por xcwent xley reeman zeel rdxe'ch reeman laax, per ad najtan ni rayal

guiëtix ni'qui guial chu'x ladxguiib. ³⁰ Nē guial ma gogbeen guial xixgab ree bēn Israel naj gugūjt reeman laax, zeel cayxhalan laax lojl. Abi' ma rēn loj ree bēn rdxe'ch laax guial con lūj gūūn reeman reglad ni rajp reeman contr laax. Laanan rugojnan lūj.”

³¹ Been ree suldad guin zi'c gunabee suldad rniabee guin abi' guxhin binē reex Pab luguiedx Antípatris. ³² Chi bareguiaal suldad zē ree guia' bayejc reex lod yu' ree suldad, guiáad ree suldad dxiib way zinē reex laaman luguiedx Cesarea. ³³ Chi bidxin reex Cesarea, badēēd reex gui'ch guin loj gobernador guin, bayū tēē reex Pab lojman. ³⁴ Chi gulox biil gobernador guin gui'ch guin, gunabdiidxaman loj Pab ban zaman. Dxel chi gogbeeman guial Cilicia zēēdaman, ³⁵ dxel rēbaman lojman:

—Chi gui't ree bēn za' ree contr lūj, dxel gucagdiagan ni nal.

Abi' gunabeeman gap reex Pab lēn xpalas Herodes.

24

Ni gunee Pab loj gobernador Félix

¹ Chi goc gaay dxej, Ananías, bixhioz mazri zobjloj rniabee graczi ree bixhioz, bidxinman Cesarea con tio'p choon ree guxtis Israel nē tijb licenciad laman Tértulo. Abi' wej reeman loj gobernador guin din cwe'c reeman xguialquia Pab. ² Chi bidxinnē reex Pab, guzuloj Tértulo caneeman contr laaman, rēbaman loj gobernador guin:

—Quixtēē lūj dad gobernador, por lūj nadxu'dxen, nē por xguialrajquil zien ree ni

rüjn sirv cayajc du ladxan. ³ Gra ladczi za' ree bejn conform por gra ni cayüjn! dad gobernador Félix, lüj naj bén zobjloj, quixtéeczi lüj. ⁴ Per chitéë günlaan lüj mazri, rniaaban lojl din gucaagdiajguil ni yanan lojl tibrajtoczi. ⁵ Dunujn bayagbeen xin guie naj zi'c tijb guialguijdx loj ree bén Israel, guidibczi guidxliuj zizax rustijlix laa reeman abi' laax rniabee loj tib cwaa ree bén rniee reeman nazaren. ⁶ Abi' guyën téëx nüjnx dux yadooro'n zi'c tijb luar ad rüjnt sirv, zeel banaazan laax bayënan naguieenan guialguxtis zi'c naj dux leyan. ⁷ Per laa bi't gajc suldad Lisias con ree xsuldadix, babëëxuu reex laax du lojn. ⁸ Abi' rëb suldad rniabee guin guial lojl gui't ree bén rbe'c xguialquia Pab, yan lüj gajc zajc guiniabdiidx lojx din gagbeel zagdxe guial walican ni ranan xcwentix.

⁹ Abi' ree bén Israel za' ni rëb reeman guial waliqui gra ni guin. ¹⁰ Dxel been gobernador guin sen loj Pab din guinieeman, abi' rëb Pab:

—Guial ragbeen diizd gocli rniabeel nacion Israel, zeel ad yu'nawëëgtan yadxi'n ni rudxiib reeman guican. ¹¹ Abi' lüj gajc zajc cwe'quil ruson din gagbeel guial qui gojcri chiptio'p dxej badxinan Jerusalén din ganajchi'n Dios. ¹² Abi' achut banaaznë reeman naj cadildiidxnë'n, ni'qui guial gabën wadijl lën yadooro' Jerusalén, ni'qui lën yadoo ren ree ni yu' ree ni, ni'qui luguiedx guin. ¹³ Bén guie ree ad zajct na reeman lojl guial ni diidxli naj ni rudxiib reeman guican. ¹⁴ Per ni naj diidxli naj guial rliladxan Jesucrist, nejzcüb guin naj ni zinaalan, cayünan sirv loj xDios dux béngulalan, abi' na ree bén guie guial ad xnejzt

Diosan, per cayünan zian guial rliladxan gra ni zëed loj ley në ni bacaa ree bën badëed xtiidx Dios loj ree bejn. ¹⁵ Abi' zi'cgajc rliladx ree bën guie Dios, ziangajc rliladxan laaman guial yaban ree bengüt stijb, zi'c ree bën goc benza'c në ree bën goc benmal. ¹⁶ Zeel rünan naguiejn gabajnan zagdxë chitëë xhie ganaladxan delant loj Dios ni'qui delant loj ree bejn.

¹⁷ 'Ma gojc zien ijz nariin, xt yan baye'c ladxan bidganë'n ni baxhaal ree bejn par ree bënprob, bidganë' tēen gon ni rayal gudëdan loj Dios. ¹⁸ Laan naj ni cayünan lën yadooro' Jerusalén chi bi't ree bën Israel za niz Asia baguiaa reeman naj, per mal benan zi'c rniabee ley din gacan naya. Abi' ad zient bejn riga', ad cabë tēetan wadijl. ¹⁹ Yan, bën gunaaz ree naj, laa reeman naj bën rayal su guie din na reeman xhie rünan xhie pornin rdxe'ch reeman naj. ²⁰ O balguiza, bën za' ree guie na reeman xhie da dolan badxejl reeman chi guzun loj gra ree guxtis Israel. ²¹ Tijbzi ni benan chi za'n galay reeman gurixdiajn rën: “Guial rliladxan yaban ree bengüt, zeel za' ree bejn contr naj yan.”

²² Chi biguiejn gobernador Félix zian, abi' guial ragbeeman xhienaag naj xnejz cüb Jesucrist, dxel basa'nman guialquia guin par stijb dxej, rëbaman loj reeman:

—Chi guilt suldad Lisias, dxel gagbeen zagdxë xhienaag naj xcwentidi.

²³ Dxel gunabee gobernador guin tijb ree suldad rniabee guin din gusnuu guinia reex Pab, per guslaa reex güünman ni rënman ad gudxoon tēë reex chignaj ree xmiwaman laaman.

²⁴ Chi goc tio'p choon dxej, bidxin gobernador Félix stijb con lacheelaman Drusila, laaman naj bén Israel. Dxel gunabee gobernador guin bidxin Pab, abi' bacaagdiajg reeman ni rëbaman xcwent guialrliladx bejn Jesucrist. ²⁵ Per chi guzuloj cayëbaman guial rayal guiban ree bejn xnejz, gucwëëz tëë xixgab mal reeman, guial guidxin tëë dxej yadëëd ree bejn cwent loj Dios, dxel dád bidxeb gobernador guin abi' rëbaman loj Pab:

—Baguiaj. Ganetan lüj chi chu'n luar stijb.

²⁶ Per Félix në milian rbëzaman gudëëd Pab lojman din guslaaman laaman, zeel gurejdxaman laaman zien volt din guinieenëman laaman. ²⁷ Zian gudëd tio'p ijz abi' barii Félix guial gobernador, dxel bayu Porcio Festo xluaraman. Abi' guial guyën Félix naya'nman zagdxë loj ree bén Israel, zeel basa'nman Pab ladxguib.

25

Gunee Pab loj Festo

¹ Chi goc choon dxej ni bidxin Festo Cesarea par chu'man guial gobernador, dxel wejman Jerusalén. ² Yagaj, bixhioz rniabee ree bixhioz con ree bén Israel mazri zojbloj, wej reeman lojman bile'c reeman xguialquia Pab, ³ abi' gunab reeman lojman din guixhiaalaman Pab Jerusalén. Zian guyën reeman din xixgab reeman naj gugüjt reeman Pab runejz. ⁴ Per badxi' Festo xtiidx reeman rëbaman guial Cesarea nayaaw Pab guiáad laaman nayob yaguaajman ni, ⁵ abi' rëbaman loj reeman:

—Bén rajp ree guialrniabee lojdi, laa reeman sa Cesarea, abi' bal xhie ni mal been xin guin, ni na reeman xhienin beenx.

⁶ Cost xhujn o chiï dxej guzuj Festo Jerusalén, dxelri ziaman Cesarea. Chi bareguiaal, gurej loj xyagxhilaman lod rniabeeman, abi' gunabeeman chica' reex Pab. ⁷ Chi bidxinnë reex laaman, bén Israel guza ree Jerusalén, gubig reeman abi' zien ree niguijdx badxiib reeman guijcaman, majsi ni'qui tijb ni rëb reeman ad gojct nulüü reeman guial najn ni wali. ⁸ Dxel badxi' Pab xtiidx reeman, rëbaman:

—Naj, achet ni mal wayünan xley ree bén Israel, ni'qui yadooro' Jerusalén, ni'qui rey César.

⁹ Per Festo guyënman naya'nman zagdxé loj ree bén Israel, dxel gunabdiidxaman loj Pab, rëbaman:

—¿Rënl ya chel Jerusalén? Ni yanajn bal rajpil dol o ad rajptil dol ya ni rudxiib reeman guijquül.

¹⁰ Badxi' Paban rëbaman:

—Loj ree guxtis Roman za'n, lod rayal gac reglad xhienin benan. Lüy ragbee zagdxé guial achet ni mal wayünan bén Israel ree. ¹¹ Bal xhie tijb ni mal benan ni rayal guiëtan, ad zabexuutan guiëtan. Per bal id wali ni na reeman benan, achut rajp derejch yayü naj loj reeman. Zagdxeli naj gadëëdan loj rey César.

¹² Dxel chi gulox guneenë Festo bén naj ree xbejnman, bén rëb ree ni rayal gac, rëbaman loj Pab:

—Lüy na tädil loj rey César, yan lojman tädil.

Za' Pab loj rey Agripa

¹³ Chi gudëd tio'p choon dxej, rey Agripa con xbéngunaaman Berenice bidxin reeman Cesarea

bitixloj reeman gobernador Festo. ¹⁴ Abi' guial zien dxej da't guzuj reeman ni, dxel be Festo diidx loj rey Agripa xcwent Pab, rëbaman:

—Guie yu' tijb xin basa'n Félix ladxguiib. ¹⁵ Chi wan Jerusalén, bixhioz rniabee ree bixhioz con ree bén rniabee loj ree bén Israel gule'c reeman xguialquiax, gunab reeman ganabeen guiëtix. ¹⁶ Per naj rën loj reeman guial guxtis Rom ree ad najt xcostumbr reeman nabee reeman guiët tijb bejn chi gadaman su loj ree bén cabe'c xguialquiaman din guiëbaman walin ya o ad walitan ni rudxiib reeman guiycaman. ¹⁷ Zeel chi bi't ree bén Israel guin guie, achet guial niaglaan, bareguiaal gajc gure loj da yagxhilan, abi' gunabeen bidnë reex xin guin. ¹⁸ Per ree bén bi't gule'c xguialquiax, achet ni nadxeb na reeman zi'c gunaladxan ninia reeman por laax. ¹⁹ Tijbzi xguialquiax ni gule'c reeman naj por xcostumbr reeman në por tijb bén la Jesús, bén ma güjt, per Pab rëb naban Jesús guin. ²⁰ Abi' guial ad ragbeetan xhie günan por zian, dxel gunabdiidxan loj Pab bal rën xchex Jerusalén din gac reglad ni guin ree ni. ²¹ Per laax gunab téd loj rey César din gac reglad ni rëb reeman por laax, zeel gunabeen yaawsiix xt chile' yaxhalan laax loj rey César.

²² Dxel rëb rey Agripa loj Festo:

—Bal zian chile'n, nëgajc naj rën gucagdiag laax.

Abi' badxi' Festo laan rëbaman:

—Guixie gucaagdiajguil laax.

²³ Chi bareguiaal, dád zagdxe ca' xab rey Agripa con Berenice bidxin reeman con ree bén rniabee suldad con los demazri ree bén zojbloj luguiedx

guin, bidxin reeman guyu reeman lēnū lod gucaagdiajg reeman ni guiēb Pab. Dxel gunabee Festo bica' reex Pab. ²⁴ Abi' rēb Festo:

—Rey Agripa nē los demazridi dad za'nēdi dunujn guie. Bén ruguiaadi guie, gra bén Israel, zi'c Jerusalén zi'cgajc guie ma bi't reeman bidganaj reeman naj rniab reeman guiētix. ²⁵ Naj, achet xfaltix radxejlan guial rayal guiētix. Guiáad laax gunab tēd loj César Augusto lod gac reglad xcwentix, abi' ma benan xgab yaxhalan laax. ²⁶ Per ad radxejltan ni gucan por laax loj gui'ch ni gaxhalan loj rey César, bén rniabee naj. Zeel nuzun laax lojdi zi'c naj quijb lojl rey Agripa, din chi ma gulox gunabdiidxidi ni rayal guiniabdiidxidi lojx dxel ma yu' ni gucan por laax. ²⁷ Din naj rulūū ad xnejzt naj yaxhalan tijb bén yu' ladxguiib loj rey César abi' ad zētān xhie beenman.

26

Ni gunee Pab loj rey Agripa

¹ Dxel rēb rey Agripa loj Pab:

—Ma zajc guinieel por lūj.

Abi' gules yaa Pab guzuloj rēbaman:

²—Dád nix yu' luxdon guial bile' za'n lojl yan rey Agripa, par ganen lojl yadxi' tēen gra ni rudxiib ree bén Israel guican. ³ Din lūj ragbee zagdxe gra xcostumbr ree bén Israel, nē conin rūjn persi rdildiidx reeman. Zeel rniaaban lojl gapil pasens gucaagdiajguil ni ganin.

Zi'c guban Pab gocli

⁴ Gra ree bén Israel ragbee xhienaag gubajnan con laa reeman zi'c ladxan zi'c Jerusalén, diizd

xindoon. ⁵ Ragbee tää reeman abi' zajc na reeman laan bal rën reeman, guial diizd xindoon najn bénfarisew, abi' ree bénfarisew naj bén mazri zinal xley ree bén Israel. ⁶ Abi' yan za'n guie, badëöd reeman naj loj ree guxtis guial rliladxan yasban Dios bengüt ree zi'c beenman promisejs loj ree dux béngulal ree. ⁷ Gra guidxiptio'p cwa' ree bén Israel cabëz dxej güün Dios zian, zeel rën reeman laaman rüjn tää reeman sirv lojman dxej guiaal. Abi' yan guial rliladxan laan zeel rbe'c ree bén Israel da guialquian, rey Agripa. ⁸ ¿O naladxidi ya nawëög yasban Dios bengüt ree?

Be Pab diidx xhienaag guzunalaman bén rliladx ree Jesucrist

⁹ 'Guia'xchej benan xgab rayal günan xhienin bén rliladx ree Jesús, bén Nazaret, ¹⁰ abi' zian benan Jerusalén. Con xtiidx ree bixhioz rniabee ree bixhioz, zien ree bén rliladx Jesucrist badxe'n ladxguuib. Abi' chi rugüjt reeman laa reeman, në naj rë guiëtri reeman. ¹¹ Zien volt benan laa reeman xhienin din günan naguiejn gusa'n reeman guialrliladx reeman Jesucrist. Zian benan lën gra ree yadoo, abi' guial tant rdxe'chan laa reeman dxel guzunaalan laa reeman xt luguiedx ren ree.

Be Pab diidx stijb xhienaag bililadxaman Jesucrist

(Hch. 9:1-19; 22:6-16)

¹² 'Abi' par zian za'n Damasco, con quijb xtiidx ree bixhioz rniabee ree bixhioz. ¹³ Per ganin lüj rey Agripa, lunejz baguian tijb xbacha' xanyabaa zi'c garol dxej, per mazri naynin guial loj ni rusni gubijdx, abi' basnin guidib lod za'n con ree bén

zinë'n. ¹⁴ Abi' dugraczan bareeyuj, dxel bigu-
 iejn nan cha' bën gunee naj con diidx hebreo, na-
 man: “Saulo, Saulo, ¿chexc zeel rzunalil naj? Lüj
 gajc rguuil xguialnaal zi'c go'n rudxegua' loj yag
 rulaagnë reeman laab.” ¹⁵ Dxel rën: “¿Chu lüj
 Dad?” Badxi'man laan naman: “Naj naj Jesús bën
 rzunalil. ¹⁶ Per bixche, guzuli, din balülön lojl par
 güünl naj sirv gü tēēl diidx ni baguiaal yan nē ni
 gulün lojl. ¹⁷ Naj gaxhal lüj loj ree bën Israel nē
 loj ree bën ad najt bën Israel, abi' naj gagnë' lüj
 chitēē xhie güün reeman lüj. ¹⁸ Gaxhalan lüj loj
 reeman din guixhialil loj reeman gusa'n reeman
 nejz mal, chinal reeman nejz zagdxē. Ad tiēbri
 reeman nabee xindxab laa reeman, chinal tēē
 reeman xnejz Dios. Abi' chililadx reeman naj
 din gac xtol reeman perdon yayal tēē reeman ni
 rayal gra ree xbejn Dios, bën ma naya ree delant
 lojman.”

Bazoob Pab diidx ni balüüloj lojman

¹⁹ Zian gojc, rey Agripa, bazoban diidx benan ni
 na Jesucrist lon chi guneeman naj diidx xanyabaa.
²⁰ Yaloj luguiedx Damasco gutiechan xtiidxaman,
 dxelri Jerusalén nē guidib niz Judea nē loj ree bën
 ad najt bën Israel. Rën loj reeman din yayüjn
 reeman xgab por xtol reeman, yadxi' loj reeman
 loj Dios güün tēē reeman ni rayal güün reeman
 din guiguien guial ma bidxaa mod naban reeman.
²¹ Abi' por zian, gunaaaz ree bën Israel naj lēn
 yadooro' Jerusalén, guyēn reeman nugüjt reeman
 naj. ²² Per con xyudar Dios laa naj guie xt yan
 cusnuu cayün xtiidxaman loj gra ree bejn, zi'c ree
 bën zojbloj zi'c ree bën ad zojblojt. Abi' gra ni rën

loj reeman naj ganax ni bacaa ree b́en badëe xtiidx Dios loj ree bejn nē ni bacaa Moisejs xhienaag naj ni gac, ²³ guial Cristo naj guial tédaman guialzi, guiétaman. Per chi ma güjtaman yaløj laaman naj b́en yaban loj ree bengüt, abi' gugoijnman b́en Israel ree nē ree b́en ad najt b́en Israel xhienaag gap reeman perdon.

Nuyën Pab nililadx Agripa Jesucrist

²⁴ Chi cayëb Pab zian, dxel gudidxa' Festo rëbaman:

—¡Rajcguijquil Pab! guial tant rusiidil ma rajc guijquil.

²⁵ Per badxi' Pab laan rëbaman:

—Ad guictan rajc, gobernador Festo. Ni canin najn xnejz nē diidxli. ²⁶ Laa rey Agripa za' guie, laaman ragbee ni canin, zeel sin guialrdxeb canen delant lojman. Naj ragbeechaaw guial laaman ragbee gra ni canin, din ad canitan ni goc ralan lod achut zajc gagbee laan. ²⁷ ¿Rliladxil ni rëb ree b́en badëed xtiidx Dios loj ree bejn ya, rey Agripa? Naj ragbee guial rliladxil.

²⁸ Dxel badxi' rey Agripa laan rëbaman:

—Sta'nczi nüjnl naj gan nililadxan Jesús.

²⁹ Abi' rëb Pab:

—Majsi sta'nz o majsi ryaadxri, na Dios guial ad tijbtzi lüj, nē gra ree b́en cucaagdiajg ni canin yan, guidxin dxej chililadxidi Jesús zi'c naj, majsi ad nēt ree caden guie.

³⁰ Dxel bisu rey Agripa con gobernador Festo con Berenice nē gra ree b́en zojbnē laa reeman ni.

³¹ Chi bariica reeman tiblax guzuløj cayünē lasa' reeman diidx, rëb reeman:

—Achet wayüjn xin guie ni rayal guiëtix, o chu'x ladxguiib.

³² Dxel rëb rey Agripa loj Festo:

—Zile' naslaa reex, balidix niniab tédix loj rey César.

27

Baxhaal reeman Pab Rom

¹ Chi rëb reeman ma yaxhaal reeman dunujn Italia, dxel bayü reeman Pab con sta'n ree bën yu' ladxguiib loj tijb suldad rniabee la Julio, laax rniabee tib cwaa ree suldad la Augusto. ² Abi' Cesearea badxu'n loj tijb xbarcw ree bën Adramitio, barcw ni ma grii chen guiedx riga' ree niz Asia. Në Aristarco bunë'n, bën Tesalónica, guiedx riga' niz Macedonia. ³ Chi bareguiaal, badxinan Sidón, lod goc Julio xinza'c da't con Pab, cwëjbix bitixloj ree xmiw Pab luguiedx guin abi' badëed reeman ni ryaadxaman. ⁴ Chi badxoon Sidón badiaawan Chipre yuj riga' loj nijsdoo, basa'nanan dux ladruvejsan chitëë yachaaglojn zro' bi, din niz du lojn rliaj bi guin. ⁵ Badüüdan loj nijsdoo gajxh Cilicia në Panfilia abi' badxinan Mira, tijb guiedx nulen Licia.

⁶ Ni bidxaagloj suldad rniabee guin tijb barcw Alejandría ni che Italia, zianz nax yadxu'n lojn. ⁷ Loj zien dxej bio'n chaawladx, con guidib tarbajw badxinan niz lod la Gnido. Abi' guial sta rliaj bi niz du lojn, dxel zagdxeli badüüdan niz Salmón, badiaawan lod la Creta yuj riga' loj nijsdoo. ⁸ Gadëd ro' yuj guin zio'n loj nijsdoo, per con guidib tarbajw, xt badxinan tijb luar la Buenos Puertos, gajxh niz lod naj guiedx la Lasea.

⁹ Abi' zi'ct ma bayaglaan, ma naj nadxeb yasnuu yo'n loj nijsdoo, din ma zidyob tiamp nayaag. Zeel gunee Pab, ¹⁰ rëbaman loj reeman:

—Dad, ad zagdxet yo' ree bal yasnuu yo' ree, din nadxeb guize'n barcw guin abi' guire'ch gra ni yu' lojn loj nijs guin, xt në dunuj ree nadxeb yayëjt ree.

¹¹ Per suldad rniabee guin mazri beencwentix bën rusa barcw guin në bën naj xbarcw laan, guial loj ni rëb Pab. ¹² Abi' guial ad zagdxet tëët naj yagaj par yadüüdan tiamp nayaag, dxel mazri zien reeman been xgab zagdxeli naj yariin yagaj, yaguieenan nagueijn yadxinan Fenice, tijb guiedx nulen Creta lod ad rbi' tëët bi, ni yadüüdan tiamp nayaag.

Gubi' tijb bidoxh loj nijsdoo

¹³ Dxel guzuloj cabi' tijb bi chaawladx ni zëäd lad sur, abi' gunaladx reeman ma bile' zi'c naj xixgab reeman, zeel bariin bio'n loj nijsdoo gadëd ro' yuj Creta. ¹⁴ Per ad wayajct xchej zio'n chi birii tijb bidoxh la Euroclidón loj nijs guin. ¹⁵ Abi' guzuloj bi guin culadxaan barcw guin. Në guial niz du lojn zëäd bi guin dxel ad gojctri nusnuu barcw guin niejn niz lod rayal niejn, abi' baslaa reeman binë barcw guin dunujn niz lod cucadxaa bi guin laan. ¹⁶ Dxel badüüdan xijch tijb yujdobëz la Clauda riga'n loj nijs, lod ad rbi'tri bidoxh guin, abi' canu naxii xan barcw guin con guidib tarbajw balë'panan loj barcw guin. ¹⁷ Dxel chi gulox balë'pan canu guin loj barcw guin, batiejl reeman duu lad barcw guin chitëë yaze'n'an. Abi' guial rdxeb reeman chëëztiej barcw guin lën üx la Sirte, dxel gulet reeman xlon ree barcw guin

din cwentzi chinë barcw guin dunujn niz lod rucadxaa bi guin laan. ¹⁸ Chi bareguiaal, zian-gajc rbi' bidoxh loj nijs guin, zianz guzuloj cuzaal reeman ni nüü barcw guin loj nijs guin. ¹⁹ Ni bayon dxej, cwa' reeman gra ree ni rüjnnë barcw guin dxiin bazaal reeman loj nijs guin. ²⁰ Zien dxej ad biguient gubijdx ni'qui ree bajl xanyabaa por bidoxh gubi' loj nijs guin, dxel dunujn ad nagueientri du luxdoon yalaan loj nijs guin.

²¹ Abi' guial ma gojc zien dxej ni achetdzi wadaawan, dxel guzuli Pab galay reeman, rëbaman:

—Dad, zagdxeli nucaagdiajguidi da diidxan ad nariit ree Creta, zian ad nadüüdt ree tarbajw guie achet tëet nasëëb ree. ²² Per achet güünan, ad rdxebidi din ni'qui tijbidi ad zëjtt, tijbzi barcw guin yaze'n. ²³ Din Dios rniabee naj, bën cayünan sirv guxhaal tijb xi anjlaman balüüloj lon yan guiaal. ²⁴ Abi' na anjl guin lon: “Pab, ad rdxebil, din rayal sul loj rey César, abi' por lüj ni'qui tijb ree bën zëëd loj barcw guie ad zuslaat Dios guiët reeman.” ²⁵ Zeel yan dad, gol badxe' luxdoodi zagdxe, din naj rliladxan Dios, ragbee tëën zagdxe guial gac zi'c na anjl guin lon. ²⁶ Per gag barcw guie niz ro' tijb yuj riga' loj nijsdoo.

²⁷ Chi goc chiin gubijdx ni zio'n loj nijs guin, guxhinzii badxinan niz loj nijsdoo la Adriatico, niz ni niz guie zë barcw guin loj nijs guin por bi guin. Abi' ree bën nulen barcw guin, guxhinzii zi'ct garol guiaal gogbee reeman guial zamer yadxinan loj yuj. ²⁸ Dxel bare'xh reeman plact naxhit nijs guin, najn zi'ctiubitib mejtr naxhit. Mazri delant bare'xh reeman laan zatijb ma najn gajlbiadx

mejtr naxhit. ²⁹ Abi' bidxeb reeman laro' barcw guin guiaj ree, dxel niz xijch barcw guin bazaal reeman tajp ganch guiib loj nijs guin din chile' sudxe barcw guin, abi' ma rën nejzdoo reeman yareguiaal. ³⁰ Bén nulen ree barcw guin, been reeman bén sta cuzaal ree ganch guiib guin loj nijs guin niz loj barcw guin, naabzi par calet reeman canu chu' reeman par guxüün reeman. ³¹ Per bagojn Pab suldad rniabee con ree xsuldadix, rëbaman loj reex:

—Bal id ree bén guin yaya'n loj barcw guie, ad zalaatridi.

³² Dxel batüüg ree suldad guin ni naxii canu guin persi zinë nijs canu guin. ³³ Chi ma cayni luyuj, rëb Pab loj reeman din gaw reeman, rëbaman loj reeman:

—Ma gojc chiin gubijdx ni ad raayëjstidi achet tëet wayawidi. ³⁴ Naj rni lëjt, gol gudaw din guibandi, din gradi ni'qui tijb guidxguijquidi ad zusëëbtidi.

³⁵ Chi rëb Pab zian, cwa'man tijb guiadxtil, abi' badëëman quixtëë loj Dios niz loj gra reeman, dxel gula'man guiadxtil guin guzuloj cayawaman. ³⁶ Dxel bayu luxdoo gra reeman, guzuloj nëgajc laa reeman cayaw. ³⁷ Tio'pgayuu gayojnchiibixho'p nayajc dugran zio'pan loj barcw guin. ³⁸ Chi gulox gudaw reeman xt bixienladx reeman, dxel bazaal reeman trigo loj nijs guin persi bacha barcw guin.

Bize'n barcw loj nijsdoo

³⁹ Chi bareguiaal, bén nulen ree barcw guin, ad bayünbeet reeman yuj badxin reeman. Per baguiaa reeman tibda'n nijsdoo guin riga' üx

gadëed ro'n, abi' been reeman xgab badxig reeman barcw guin yagaj. ⁴⁰ Dxel batüüg reeman ni naxiinë ree ganch guib guin ni rüjn yudar par sudxe barcw guin loj nijs, basa'n reeman ganch guin ree loj nijs guin, abi' baxhiee reeman yag ni rüjn yudar par sa barcw guin din suloj san. Dxel gules reeman lon ni naj niz lucwaj barcw guin din guiniaazan bi, zianz guzuloj cayriica barcw guin niz ro' nijs guin. ⁴¹ Per wëéztiejn loj üx zien lod bigagan. Niz guijcan wëéz lën üx abi' ni'quid rniibtan, guiáad niz xan guin guzuloj cayze'nan con gojl rliaj nijs guin ladan. ⁴² Dxel nuyën ree suldad guin nugüjt reex bën prejs guin ree, chitëe nixoobnijs reeman abi' nuxüün reeman. ⁴³ Per suldad rniabee guin ad cwëjbtix niajc zian guial ad rëntix niëjt Pab, dxel gunabeex guial bën rajc rxoobnijs ree, yaløj laa reeman chu' loj nijs guin güün reeman nagueijn yarii reeman ro' nijs guin. ⁴⁴ Dxelri ma guidnal gra reeman loj ree tabl o loj ree yag ni baze'n barcw guin. Zian balaan, dugran badxin ro' nijs guin.

28

Bidxin Pab Malta

¹ Chi gulox barii dugran lon nijs guin, dxel bayagbeen yuj lod badxinan lan Malta riga'n galay nijs. ² Bën naj ree bën ni, dád benza'c gojc reeman con dunujn. Been reeman tijb bajl guial nayaag nëtëe guial cayal guia, abi' na reeman du lojn din yubiigan cwë' bajl guin. ³ Dxel bato'p Pab ta'n yagbidx, zianz chi cudxe'man laan loj bajl guin briyaal tijb bëel lën yag guin por xi xliaa bajl

guin, abi' gudawya'b yaa Pab nalbëztib yaaman. ⁴ Chi baguiaa ree bén Malta guin nalbëz bëël guin yaa Pab, dxel rëb loj lasa' reeman:

—Xin guie bejn bagüjtix, zeel majsi gulaax loj nijsdoo, per guiëtczix por ni beenx.

⁵ Per gudxijp yaa Pab abi' biajb bëël guin loj bajl guin, guiáad laaman achet gocaman. ⁶ Gra reeman cabëz saaguij yaaman, o dxejlczi yabaman guiëteman. Per chi gojc xchej, chi baguiaa reeman achet gocaman, bachaa xixgab reeman abi' guzuloj rëb reeman guial tijb dios najman.

⁷ Gajxh lod badxu'n naga' ree xguidxliuj tijb bén zojbloj loj yuj riga' loj nijs guin, laman Publio. Naman du lojn yo'n lidxaman, ni badxu'n choon dxej, dád benza'c tëë gojcaman con dunujn. ⁸ Nadxel naga' xdadaman, ragxuuman, yu'man xliaa rajc tëëman yoobrejn. Abi' guyu Pab lod naga'man, zianz chi gulox gurejdx gunabaman Dios por laaman, dxel guxhoob yaaman guijcaman abi' bayajcaman. ⁹ Chi gogbee ree bénragxuu zojb ni ni goc, bi't reeman lod za' Pab persi bayüjnman laa reeman. ¹⁰ Dxel dád zien ni bazaladx reeman du lojn por zian. Abi' chi badxu'n loj barcw par yadxoon yagaj, banee reeman gra ni rayaadxan lunejz.

Bidxin Pab Rom

¹¹ Choon bëëw badxu'n loj yuj zii, dxelri badxu'n loj tijb barcw Alejandría, ni bitëd ni tiamp nayaag. Niz lucwaj barcw guin ca tio'p ree dxan bén la ree Cástor në Pólux. ¹² Dxel badxinan tijb guiedx la Siracusa, yagaj badxu'n choon dxej. ¹³ Abi' yagaj badxoon bio'n gadëd ro' nijsdoo xt badxinan

guiedx la Regio. Chi bareguiaal, chi badxoon yagaj, briei tijb bi lad sur dxel ni barojp dxej badxinan luguiedx la Puteoli. ¹⁴ Yagaj badxaagan tio'p choon ree bèn naj ree bèn ni nē reeman rliladx Jesucrist, dxel na reeman du lojn yaya'nnē'n laa reeman abi' baya'nnē'n laa reeman toxman. Zian gojc, dxelri zio'n Rom. ¹⁵ Guiáad ree dux compniaran bèn rliladx ree Jesucrist, bèn zojb ree Rom, ma ragbee reeman guial yadxinan yagaj. Dxel briei reeman bidgachaagloj reeman dunujn xt lod la Foro de Apio nē luguiedx la Tres Tabernas. Chi baguiaa Pab laa reeman, babaaman abi' badēēman quixtēē loj Dios. ¹⁶ Chi badxinan Rom, dxel bayü sultad rniabee guin bèn prejs guin ree loj tijb ree sultad rniabee ni. Per cwējb reeman gurej Pab stijb yu ren lod gojp tijb sultad laaman.

Gunee Pab xtiidx Jesucrist Rom

¹⁷ Chi goc choon dxej badxinan Rom, gurejdx Pab bèn Israel zojbloj ree ni. Chi badxajg lasa' reeman, dxel rēbaman loj reeman:

—Compniar Israel, achet wayūnan contr ree bèn Israel ni'qui contr xcostumbr ree dux bēngulal ree. Guiáad laa reeman gunaaz reeman naj Jerusalén, bayü reeman naj loj ree guxtis Rom. ¹⁸ Abi' ree bèn Rom guin chi gulox badēdan cwent loj reeman, dxel nuyēn reeman nuslaa reeman naj, guial gogbee reeman achet benan par guiētan. ¹⁹ Per ree bèn Israel guin badxoon reeman abi' zagdxeli gunaaban gadēēdan loj rey César, per ad guial ra'ptan xhienin contr ree bèn Israel. ²⁰ Zeel guredxan lējt, din guidganajdi naj din ganin lojdi guial por ni rliladxan guial yaban ree bengüt zi'cgajc rliladx

gra ree du lasa' bén Israel ree, zeel naxiin con ree caden guie.

²¹ Dxel rëb reeman lojman:

—Dunujn ni'qui tijb xtiidx ree bén Judea ad waca'tan lod na reeman xcwentil, në ni'qui tijb bén duladx ree bén raza ree Judea achet wana reeman du lojn contr lüj. ²² Per rayënan yaguiejnan xhienaag naj xixgabil, din dunujn rayagbee guial gra ladczi rníee reeman contr religion cüb guin.

²³ Dxel bazuj reeman tijb dxej ni yadxajg lasa' reeman. Chi bidxin dxej guin, dád zien bejn bido'p lod zojb Pab. Abi' diizd rsil xt wadxeguneenëman laa reeman xhienaag naj xguialrniabee Dios. Beenman naguiejn chililadx reeman Jesús, baza't tēëman lod rníee xcwent Jesús loj xlibr ley Moisejs në ni bacaa ree bén badëë xtiidx Dios loj ree bejn. ²⁴ Yu' reeman bililadx ni rëb Pab, per yu' reeman ad bililadxt. ²⁵ Abi' guial ad rdxaagt gü reeman diidx, guzuloj bare'ch reeman. Dxel rëb Pab loj reeman:

—Waliqui ni rëb Isaías bén badëëd xtiidx Dios loj ree dux béngulal ree guial rëb xSprijt Dios:

²⁶ Wej, güjdx loj ree bén guin:

Majsi rigujen reeman, per achetczi chignia' reeman,
abi' majsi ruguiaa reeman, per rulüü ad ruguiaat reeman.

²⁷ Din been luxdoo reeman gojl,
abi' rüjn reeman zi'c rulüü ad ruguiaat reeman,
ad rigujen tēët reeman, chitëë guguiaa reeman,
abi' guien reeman chignia' tēë reeman.
Din ad rënt reeman gui't reeman con naj,
abi' günan laa reeman perdon.

²⁸ Zeel gol gogbee guial diidz yan, loj ree b́en ad najt b́en Israel guire'ch diidz xhienaag gap reeman xperdon Dios, abi' laa reeman zaliladx reeman diidz guin ree.

²⁹ Chi gulox ŕeb Pab zian, dxel zia ree b́en Israel guin, cadildiidxńe lasa' reeman.

³⁰ Tio'p ijz gurej Pab ni, yu lod gudixaman. Ni rnieńeman gra ree b́en rtixloj laaman. ³¹ Sin guialrdxeb ŕebaman loj reeman xhienaag naj xguialrniabee Dios, abi' guneeman xtiidz Dad Jesucrist loj reeman sin guial chu nudxoon.

Xtiidx Dios
New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb4ebcb8-e1f4-5bfc-b08c-f590e137d86d